






5492.60
854
23-11-22





18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45








Faint, illegible text or markings at the bottom of the left page, possibly bleed-through from the reverse side or a very light stamp.

Faint, illegible text or markings at the bottom of the right page, possibly bleed-through from the reverse side or a very light stamp.







敘

余聞之族兄惕甫先生曰文以載道平日修身飭行
是其根本空言經訓尚非揆原之論善哉言乎非近
世才人所知也又曰學古文者當始由無例以之有
例繼由有例以之無例此先生碑版廣例所由作歟
先生自治經史外評隲漢以來文字能抉其精又選
宋元十家文以廣唐宋八家故其為文陶冶前人自
抒心得寓奇於平因疏為密弢斂才華要歸正則同
時家蘭泉姚姬傳秦小峴諸公推服無異詞淵雅堂
全集海外購求其用功也深其收名也遠而一二妄



庸巨子或肆詆毀以自夸烏足以知此中甘苦耶先生此書補金石三例所未備猶梓匠輪輿之有規矩也縱橫變化任人自為是宜公諸天下嘉惠後來而先生門生故舊猶有存者曾莫過而問也乃謀諸吾族之同志者捐資得三人焉堂兄仲涑字秋濤余弟仲鑒字灝生堂姪熙文字靜軒也書楷校正者江子元文字同甫也選板刊之者蘇郡吳氏江寧穆氏也道光二十一年孟冬下旬族弟塗敘

自敘

元潘昂霄金石例明王止仲墓銘舉例其論皆主韓歐秀水朱氏嘗欲臚舉鄱陽洪氏隸釋隸續所述漢碑版以補潘氏王氏兩家之闕而未及也吾今不自揣量輒又旁推秀水之言上追秦漢下訖宋元明作碑版文廣例若干卷潘氏目其書曰金石概辭也王氏目其書曰墓銘專辭也吾今於潘氏王氏所已舉不更舉其所未舉一一舉之潘氏王氏專舉韓歐吾一不舉韓歐要之以文章正統與韓歐也夫文章之用鴻矣碑版為大一器而工聚焉者也碑版莫盛於

韓歐韓以前非無作者凡其可法韓歐則既取而法之矣其不可法韓歐亦既削而去之矣韓以後非無作者能以韓歐之例例秦漢例元明無往不得矣不以韓歐之例例秦漢例元明無往不失矣得失之數明而後承學治古文者有所入此吾廣例之說也雖然傳家以例說春秋而春秋晦文家以例求文章而文章隘或原也或委也吾與潘氏王氏持鋪荷畚臨滔滔者以遏其流非導其原也世有持原而往者吾書與潘氏王氏之書俄空焉快哉乎其達於文也長洲王芑孫自敘

碑版文廣例目錄

長洲王芑孫念豐輯

卷一

秦

碑中具載詔令奏議例

漢

碑載奏議不載制詔例

碑敘奏請而不載所奏例

碑中具載官文書例

碑載長官行檄例

石炭廣例

嶽瀆祠廟碑例

重修道路橋梁碑例

重修官舍碑例

卷二

漢

德政遺愛碑例

碑紀祥瑞例

銘勒武功例

紀造禮器例

追紀古迹例

紀生祠丙舍例

碑紀冢地例

碑紀產業例

碑載世譜例

有紀無銘例

有頌有詩例

有銘有重例

卷三

漢

以文爲誅以頌爲敘例

碑後有亂亂後有銘例

韻語敘之又以韻語為辭例

頌後題名題名後又綴騷辭例

一碑作三文分敘例

詩有三章九章例

碑辭簡質例

敘略而銘詳例

碑後載贈詔例

碑後附紀帝謚例

碑後附紀他人事行例

碑載書撰人姓名例

選石重於書撰例

卷四

漢

一人兩碑例

一碑二銘例

一人之歿本非一銘例

後碑紀事例

朋友稱字例

書先生書私謚例

書處士書故民例

書卒日葬日例

墓文自卒葬日敘起例

墓文必書卒年卒日例

敘家世詳於所著例

有履歷無籍貫例

有卒年無卒日例

書侯國紀年例

書年月日異例

官稱例

卷五

漢

不詳家世例

不書諱字例

碑額碑文合為章法例

書高曾祖父例

書子弟及妻祔葬配食例

娉妻合葬例

書子例

書孫例

石片展例
書兄弟例

先書弟後書子例

書從父兄弟例

書嗣子嗣父母例

書繼母例

碑後增載其孫例

碑後增載夫人例

夫人先葬專誌例

夫人後葬專誌例

女爲其父立碑例

書女不書壻例

書子婦例

納銘墓中例

卷六

漢

石闕石壇神道墓道括例

碑額括例

碑題括例

碑陰括例

題名碑略例

碑側略例

石人例

石獸例

立石例

卷七

三國

碑紀開國典禮例

追立前賢碑碣例

碑額用真書例

晉

梁

書婦姓不書夫姓例

名字官職之外不書一事例

誌保母例

續書前人碑後例

書撰人名列在題後文前例

書撰列名文後例

北魏

世系之外不敘事實例

誌題不書婦姓例

額題紀事例

行狀之式出於墓誌例

不著歷官例

書撰列名碑側例

碑後書女及壻例

重立舊碑增著新文例

東魏

碑頌修廟之人例

北齊

追表其父遺迹例

書撰人名見於文中例

賜額并年月在文前例

周

奉敕書撰例

隋

易代後結銜例

碑刻真容例

窆誌方幅宜小例

官名假借文言例

墓誌今式所始例

石片廣例

塔銘例

釋氏碑刻所始例

唐

題額人列名所始例

篆額題額列名例

敘銘兩人分撰例

唐碑必書所終之地例

碑版二字稱名所始例

誌生擴例

卒日書時起於僧塔例

通稱府君例
額與題互為詳略例

卷八

唐

書撰人列名括例

婦人書碑自署名款例

自加稱謂例

碑中添注塗改例

碑中旁注側寫例

陵廟立碑例

碑反書例
目錄

宮館碑文例

宮館更名重製新文例

紀武功碑例

遺祭碑文例

自為墓誌例

誌捐納出身官例

墓銘刻於經幢例

子貴追立父碑例

墓誌亦有追刊例

前代官祇書新贈不係故階例

灰事碑文必有卒日卒地例

父書子碑例

子撰父碑直書名諱例

子書父碑直書名諱例

父喪稱孤子所始例

母喪稱哀子所始例

誌夫婦合葬不標婦姓例

婦人專誌祇標夫姓例

婦人專誌祇標婦姓例

婦人專誌額書夫姓題書婦姓例

婦人專誌額書婦姓題書夫姓例

婦人專誌祇敘婦家世系例

不書婚配例

妻尚存而見於碑中例

誌婢妾不係其夫例

表德或冠勳階之上或綴勳階之下例

書地界四至例

銘用雙聲例

碑中不敘書畫藝能例

刻文舊碑之陰例

卷九

唐

誌載生平著撰例

標題書姓不書名例

貶官後仍係故階例

游覽題名括例

小字書表疏大字書詔旨例

一時自有沿用異文例

作古無今有之神祠碑例

書封贈官階例

碑誌著所憑行狀例

婦人亦得稱君例

碑用他人填諱書名例

雙名單舉一字例

書子婦例

唐人合葬亦自有夫婦雙標例

以自號冠於姓名之上例

以祖父官階冠於姓名之上例

公主雖已出家仍書公主例

親王公主不當書某地人例

貴官表墓亦祇稱碣例

道士碣所始例

誌銘亦有御撰例

始用堪輿家羅經山嚮例

碑題紀事例

以年月入標題例

瑩記兆記之例

表墓碑銘例

墓表出於瑩兆記例

唐德政碑有官立私立之分例

碑版中稱君稱公例

書景時猶曰吉時例

賜額及貴官上額事皆起於僧道例

書再適有諱有不諱例

敘世系婚配卒葬異文例

追加賜姓例

卷十

唐

僧用俗葬俗用僧塔例

碑側有記例

封禪碑例

頌德銘功碑例

墓碑前有敘後有系辭例

新墓碑銘例

立石追表因加銘陰例


諱字皆祇一見例

陪葬碑例

公主碑其駙馬有書有不書例

奉敕撰文自有與時變通例

碑版文廣例目錄終



碑版文廣例卷一

韓翃與鄭觀效不長洲王芑孫念豐輯



吾以文章正統與韓歐矣顧乃上追秦漢而尤
詳於漢何也昌黎言之矣非三代兩漢之書不
敢觀兩漢之書昌黎固嘗熟觀而取法焉弗敢
弗詳也詳於漢而見諸司馬班氏書者略弗道
何也此為承學治古文者言世無承學治古文
而未讀司馬班氏書者也然則方以昌黎孕諸
漢烏在其以正統與韓歐也觀乎漢而後知韓
歐之道之難韓歐之文之貴也古文莫貴乎事

信而言文漢碑版之在世亦多矣或與而蹟或
枝以蔓雖或得焉其所得常不敵其所失吾今
舉其尤雅者例之庶幾乎言文矣而事之信不
信网敢知也且夫例春秋之法言也貫道而出
得乎心之所安究乎義之所止者也傳家發例
之情五曰微而顯志而晦婉而成章盡而不汙
懲惡而勸善是五者漢碑版有其彷彿乎漢碑
版無之而韓歐有之斯不得不以文章正與
韓歐矣漢碑版不皆出於文士乖離析亂人率
其臆固未嘗有例也漢一代作者岸然以春秋

自例司馬氏而止耳班氏而止耳下此雖范蔚
宗氏有所弗逮矧其散者乎在作者本無例故
潘氏王氏之例不及漢韓歐繼司馬班氏而作
又例司馬班氏之例以自例於春秋故潘氏王
氏舉例自韓歐始是潘氏王氏之謹嚴非其鮮
聞而寡見狎近而忘遠也然而有如秀水之云
則其書猶未足以饜學者之心也吾今卽秀水
之言舉無例者一一例舉之而實非能例舉之
也聊舉其異焉爾舉其異而漢碑版之無例自
見例之不存義於何有義也者例之所自出也

韓歐酌其義然後潘氏王氏得以舉其例吾憂夫今之學者人人鄭許家家金石奉其所謂漢學者以誚讓程朱又將挾其所謂漢碑者以抵牾韓歐是書亦烏容無作哉吾非病漢也病夫尊漢而不得其所以尊之也惟尊漢故詳於漢不詳於漢無以知韓歐之文之貴韓歐之道之難也吾用秀水之說以成書而與秀水異意不可無述故首發之

秦

碑中具載詔令奏議例

史記秦始皇二十八年東行郡縣上鄒嶧山立石由魯諸儒生議刻石頌秦德始皇登山凡六刻石由皆具載惟嶧山碑不見其辭而模本尚傳文字完具前列始皇詔百四十四字後自皇帝曰以下二世詔七十九字微小始皇六刻石各異其文惟二世七十九字之詔刻於其旁者皆同秦斤秦權亦皆勒此詔於左非獨刻石也今泰山琅邪遺刻亦在惟琅邪刻於皇帝始皇帝及成功盛德字皆空格書之其後丞相斯等奏議則跳行別起其泰山嶧山刻皆無跳行空格可見秦法雖嚴當時跳行空格亦無定例始皇

帝六刻石既見於史記惟嶧山刻始末周具故舉以爲例

嶧山刻文

皇帝立國維初在昔嗣世稱王討伐亂逆威動四極武義直方戎臣奉詔經時不久滅六暴強廿有六年上薦高號孝道顯明既獻泰成乃降專惠窺軼遠方登於嶧山羣臣從者咸思攸長追念亂世分土建邦以開爭理攻戰日作流血於野自泰古始世無萬數施及五帝莫能禁止迺今皇帝壹家天下兵不復起熯害滅除黔首康定利澤長久羣

臣誦略刻此樂石以著經紀皇帝曰金石刻盡始皇帝所爲也今襲號而金石刻辭不稱始皇帝其於久遠也如後嗣爲之者不稱成功盛德丞相臣斯臣去疾御史大夫臣德昧死言請具刻詔書金石刻因明白矣臣昧死請制曰可

案薛氏鐘鼎款識載秦權平陽斤二世詔成功盛德下易九字曰刻此詔故刻左使毋疑蓋此係奏請後則刻諸其物古人置辭分別安妥若此

漢

碑載奏議不載制詔例

凡奏議兼載詔答惟史晨及樊毅復華下民租田口

石片廣傳
算碑其事或待報或不待報皆祇見原奏史晨於奏牘外直接贊頌樊毅則於奏牘外不贊一辭此漢例然也先生二字形諸章疏蓋當時固不以是爲尊稱魯相史晨祀孔廟碑

建德二年三月癸卯朔七日巳酉魯相臣晨長史臣謙頓首死臯上尚書臣晨頓首頓首死臯死臯臣蒙厚恩受任符守得在奎婁周孔舊寓不能闡宏德政恢崇一變夙夜憂怖累息屏營臣晨頓首頓首死臯死臯臣以建德元年到官行秋饗飲酒泮宮畢復禮孔子宅拜謁神坐仰瞻棖楹俯視几

筵靈所馮依肅肅猶存而無公出酒脯之祠臣卽自以奉錢修上案食醢具以敘小節不敢空謁臣伏念孔子乾坤所挺西狩獲麟爲漢制作故孝經援神契曰元邛制命帝亦行又尚書考靈耀曰邛生蒼際觸期稽度爲赤制故作春秋以明文命綴紀撰書修定禮義臣以爲素王稽古德亞皇代雖有褒成世享之封四時來祭畢卽歸國臣伏見臨辟雍日祠孔子以太牢長吏備爵所以尊先師重教化也夫封土爲社立稷而祀皆爲百姓興利除害以祈豐稷月令祀百辟卿士有益於民矧乃孔

子元德煥炳光於上下而本國舊居復禮之日闕而不祀誠朝廷聖恩所宜特加臣寢息耿耿情所思惟臣輒依社稷出王家穀春秋行禮以共煙祀餘缺賜先生執事臣晨頓首頓首歿臯歿臯臣盡力思惟庶政報稱爲效增異輒上臣晨誠惶誠謹頓首頓首歿臯歿臯上尚書時副言太傅太尉司徒司空大司農府治所部從事

昔在仲尼汁光之精大帝所挺顏母毓靈承敝遭衰黑不代蒼缺流應聘歎鳳不臻自衛反魯養徒三千獲麟趣作端門見徵金石遺文錄端門在聖廟東南血書著

紀黃玉韻應主爲漢制道審可行乃作春秋復演孝經制定六藝象與天談鉤河摘洛卻揆未然巍巍蕩蕩與乾比崇

案鮑埼亭集乙瑛碑祇敘奏而增以銘蓋法史記三王世家爲子瞻表忠觀碑所祖

樊毅復葺下民租田口算碑

光和二年十二月庚午朔十三日壬午因農太守臣毅頓首歿臯上尚書臣毅頓首頓首歿臯謹案文書臣以去元年十一月到官其十二月奉祠西嶽華山省視廟舍及齋衣祭器率皆久遠有

垢故魯不修太室春秋作譏臣以神嶽至尊宜加
恭肅輒遣行事荀班與華陽令先讜以漸繕治成
就之後仍雨甘雪濺潤宿麥惠滋黎庶臣卽日以
詔書齋祠雪未消澤時日清和神歡民喜誠聖朝
勞神日月廣被四表覆奇之德神人被施遐邇大
小莫不幸甚臣毅頓首頓首歿歿又書言
縣當孔道加奉尊嶽一歲四祠養牲百日常當充
肥用穀橐三千餘斛或有請雨齋禱役費兼倍每
被詔書調發無差山高聽下恐近縣小民不堪役
賦有飢寒之窘違宗神之敬乞差諸賦復華下十

里以內民租田口算以寵神靈廣祈多福隆中興
之祚臣輒聽行盡力奉宣詔書思惟惠利增異復
上臣毅誠惶誠恐頓首頓首歿歿上尚書掾
臣條屬臣淮書佐臣謀因農太守上祠西嶽乞縣
賦發差復華下民十里以內租田口算狀

碑敘奏請而不載所奏例

史晨孔龢諸碑或兼載詔答或祇載奏請亦有皆不
載而獨虛敘其事者今舉一以例其餘

白石神君碑

蓋聞經國敘民莫急於禮禮有五經莫重於祭祭

有二義或祈或報報以章德祈以弭害古先哲王

類帝禮宗望於山川徧於羣神建立兆域修設壇

屏所以昭孝息民輯禦上下也白石神君居九山

之數水經有九山廟碑云九顯靈府君參三條之

壹隸釋馬融王肅皆以導汧為北兼將軍之號秉

斧鉞之威按堂金石跋漢季封號已如體連封龍

氣通北嶽幽贊天地長育萬物觸石而出膚寸而

合不終朝日而澍雨露洽前後國縣屢有所請指

日剋期應時有驗猶自挹損不求禮秩縣界有六

名山案常山國元氏縣有三公塞白石塞又有封

山碑無極山碑三公封龍靈山先得法食去光

和四年三公守民蓋高等如為無極山詣太常求

法食相縣以白石神君道德灼然乃具載本末上

尚書求依無極為比即見聽許於是遂開拓舊兆

改立殿堂營宇既定禮秩有常縣出經用備其犧

牲奉其圭璧絜其粢盛旨酒欣欣燔炙芬芬敬恭

明祀降福孔殷故天無伏陰地無羸陽水無沉氣

火無灾燁時無逆數物無害生用能光遠宣朗顯

融昭明年穀歲熟百姓豐盈粟斗五錢國界安禦

余乃陟景山登崢嶸采石勒功名其辭曰

巖巖白石峻極太清皓皓素質因體為名惟山降
神髦士挺生濟濟俊乂朝野充盈灾害不起五穀
熟成乃依無極聖朝見聽遂與靈宮於山之陽營
宇之制是度是量卜云其吉終然允臧匪奢匪儉
率由舊章華殿清閑肅雍顯相元圖靈象穆穆皇
皇四時禮祀不愆不忘擇其令辰進其馨香犧牲
玉帛黍稷稻糧神降嘉祉萬壽無疆子子孫孫永
永番昌

案碑後列常山相无氏令長丞尉及祠祀掾石師
姓名又續題云燕元璽三年正月十日主簿程疵
家門傳白石將軍教吾祠今日為火所燒語可見
當時已有邪教其後黃巾黑山白波黃龍羣賊並

起米賊張魯至以左道煽民自號師君其來學者
謂之鬼卒從受學者出五斗米張牛角等自相名
號以騎白馬者為白騎聲大者為雷公饒須者為
于祗根眼大者為李大目與明季流賊相同其風
蓋起於東漢之末所從來久矣
又案曝書亭集所云蓋高者合之無極山碑特常
山一髮男子耳先是光緒四年馮巡詣三公山請
兩神使高傳言即與封龍無極共興雲雨賽以白
羊高等遂詣太常察法食越二年具載神君始末
上尚書即見聽許碑陰有榜城神君李女神博石
神君壁神君名號殆因白石而充類名之碑建於
光緒六年是歲
妖人張爾起矣

碑中具載官文書例

碑有不能不載官文書者宜依漢為準而斟酌變通
之漢碑之載官文書者亦多惟孔龢碑始末周具其

石片厚
體式可見者三三公奏天子一也朝廷下郡國二也
郡國上朝廷三也中閒又參錯司徒公某字某三行
又贊曰一行殆出掾史所題文不多而公私文武備
焉故舉以為例

孔廟置百石卒史孔龢碑

司徒臣雄司空臣弑稽首言魯前相瑛言詔書崇
聖道勉學藝孔子作春秋制孝經刪述六經演易
繫辭經緯天地幽贊神明故特立廟褒成侯四時
來祠事已即去廟有禮器無常人掌領請置百石
卒史一人典主守廟春秋饗祀珣出王家錢給犬

洒直

兩漢金石記犬字似是友字蓋即須報謹問
發也既省發為友又省友為犬耳

太常祠曹掾馮牟史郭元辭對故事辟雍禮未行
祠先聖師侍祠者孔子子孫太宰太祝令各一人
皆備爵太常丞監祠河南尹給牛羊豕雖各

一大司農給米祠臣愚以為如珙言孔子大聖則

象乾坤為漢制作先世所尊祠用眾牲長吏備爵
今欲加寵子孫敬恭明祀傳於罔極可許臣請魯
相為孔子廟置百石卒史一人掌領禮器出王家
錢給犬洒直他如故事臣雄臣弑愚戇誠惶誠恐
頓首頓首歟鼻歟鼻臣稽首以聞制曰可

元嘉三年三月廿七日壬寅奏雒陽宮

司徒公河南原武吳雄字季高

司空公蜀郡成都趙武字意伯

元嘉二年三月丙子朔廿七日壬寅司徒雄司空武下魯相承書從事下當用者選其年卅以上經通一藝雜試通利能奉_函先聖之禮爲宗所歸者如詔書書到言

永興元年六月甲辰朔十八日辛酉魯相平行長史事卞守長擅叩頭歾臯敢言之司徒司空府壬寅詔書爲孔子廟置百石卒史一人掌主禮器選

年卅以上經通一藝雜試能奉_函先聖之禮爲宗所歸者平叩頭叩頭歾臯歾臯謹案文書守文學掾魯孔_函師孔憲戶曹史孔覽等雜試_函修春秋嚴氏_函通高弟事母至孝能奉先聖之禮爲宗所歸除_函補名狀如牒平惶恐叩頭歾臯歾臯上司空府

贊曰巍巍大聖赫赫彌章相乙瑛字少卿平原高唐人令鮑曇字文公上黨屯留人_函教稽古若重規_缺乙君察舉守宅除吏孔子十九世孫麟廉請置百石卒史一人鮑君造作百石吏舍功垂無窮

於是始缺

案隸釋碑兩元嘉三年及永興元年皆平缺司徒府司空府及贊曰亦平缺第八行制曰可高出

字司徒公司空公在制可雒陽宮兩行之下與碑之下一字竝

案金薤琳瑯元嘉三年三月者蓋是年五月始改永興至十月而雄武亦罷免金石萃編武以增阿梁冀為清議所不齒范史李固傳贊云其視吳黃趙武猶糞土也此因循例轉奏刻名首行亦金石之玷不可不知

碑載長符檄例

孔龢史晨諸碑所列文書皆奏牘也韓仁碑則其事

非朝廷指麾乃司隸交尉自下文書耳漢刻類出於部吏此獨出於長官蓋漢人猶得自行其意長官於所屬生則薦其才死則旌其伐如此為後人刻臺符檄例之所本

聞忘長韓仁碑

熹平四年十一月甲子朔廿二日

下河南尹

空閣典統非任素無績勲宣善

下仁前在 嘉經

國以禮刑政得中有子產君子

下尉表上遷槐里

令除昔未到不幸短命喪身為

下祀則祀之王制

之禮也書到郡遣吏以少牢祀

下勒異行勗厲清

惠以旌其美豎石訖成表言如律下十一月廿二
日乙酉河南尹君丞憲謂京寫下墳道頭訖成表
言會月卅日如律令

案李獻能跋兩漢重循吏而韓之語史記儒林傳
金石存如律令三字漢人必移中語史記儒林傳
及前漢言朱博傳陳琳為袁紹檄豫州文東觀餘
論載破美檄皆有之惟見於碑刻者少潛研堂金
石文跋尾額稱循吏賢之也仁自聞憲遷槐里令
除書未到平故額不云槐里令也授堂金石跋
百官志尹下丞一人不見有君丞之文惟見於陽
朔元年銅雁足鐙銘則自前漢有之亦如令丞長
謂丞之

嶽瀆祠廟碑例

漢碑大抵部掾頌其府主之辭雖嶽瀆祠廟之碑不

專為嶽瀆祠廟而作必兼頌其獻享之人陳乞之事
或即紀於文後或就紀於文中亦即昌黎南海神廟
東坡表忠觀之所從出今約舉數篇以概其餘

西嶽華山廟碑

周禮職方氏河南山鎮曰華謂之西嶽春秋傳曰
山嶽則配天乾坤定位山澤通氣雲行雨施既成
萬物易之義也祀典曰日月星辰所昭印也祭法
印瞻昭二字古韻不通當考地理山川所生殖也功加於民祀
以報之禮記曰天子祭天地及山川歲徧焉自三
五迭興其奉山川或在天子或在諸侯是以唐虞

石片廣傳
疇咨四嶽五歲壹巡狩皆以四時之中月各省其
方親至其山崇祭燔燎夏商則未聞所損益周監
於二代十有二歲王巡狩殷國亦有事於方嶽祀
以圭璧樂奏六歌高祖初興改秦淫祀太宗承循
各詔有司其山川在諸侯者以時祠之孝武皇帝
修封禪之禮思登假之道巡省五嶽禮祀豐備故
立宮其下宮曰集靈宮殿曰存僊殿門曰望僊門
仲宗之世重使使者持節祀焉歲一禱而三祠後
不承前至於亾新寢用邛虛訖今垣址營兆猶存
建武之元事舉其中禮從其省但使二千石以歲

時往祠其有風旱禱請祈求靡不報應自是以來
百有餘年有事西巡輒過享祭然其所立碑石刻
紀時事文字摩滅莫能存識延熹四年七月甲子
宏農太守安國亭侯汝南袁逢掌華嶽之主位應
古制修廢起頓閱其若茲深達和民事神之義精
通誠至禱祭之福乃案經傳所載原本所由銘勒
斯石垂之于後其辭曰

巖巖西嶽峻極穹蒼奄有河朔遂荒華陽觸石興
雲雨我農桑資糧品物亦相瑤光崇冠二州古曰
雍梁馮于幽岐文武克昌天子展義巡狩省方玉

帛之贊禮與岱亢六樂之變舞以致康在漢中葉
建設宇堂山嶽之守是秩是望侯惟安國兼命斯
章尊修靈基肅共壇場明德惟馨神歆其芳遏穰
凶札擊斂吉祥歲其有十民悅無疆

袁府君肅恭明神易碑飾闕會遷京兆尹孫府君
到欽君嘉業遵而成之延熹八年四月廿九日甲
子就

袁府君諱逢字周陽汝南女陽人孫府君諱璆字
山陵安平信都人時令朱頡字宣得甘陵鄒人丞
張舅字少游河南京人左尉唐佑字君惠河南密

人主者掾華陰王萇字德長

京兆尹勅監都水掾霸陵杜遷市石遺書佐新豐
郭香察書刻者潁川邯鄲公修蘇張工缺君缺

案隸釋東漢循王莽之禁無二名郭香察書者察
菴他人之書小歐陽以為郭香察所書者非也以
宣帝為仲宗則是借仲為中金石文字記律歷志
有太史治歷郎仲郭香豈其人歟金石萃編碑以
舅為昉舅昉皆說文所無徐氏新坵昉字云昉明
也隱五年公羊傳昉於此乎石經作放經典本無
昉字碑張舅
蓋漢時俗字

樊毅修華嶽碑

山經曰泰華之山削成四方其高五千仞廣十里
周禮職方氏華謂之西嶽祭視三公者以能興雲

兩產萬物通精氣有益於人則祀之故帝舜受堯
歷數親自巡省設五鼎之奠柴燎堙埋致敬神祇
艾用昭明百穀繁殖黎民時雍鳥獸率舞鳳皇來
儀暨夏殷周未之有改也其德休明則有禎祥荒
淫臊濊篤灾必降秦違其典璧遺鎬池二世以亾
漢祖應運禮遵陶唐祭則獲福亦世克昌亾新滔
逆鬼神不享建武之初彗掃頑凶更率舊章敢用
元牲牲必充天惟醇佑萬國以康光和二年有
漢元舅五侯之胄謝陽之孫水經注泚水西南流
謝水注之樊丹封謝
陽侯卽其國范書樊氏侯者
五國樊丹封射陽侯者誤也曰樊府君諱毅字仲

德承考讓國家於河南究職州郡辟公府除防東
長中都令誅強虜撫瘠民二鄙以清命守斯邦威
隆秋霜恩踰冬日景化暨宣猶復夕惕惟寵祿之
報順民之則孟冬十月齋祀西嶽以傳窄狹不足
處尊卑廟舍舊久牆屋傾亞世室不修春秋作譏
特部行事荀班與縣令先讜以漸補治飾中外觀
圖珍琦畫恠獸嶽瀆之精所出禎秀役不干時而
功已著暫勞久逸神永有憑自古泰山邴邑繇存
存謂不
收租稅五嶽尊同哀此勤民獨不賴福乃上復十
里內工商農賦克厭帝心嘉瑞仍畚風雨應時濊

潤品物君舉必書况乃盛德惠及神人可無述焉
於是功曹郭敏主簿魏襲戶曹史許禮等遂刊元
石銘勒鴻勳垂曜億齡永有昭識其辭曰

兩儀剖判清濁始分陽凝成山陰積爲川泰氣雍
否洪波汎臻堯命伯禹決江開汶神靈既定恩覆
兆民乃列祀典辨於羣神因瀆祭地嶽以配天世
主遵修永享历年赤銳煌煌受茲介福京夏密清
殊俗賓服令問不違可謂至德德音孔昭實惟我
后出自中興大漢之舅本枝繁昌延慶長久俾守
西嶽達奉神禮改傳飾廟靈則有濟降瑞畲祚景

風凱悌惟風及雨成我稷黍稽民用章康艾室宇
刊銘紀誦克配梁甫

華山亭碑

惟光和无年歲在戊午名曰咸池季冬己巳因農
太守河南樊君諱毅字仲德下車之初恭肅神祀
西嶽至尊詔書奉祀躬親自往省從勞謙卽事有
漸散齋華亭齋室逼窄郡縣官屬法齋無處尊卑
錯綜精誠不固畏天之威逢斯瘴怒時雨不興甘
澍弗布念存黔首懼闕曠素於是與令巴郡胸忍
先讜公謀圖議繕故斷度掃廓立室異處左右趣

石片屋
之莫不競慕二年正月己卯興就既成有亢休嘉
啓寤各得竭情福祿是顧刻茲碑號吏卒俠路其

辭曰

巖巖西嶽五鎮次宗緒德之尊太華優隆皇帝永
思祀典孔明高神肯宴珪璧贄通赫赫在上以畜
萬邦惟嶽降神實生羣公卿士百辟纘業攸蒙帝
命不違歲事報功后辟命卿散齋外亭敬恭明祀
以奉皇靈處所逼窄屑宰有聲神樂其靜脩翬無
形尊卑有敘絜心致誠因繕舊室整頓端平在其
板屋孰不加精天人同道萬祚是迎既受帝祉延

於後生爲龍爲光顯又王庭爲公爲侯福祿來成
刊石紀號永享利貞

桐柏淮源廟碑

延熹六年正月八日乙酉南陽太守中山盧奴

缺

君處正好禮尊神敬祀以淮出平氏始於大復潛
行地中見於陽口立廟桐柏春秋宗奉灾異告愬
水旱請求位比諸侯聖漢所尊受珪上帝太常定
甲郡守奉祀濟絜沈祭從郭君以來廿餘年不復
身至遣丞行事簡略不敬明神弗歆灾害以生五
嶽四瀆與天合德仲尼慎祭常若神在君準則大

聖親之桐柏奉見廟祠崎嶇逼狹開拓神門立闕
四達增廣壇場飭治華蓋高大殿宇缺齊傳館石

獸表道靈龜十四案古墓制有石羊虎馬據此則漢廟制亦用石獸并有石龜也

衢廷因敞宮廟嵩峻祇慎慶祀一年再至躬進三

牲執玉以沈為民祈福靈祇報佑天地清和嘉祥

昭格禽獸碩茂草木芬芳黎庶賴祉民用作頌其

辭曰

泫泫淮源聖禹所導湯湯其逝惟海是造疏穢濟

遠柔順其道弱而能強仁而能武不舍晝夜明哲

所取寔為四瀆與河合矩烈烈明府案漢碑所稱府君者皆郡

守明府亦然南雷黃氏所謂耆舊稱府君者亦惟唐宋以後之例耳好古之則虔恭

禮祀不愆其德惟前廢弛匪躬匪力灾青以興陰

陽以忒陟彼高岡臻茲廟側肅肅其敬靈祇降福

雍雍其和民用悅服穰穰其慶年穀豐殖望君輿

駕扶老攜息慕君塵軌奔走忘食懷君惠賜思君

罔極于胥樂兮傳千萬億

春侍祠官屬五官掾章陵劉訢功曹史安眾劉瑗

主簿秦陽缺茂戶曹史宛任吳

秋五官掾新缺梁懿功曹史酈周謙主簿安眾鄧

疑主記史宛趙缺戶曹史宛謝綜

案東海廟碑殘剝不成文三公山碑無極山碑其事不典且已存白石神君一碑可以概見故皆置錄不

重修道路橋梁碑例

漢碑記所興道路橋梁功役者至多若殺阬及桂陽太守周憬諸碑皆無可為例惟犍為楊君碑原委周悉鄙君碑兼紀用功及及其錢粟之數何君閣道羊竇道等碑文字簡質真是記體為唐一代作記者法所自始故錄以為例

故司隸校尉犍為楊君頌

惟坤靈定位川澤攸同澤有所注川有所通斜谷

之川其澤南隆八方所達益域為衝高祖受命興於漢中道繇子午出散入秦建定帝位以漢詆焉後以子午塗路甚難更隨圍谷復通堂光凡此四道垓鬲尤艱至于永平廿有四年詔書開斜鑿通石門中遭元二

案諸家釋文有作元元西夷虐殘解有作元年二年解

橋梁斷絕子午復修上則縣峻屈曲流巔下則入冥傾寫輪淵平阿淖泥常蔭鮮晏木石相距利磨礪盤臨危槍礪履尾心寒空輿輕騎遘尋弗前惡蟲慙獸蛇蛭毒蠃未秋截霜稼苗天殘終年不登匱餒之患卑者楚痛尊者弗安愁苦之難焉可具

五片居
言於是明知故司隸校尉健爲武陽楊君厥字孟
文深執忠伉數上奏請有司議駁君遂執爭百僚
咸從帝用是聽廢子由斯得其度經功飭爾要敞
而晏平清涼調和烝烝艾嚳至建和二年仲冬上
旬漢中太守健爲武陽王升字稚紀涉歷山道推
敘本原嘉君明知美其仁賢勒石頌德以明厥勲
其辭曰

君德明明炳煥彌光刺過拾遺厲清八荒奉魁承
杓綏億衙疆春宣聖日秋貶若霜無偏蕩蕩真雅
以方嚳靜烝庶政與乾通輔主匡君循禮有常咸

曉地理知世紀綱言必忠義匪石厥章恢宏大節
讜而益明揆往卓今謀合朝情釋艱卽安有勲有
榮禹鑿龍門君其繼蹤上順斗極下答坤皇自南
自北四海攸通君子安樂庶士悅雍商人咸憙農
夫永同春秋記異今而紀功垂流億載世世歎誦

案誦與頌通
頌與容通

敘曰明哉仁知豫識難易原度天道安危所歸勤
勤竭誠榮名休麗

五官掾南鄭趙邵字季南屬褒中鼂漢彊字產伯
書佐西成王弼字文寶主

石片磨係

王府君閔谷道危難分置六部道橋特遣行丞事
西成韓朗字顯公都督掾南鄭魏整字伯玉後遣
趙誦字公梁案答中曹卓行造作石積萬世之基
或解高格下就平易行者欣然焉

伯玉即日徙署行丞事守安陽長

案隸釋云水經及歐趙皆謂之楊厥碑蜀中晚出碑云司隸校尉楊君厥諱淮字伯邳始知厥為語助蓋後政尊之不名順帝紀延光四年詔益州刺史罷子午谷道通褒斜道蓋從其請也兩漢金石記頌為建和二漢中太守王升所立其主鑄石之役者鼂漢王武二人頌後低格書之已開後人系撰書姓名之式廣雅云積州名類篇云一曰州積蓋易州積為石也未伯玉徙官十三字乃於前文之下空七格書之非提行低七格也金石萃編碑中命字升字誦子垂筆甚長而命字幾過二格

與李孟初碑年字相似皆漢隸所僅見者

卞玉磨厓表紀

故司隸校尉楊君厥諱淮字伯邳舉孝廉尚書侍
郎上蔡洛陽令將軍長史任城金城河東山陽太
守御史中丞三為尚書尚書令司隸校尉將作大
匠河南尹伯邳從弟諱弼字穎伯舉孝廉西鄂長
伯母憂去官復舉孝廉尚書侍郎遷左丞冀州刺
史太醫令下邳相无弟功德牟盛當究三事不幸
早隕國喪名臣州里失覆二君清缺約身自守俱
大司隸孟文之元孫也

黃門同郡卞玉字子珪以熹平二年二月廿二日
謁歸過此追述勒銘故財表紀

案兩漢金石記此文與石門頌同刻於石門之厓
故文尾特書曰大司隸孟文之元孫此一句即二
碑之貫紐也其云過此當即是過石門見楊氏開
通道路之刻有感而詳述之非過墓之謂也洪氏
誤以為過墓題之曰碑
文尾明言表紀是也
又案同郡行過此友故迹追而為之題志非墓非
祠兼表其弟此又一例也漢碑中亦不數數然也
附存之以備一體

漢部君修褒斜道碑

永平六年漢中郡以詔書受廣漢蜀郡巴郡徒二
千六百九十人缺通褒斜道太守鉅鹿部君部掾

與李孟初碑年字相
似皆漢隸所僅見者

卞玉磨厓表紀

故司隸校尉楊君厥諱淮字伯邳舉孝廉尚書侍
郎上蔡洛陽令將軍長史任城金城河東山陽太
守御史中丞三為尚書尚書令司隸校尉將作大
匠河南尹伯邳從弟諱弼字穎伯舉孝廉西鄂長
伯母憂去官復舉孝廉尚書侍郎遷左丞冀州刺
史太醫令下邳相无弟功德牟盛當究三事不幸
早隕國喪名臣州里失覆二君清缺約身自守俱
大司隸孟文之元孫也

黃門同郡卞玉字子珪以熹平二年二月廿二日
謁歸過此追述勒銘故財表紀

案兩漢金石記此文與石門頌同刻於石門之厓
故文尾特書曰大司隸孟文之元孫此一句即二
碑之貫紐也其云過此當即是過石門見楊氏開
通道路之刻有感而詳述之非過墓之謂也洪氏
誤以為過墓題之曰碑
文尾明言表紀是也
又案同郡行過此友故迹追而為之題志非墓非
祠兼表其弟此又一例也漢碑中亦不數數然也
備一存之以

漢部君修褒斜道碑

永平六年漢中郡以詔書受廣漢蜀郡巴郡徒二
千六百九十人缺通褒斜道太守鉅鹿部君部掾

治級王宏史荀茂張宇韓岑弟典功作太守丞缺

字楊顯將作周始作橋閣六百二十三閒大橋五

為道二百五十八里郵亭驛置徒司空褒中縣官

寺并六十四所凡用功七十六萬六千八百餘人

瓦卅六萬九千八百四器用錢百四十九萬九千

四百餘斛粟九年四月成就益州東至京師去就

安隱

蜀郡太守何君閣道碑

蜀郡太守平陵何君遣掾臨邛舒鮪將徒治道造
尊榎閣表五十五丈用功千一百九十八日建武

中元二年八月就道史任雲陳春主

案隸釋東漢隸書斯為之首蜀人以為尊捷閣碑棧道謂之閣道非樓閣之閣也莽漢之時習俗相尚以即位初元冠於新歷之上故此碑有建武中元之文八月作六月

漢安長陳君閣道碑

永建五年孟春下旬漢安長蜀郡青衣陳君到官

字缺五約垂意惠民施無為之政行不言之教德化

流行盜賊缺少五穀豐茂百姓晏然各得其所君

思所以利民大小悉備此道本有根閣二百餘丈

字缺二穿陷壞絕車馬僵頓常以農時發民缺治歲

歲造度直世餘萬君躬自案行以眇思省去根閣

令就土著長無勞費為萬世基百姓行人驩悅歌

詠郵亭掾尹厚字缺二臣有述君之義故勒此石以

示後賢其辭曰

惟此故道險阻危難根閣院缺臨江緣山秋雨水

潦字缺二陷穿車馬僵頓修隊隕顛行旅困苦發賦

加民乃至於今遭我陳君舍道施德蹈義履仁治

合中和化行若神清過夷齊行同參騫以身率下

非禮不言思惟儉約所以利民追哺缺飯露宿草

缺百姓安樂不勞不煩又省此閣就乎平便民無

經賦行人離患時丞馮卿廉約勤勤好施樂善欽

承奉宣掾史遵憲各建忠缺咸缺百福子子孫孫

時道橋掾董缺二

案隸釋根字未詳所出所謂根閣者猶都閣棧閣之比也

青衣尉趙孟麟羊竇道碑

羊竇道舊故南上高山下入深谷危峻回遠百姓

患苦永初六年青衣尉南安趙孟麟更易由此道

濱江平澤無盜賊差近廿里騎馬擔負水弱得過

除去危難行人萬姓莫不蒙恩傳于無究乎

維世青衣尉趙君故治所書佐郡督郵隨牒除到

官六日郡召守蜀鐵官長積四月治狀分明徒守

成都今復還歸尉官羊竇故道高之君虔穿厓易

道盜賊懲止老弱往來無患時典主通道者積谿

故吏梁汜捕盜賊王雷百姓過者皆蒙恩君延壽

萬年書此巨盛永元十一月九日造

案此碑永元八年事今不書年而第書月荒略之甚

武都太守李翕天井道碑

蓋除患調難為惠鮮能行之斯道狹阻有坂危峻

天井臨深之阨冬雪則凍淪夏雨滑汰頓躓傷害

民苦拘駕推排之役勤勞無已過者蹶蹶以為大

戒太守漢陽阿陽李君履之若辟風雨部西部道

橋掾李壘鍾鏗鎚西阪天井山止缺八丈四尺堅

無陷潰安無傾覆四方賴之民悅無疆君德惠也

刊勒紀述以示萬載建嚮五年四月廿五日巳酉

訖成

案碑後丞掾從事題名與西狹大同小異其中有
一行曰從史位下辨仇靖字漢德書文然則此文
亦仇靖撰之而書之也漢碑所稱從史位從掾位
者殆裏行借職之類其府主辟為掾史猶或待闕
未真授耳

重修官舍碑例

漢碑敘世系往往但書其官不書名字惟曹全則自高祖以下具列焉案其文所由作僅僅為開南寺門

廓廣聽事官舍廷曹廊閣而已蓋今重修衙署之記也敘末自言嘉慕奚斯考甫因而作頌官中考室固宜有銘昌黎鄆州谿堂之作有敘有詩或本于是故例之

郃陽令曹全碑

君諱全字景完敦煌效穀人也其先蓋周之冑武王秉乾之機翦伐殷商既定爾勲福祿攸同封弟叔振鐸于曹國因氏焉秦漢之際曹參夾輔王室世宗廓土席竟子孫遷于雍州之郊分止右扶風或在安定或處武都或居隴西或家敦煌枝分葉

布所在爲雄君高祖父敏舉孝廉武威長史巴郡
胸忍令張掖居延都尉曾祖父述孝廉謁者金城
長史夏陽令蜀郡西部都尉祖父鳳孝廉張掖屬
國都尉丞右扶風隄廩侯相金城西部都尉北地
太守父琇少貫名州郡不幸蚤世是以位不副德
君童齒好學甄極志緯無文不綜賢孝之性根生
于心收養季祖母供事繼母先意承志存以之敬
禮無遺闕是以鄉人爲之諺曰重親致歡曹景完
易世載德不隕其名及其從政清擬夷齊直慕史
魚歷郡右職上計掾史仍辟涼州常爲治中別駕

紀綱萬里朱紫不謬出典諸郡彈枉糾邪貪暴洗
心同僚服德遠近憚威建掣二年舉孝廉除郎中
拜西域戊部司馬時疏勒國王和德弒父篡位不
供職貢君興師征討有吮膿之仁有分醪之惠攻
城野戰謀若涌泉威侔諸貴和德面縛歸次還師
振旅諸國禮遺且二百萬悉以簿官遷右扶風槐
里令遭同產弟憂棄官續遇禁罔潛隱家巷七年
光和六年復舉孝廉七年三月除郎中拜酒泉祿
福長馱賊張角起兵幽冀兗豫荆揚同時竝動而
縣民郭家等復造逆亂燔燒城寺萬民騷擾人懷

不安三郡告急羽檄仍至于時聖主諮諏羣僚咸
曰君哉轉拜邵陽令收合餘燼芟夷殘逆絕其本
根遂訪故老商量雋艾王敞王畢等恤民之要存
慰高年撫育課寡以家錢糴米粟賜瘠字即瘠旨大
女桃斐等合七首藥神明膏親至離亭部吏王臯
程橫等賦與有疾者咸蒙瘳悞字即快惠政之流其
于置郵百姓繼負反者如雲戢治廨屋市肆列陳
風雨時節歲獲豐年農夫織婦百工戴恩縣前以
河平元年遭白茆谷水灾害退于戊亥之間興造
城郭是後舊姓及修身之士官位不登君乃閔縉

紳之徒不齊開南寺門承望華嶽鄉明而治庶使
學者李儒樂規程寅等各獲人爵之報廓廣聽事
官舍廷曹廊閣升降揖讓朝覲之階費不出民役
不干時門下掾王敞錄事掾王畢主簿王厯戶曹
掾秦尚功曹史王顓等嘉慕奚斯考甫之美乃共
列石紀功其辭曰

懿明后德義章貢王庭征鬼方威布烈安殊荒還
師旅臨槐里感孔懷赴喪紀嗟逆賊燔城市特受
命理殘圯芟不臣禦字即首繕官寺開南門闕嵯峨
望華山鄉明治惠沾渥吏樂政民給足君高升極

石片廣例

鼎足

中平二年十月丙辰造

案金石存銘後空二三行許然後書年月一行又
 復書于行末金石文字記又舍去郡縣遠者謂
 之離亭其在郭內者謂之都亭銘中吏樂政民給
 足君高升極鼎足二足字原非一義可以連押昌
 黎之重用韻本此古人有重用而并非異義者如
 雲漢詩三章周餘黎民靡有孑遺昊天上帝則不
 我遺焦仲卿妻詩此婦無行節舉動自專
 由吾意久懷忿汝豈得自由亦皆連押
 又案楊君碑通篇用韻辭曰之後又有敘曰此楚
 辭重曰例也鄙君碑通篇散行不用韻此秦刻石
 也例

碑版文廣例卷一

碑版文廣例卷二

長洲王芑孫念豐輯

漢

德政遺愛碑例

德政遺愛之碑今功令禁不得立然其文自漢有
 之耿勲碑作於勲在位之時張遷碑作於遷去官之
 後碑尾各紀立石歲月此漢碑之整潔可法者也

案張納碑亦德政遺愛頌也而題其首曰巴郡人
 守都亭侯張府君功德敘碑陰既列從事掾史姓

名矣其末一行曰中平五年三月上旬書君升台
 祚承天百福子孫千億漢碑類皆紀日茲不書日

而書旬漢碑類皆不紀書石茲獨不曰造而曰書
 下綴吉語此又一例也敘首立姓定氏應天文象

卑反黃列

卷二

一

石片尾
與柳敏之遠追柳宿同碑缺
字多文可意得不更錄矣

武都太守耿勳碑

漢武都太守右扶風茂陵耿君諱勳字伯璋其先
本自鉅鹿世有令名爲漢建功俾侯三國卿守將
帥爵位相承以迄於君君敦詩悅禮家仍典軍壓
難和戎武慮慷慨以得奉貢上計廷陳惠康安遏
之謀上納其謨拜郎上黨府丞掌令考績有成符
莢缺昨熹平二年三月癸酉到官奉宣詔書哀閔
垂恩猛不殘義寬不宥姦喜不縱慝威不戮仁賞
恭罰否畀奧缺流其於統系寵存贈亾篤之至也

歲在癸丑厥運淫雨傷害稼穡率土普議開倉振
澹身冒炎赫火星之熱至屬縣巡行窮匱陟降山
谷經營跋涉草止露宿扶浴履餐千有餘人出奉
錢兩缺振衣賜給貧乏發荒田耕種賦與寡獨
王佳小男楊孝等三百餘戶減省貪吏二百八十
人勸勉趨時百姓樂業老者得終其壽幼者得以
全育甘棠之愛不是過矣又開故道銅官鑄作錢
器興利無極外羌且缺等怖威悔惡重譯乞降修
治狹道分子效力役大小民得衆兆之歡心可謂
印之若明神者已夫美政不紀人無述焉國人僉

歎刊勒斯石表示無窮其辭曰

泰華惟岳神曜吐精育茲令德既詰且明寔謂耿
君天胙顯榮司牧莅政布化惟成柔嘉惟則穆如
風清勤恤民隱拯阨扶傾匪皇啓處東撫西征赤
子遺慈以浚以生山靈挺寶凶灾乃平愷悌父母
民賴以禦

熹平三年四月廿日壬戌西部通橋掾下辨李禔

造

漢故穀城長蕩陰令張君表頌

君諱遷字公方陳畱已吾人也君之先出自有周

周宣王中興有張仲以孝友為行披覽詩雅煥知
其祖高帝龍興有張良善用籌策在帷幄之內決
勝負千里之外析珪於畱文景之間有張釋之建
忠弼之謨帝游上林問禽獸所有苑令不對更問
嗇夫嗇夫事對於是進嗇夫為令令退為嗇夫釋
之議為不可苑令有公卿之才嗇夫喋喋小吏非
社稷之重上從言孝武時有張騫廣通風俗開定
畿寓南苞八蠻西羈六戎北震五狄東勤九夷荒
遠既賓各貢所有張是輔漢世載其德爰既於君
蓋其繡縵纘戎鴻緒牧守相繫不隕高問孝弟於

家忠謇於朝治京氏易聰麗權略藝於從政少爲郡吏隱練職位常在股肱數爲從事聲無細聞徵拜郎中除穀城長蠶月之務不閉四門臘正之際休囚歸賀八月算民不煩於鄉隨就虛落存恤高年路無拾遺犁種宿野黃中初起燒平城市斯縣獨全子賤孔蔑其道區別尚書五教君崇其寬詩云愷悌君隆其恩東里潤色君垂其仁邵伯分陝君懿於棠晉陽佩璋西門帶絃君之體素能雙其勲流化八基遷蕩陰令吏民頡頏隨送如雲周公東征西人怨思奚斯讚魯考父頌殷前詰遺芳有

功不書後無述焉於是刊石豎表銘勒萬載三代以來雖遠猶近詩云舊國其命惟新

於穆我君旣敦旣純雪白之性孝友之仁紀行來本蘭生有芬克嶷有兆綏御有勲利器不覲魚不出淵國之良幹垂慶在民蔽芾棠樹溫溫恭人乾道不繆惟淑是親旣多受祉永享南山千祿無量子子孫孫

惟中平三年歲在攝提二月震節紀日上旬陽氣厥析感恩舊君故吏韋萌等僉然同聲賃師孫興刊石立表以示後昆共享天祚億載萬年

石片層
案金石存韓非子西門豹之性急故佩韋以緩已
董安于之性緩故佩紘以自急今碑中倒用之璋
卽韋兩漢金石記碑合頌表僅五百言而其敘張
氏先世居三之一亦似太煩此固不可入潘昂霄
王止仲之例者矣頌文無頌曰字碑尾紀年
月後又若頌詞者文與書皆不可以常格例

碑紀祥瑞例

李翁黽池五瑞圖摩厓刻於西狹頌之前以其在前
故頌首先書其事而後及西狹之役漢人圖祥瑞而
刻於石者不止此此其尤著也爲昌黎河中府連理
木頌所本始故舉以爲例

黽池五瑞圖

黃龍

白鹿

嘉禾

木連理

甘露降

承露人

君昔在黽池修峻欽之道德洽精通致黃龍白鹿
之瑞故圖畫其象

上官掾上祿上官正字君選

缺四上祿楊嗣字文明

缺四下辨李京字長都

石片廣依

案隸釋也有一嶠屬因農郡曰修嶠嶽之道者公羊傳所云嶠之嶽巖文王之所避風雨也文蓋此本

銘勒武功例

漢世紀功若楊雄趙充國頌皆韻語自是象讚班固封燕然山前敘後銘乃正格也近新疆巴爾庫勒所出裴岑碑不用韻其文雄直其氣振厲殆將兵者自為之有秦皇帝刻石之遺風焉故與班氏作竝舉為例

班孟堅封燕然山銘

惟永元元年秋七月有漢元舅曰車騎將軍竇憲

寅亮聖皇登翼王室納於大麓惟清緝熙乃與執金吾耿秉述職巡禦治兵於朔方鷹揚之校螭虎之士爰該六師暨南單于東胡烏桓西戎氏羌侯王君長之羣驍騎十萬无戎輕武長轂四分雷輜蔽路萬有三千餘乘勒以八陣莅以威神元甲耀日朱旂絳天遂凌高闕下雞鹿經磧鹵絕大漠斬溫禺以釁鼓血尸逐以染鏐案後漢書匈奴大臣左右溫禺鞬王皆單于子弟次第當為然後四校單于者其異姓大臣次左右尸逐都侯橫徂星流彗掃蕭條萬里野無遺寇於是域滅區

安侯河安侯名乘燕然躡冒頓之區落焚老上之龍庭

將上以攄高文之宿憤光祖宗之元靈下以安固

後嗣恢拓境宇振大漢之天聲茲可謂一勞而久

逸暫費而永禦也乃遂封山刊石昭明盛德其辭

曰

鑠王師兮征荒裔勦凶虐兮截海外復其邈兮亘

地界封神邱兮建隆碣熙帝載兮振萬世

敦煌太守裴岑紀功碑

惟漢永和二年八月敦煌太守雲中裴岑將郡兵

三千人誅呼衍王等斬馘部眾克敵全師除西域

之灰即灾字蠲四郡之害邊郡又安振威到此立德

祠以表萬世

唐李克用曲陽北嶽廟題名附

河東節度使檢校太保同中書門下平章事隴西

郡王李克用以幽鎮侵擾中山領蕃漢步騎五千

萬眾親來救援與易定司空同申祈禱翌日過常

山問臯時中和五年二月廿一日克用記易定節

度使檢校司空王處存看題

案舊唐書幽鎮兩藩兵強易定疲於侵寇賴與太原姻好每為之援即此事也晉王自將以救王處

存同禱於嶽廟看題猶答書也

至三月十七日以幽州請就和斷遂卻班師再謁
晬容兼申賽謝便取飛狐路卻歸河東廿一日克

用重記

又案唐姜行本紀功碑近出哈密城北庫舍圖嶺
唐書本傳所稱高昌之役磨去古刻更刊頌者是
也其首題曰大唐左屯衛將軍姜行本勒石其二
文其文在駢體中亦未殊勝不足錄今略其大意
以附於後

曰高昌國者乃是兩漢屯田之壁遺兵之所居麴
文泰即其苗裔也聖上愍彼蒼生申茲弔伐乃詔
使持節光祿大夫吏部尚書上柱國陳國侯君集
交河道行軍大總管副總管左屯衛大將軍上柱

國永安郡開國公薛萬均副總管左屯衛將軍上
柱國通川縣開國男姜行本等爰整三軍恭行天
罰以通川公深謀閒出妙思縱橫營造工具乃統
沙州刺史上柱國望都縣開國侯劉德敏右監門
中郎將上柱國富陽縣開國伯屈昉左武侯郎將
李海岸前開州刺史時德衡右監門府長王進威
等竝率驍雄鼓行而進以貞觀十四年五月十日
師次伊吾乃勒石紀功傳諸不朽

又案其碑左側別題兩行其一曰交河道行軍
總管左驍衛將軍某官吳仁領右軍若干其一曰
曰交河道行軍總管左武衛將軍上柱國某縣開
國公牛進達領十五萬蓋古人紀功皆列兵數姜

石片廣後

碑三帥竝立而獨標行本始行本部將為之耶要
之此例皆本於秦刻石亦可為後人紀功者作一
式故因裴岑碑而
增例之以備源流

紀造禮器例

書顧命禮明堂位周官考工述禮器樂器皆朝廷法
物及漢而所在祠廟有紀臣僚自為調置之舉韓勅
碑是也碑文參錯忠緯蓋自光武好圖讖東漢士至
以通七緯為內學通五經為外學其見諸碑版者於
郭有道則曰探綜圖緯於李伋則曰又精羣緯於楊
震則曰明河洛緯度於祝穆則曰七典竝立於唐扶
則曰咀嚼七經於劉熊則曰覈妙七業於楊著則曰

窮七道之奧於蔡湛則曰少耽七典雖其頌孔子之
聖亦曰鈎河摘洛自是一代風尚流露於文辭自歐
陽氏有請刪除九經正義中讖緯劄子而魏了翁作
九經正義盡削去之讖緯之傳始絕要之緯書在漢
世固家絃戶誦之書也今存此一碑以例其餘

韓勅造孔廟禮器碑

惟永壽二年青龍在涖歎霜月之靈皇極之日魯
相河南京韓君追惟大古華胥生皇雄顏缺育缺
寶俱制无道百王不改孔子近聖為漢定道自天
王以下至於初學莫不莫思歎仰師鏡顏氏聖舅

石片屋依
家居魯親里并官聖妃在安樂里聖族之親禮所
宜異復顏氏并官氏邑中繇發以尊孔心念聖歷
世禮樂陵遲秦項作亂不尊圖書倍道畔德離敗
聖輿食糧亾於沙邛君於是造立禮器樂之音符
鐘磬瑟鼓雷洗觴觚爵鹿相桓邊柅禁壺修飾宅
廟更作二輿朝車威熹宣抒元汙以注水流法舊
不煩備而不奢上合紫臺稽之中和下合聖制事
得禮儀於是四方士仁聞君風耀敬詠其德尊琦
大人之意卓爾之思乃共立表石紀傳億載其文

曰

皇戲統華胥承天畫卦顏育空桑孔制元孝俱祖

紫宮太一所授前闔九頭以什言教

什言者十言也春秋正義

引易云伏羲作十言之教曰乾坤震巽坎離艮兌消息

後制百王獲麟來吐

制不空作承天之語乾元以來三九之載八皇三代至孔乃備聖人不世期五百載三陽吐圖二陰出讖制作之義以俟知奧於穆韓君獨見天意復聖二族遠越絕思修造禮樂胡璉器用存古舊宇慤勤宅廟朝車威熹出誠造缺漆不水解工不爭賈深除元汙水通缺注禮器升堂天雨降澍百姓訢和舉國蒙慶神靈佑誠竭敬之報天與厥福永

享眉壽上極華紫旁暨皇代刊石表銘與乾運耀
長期蕩蕩於盛復授赫赫罔窮聲垂億載

案金石史歐陽永叔謂書傳無以敕命名者秦制天子之命為敕漢用秦法臣下豈敢以敕命名是誤以勅為敕也韓明府自名勅從力來聲音賚勞也亦作徠答勸曰勞撫至曰勅示有節也敕從支東聲誠也故為敕命之敕二字易淆故詳著之并官氏家語本注元古其字或誤作開大與翁氏曰宋鄧名世古今姓氏書辨證內有并官復姓顧南原隸辨吳山夫金石文存亦皆從并今國學江寧府學元明如封詔書碑皆作并楷隸相證愈無可疑曲阜桂氏曰禮器士大夫檉禁此碑旅即檉字王篤彬几屬也太平御覽禁一名檉乙去切此碑後文皇戲皇字獨出格題高一字與前後行列不同且通首四字為句惟此一五字疑後人所妄加

追紀古迹例

漢人追紀古迹立祠表墓所在多有若堯母開母倉
頡孫叔敖老子諸碑皆是也今其文或剝蝕而不具
首尾或散漫了無義法各志大略以見異同亦可參
觀其得失云

成陽靈臺碑

惟帝堯母昔者慶都兆含穹精氏姓曰伊體蘭石
之操履規矩之度則乾坤之象通三光之曜游觀
河濱感赤龍交始生堯厥後堯來祖統慶都告以
河龍堯歷三河有龍授圖躬行聖政以育苗萌火
陽之盛先閭後明遂以侯伯恢踐帝宮慶都僊歿

蓋成於茲欲人莫知名曰靈臺上立黃屋堯所奉
 祠下營以水神龍所熹靈龜隱形汾踊波流比目
 鮪魚濯鱗通泉 三代改易荒廢不修五運精還
 漢受濡期興滅繼絕如堯為之承祠期年鮪魚復
 生故有靈臺嗇夫魚師衛士驛憲鮪魚服之延壽
 字缺二之際道小衰沮遂遭亾新禮祠絕矣於是故
 廷尉仲定深惟大漢隆盛德被四表太平未至靈
 瑞未下 案經考典河洛秘奧漢感赤龍堯之苗
 胄當修堯祠追遠復舊復治黃屋推原聖意灾生
 變見天以譴告前後奏上陳敘大義招祥塞咎為

漢來祚朝廷克省帝納其謀以春秋奉太牢祠
 歸治黃殿令月吉日圖立規塋興業會功厥處平
 夷 前設大殿俟神之堂地致石墀其下清涼可
 舞凡 缺以缺 大章時濟陰太守魏郡審冕成陽令
 博陵管遵各遣大掾輔助仲君經之營之不日成
 之神靈精氣依怙於人廢之則亾存之則神復帥
 羣宗貧富相均共慕市碑著立功訓 缺 勒石銘中
 門之表卜擇元日齊革精誠先慶毛血謹慎犧牲
 祈祠獲福神享其靈甘雨時降百穀熟成幽荒率
 服徐方來庭萬國蒙祉黎元賴榮莫不被德咸歌

頌聲其辭曰

於赫慶都德彌大兮承精神耀統赤裔兮爰生聖
堯名蓋世兮上受符命恢帝制兮廣被之恩流荒
外兮歷紀盈千垂遺愛兮陵廟復崇享大祭兮上
來多怙降福沛兮萬國禧嚮孰不賴兮光宣美勲
永缺 蒂兮垂視罔極億萬歲兮

案此篇不用韻語先從堯母敘起然
後及表章之人與孫叔敖碑文相同

楚相孫君之碑

楚相孫君諱饒字叔敖本是縣人也六國時期思
屬楚楚都南郢南郢卽南郡江陵縣也君受純靈

之精懷絕世之才有大賢次聖之質及其爲相
布政以道考天象之度敬授民時聚藏於山殖物
於藪宣導川谷陂障源泉漑灌阪澤隄防湖浦以
爲池沼鍾天地之美收九澤之利以愍潤國家
專國權寵而不榮華一旦可得百金至於沒齒而
無分銖之蓄破玉玦不以寶財遺子孫終始若矢
去不善如絕絃辟患害於無形徹節高義敦良奇
介自曹臧孤竹吳札子罕之倫不能驟也生於季
末仕於靈王立溷濁而澄清處幽昏而照明其遺
武餘典恨不與戲皇帝代同世世爲列姬國在朝

廷其意常墨墨若冠章甫而坐塗炭也 求其子而加封焉子辭父有命如楚不怠亾臣社稷圖而欲有賞必於潘國下濕壤垠人所不貪遂封潘鄉潘卽固始也三九無嗣國絕祀廢固始令段君夢見孫君則存其後就其故祠遂架廟屋立石銘碑春秋烝嘗明神報祚卽歲遷張掖太守及期思縣宰段君諱光字世賢庶慕先賢體德允恭篤古尊舊奉履憲章 臨縣一載志在惠康煦枯粟之慶育藜蒸討掃醜類鰥寡是矜杜偽養善是忠表仁感相孫君乃發嘉訓興祀立壇勤勤愛敬念意自

然刻石銘碑千載表績萬古標記福祐期思縣與士熾孫氏蒙恩

漢延熹三年五月廿八日立

案篇中立石銘碑凡再見其一指期思一指固始令段君卽此所立前碑是也其一指期思一指固始令段君卽也蓋碑陽陰同時并刻故後碑之字卽見於前碑其敘少見歧首蛇及優孟事冗散皆不足錄

開母廟石闕銘

案嵩山有啓母廟漢避景帝諱改啓之字曰開碑首先以題名曰

開母廟興治神道闕時太守字朱寵丞零陵泉

陵薛政五官掾陰林戶曹史夏效監掾陳修長西

河園陽馮寶丞漢陽冀祕俊廷掾趙穆戶曹史張

詩將作掾嚴壽佐左福

案後列銘文皆四字句通首一韻其可誦者曰

爰納塗山辛癸之聞三過不入實勤斯民同心濟

厄字缺三正杞鄩漸替又遭亂秦聖漢福亨於茲馮

神翩彼飛雉字缺二其庭原祥符瑞靈支挺生字缺二

慕化陰陽穆清興雲降兩字缺二以字缺守字缺不竭比

性乾坤福祿來反相肩我君千秋萬祀子子孫孫

表碣銘功昭眊後字缺五延光二年下有重曰皆六字向末可誦者

神靈享而飴格釐我后以萬祺于胥樂而罔極永

歷載而保之

案後人有以紀年入韻語中例蓋本此凡有銘又有重有頌又有詩者前皆四字句後皆六字句一

做周雅一擬楚騷漢例然也

又案嵩山尚有太室少室二石闕其剝蝕尤甚文不可讀然守丞掾史題名皆居銘後惟此以題名發端太室關於文字起訖處各以一圓圈標界其首此亦後人於文字中加圈之例所始

倉頡廟碑

劉君諱下缺流德教於千里乃諏訪國老於

是乎著作教告倉頡天生德於大聖四目靈光

為百王作書以傳萬嗣法度非書不明含氣

庶品非書不記選有德聖裔以缺之良辰薦

祀復民五家乃作頌曰穆穆聖倉永久彌光

無德不報休嘉孔融後題劉明府大漢枝族應期

作弼宗禮崇樂以化末造勸詣辟雍碑側御縣朔

方臨戎孫羨下永壽二年朔方太守上郡仇君譽

孝除郎中太原陽曲長延熹四年九月乙酉詔書

遷御令五年正月到官奉見劉明府立祠刊石表

章大聖之遺靈以示來世之末生謹出錢千百缺

者下行自紀姓名碑額穿右別有左馮翊東牟平

陵衡君諱缺字缺升以熹平六年五月廿八日於

下祠出奉錢二百下之禮

案碑四面有字歐趙洪三家皆未觀其全碑在今
白水縣之史官邨白水為漢左馮翊御縣御節衙

古彭衙地也碑乃御令孫羨奉劉府君之令為之

碑文先自表章之人說起然後入倉頡與堯母孫

叔敖碑異頌後又紀劉明府大漢枝族云云其末

有熹平六年衡君出錢祠祀之事碑陰兩側孫羨

自紀出身歷仕始末及到官奉見劉明府云云餘

皆掾屬輸錢數目即所謂下行自紀姓名者也文

多殘缺不可讀故

僅撮其略如此

邊韶老子銘

老子姓李字伯陽楚相縣人也春秋之後周分為

二稱東西君晉六卿專征與齊楚竝僭號為王以

大并小相縣虛荒今屬苦故城猶在在賴鄉之東

過水處其陽其土地鬱翳高敞宜生有德焉老子

為周守藏室史當幽王時三川實震以夏殷事鑒

喻時王孔子學禮於老聃計其年聃時已二百餘
歲聃然老旄之貌也孔子卒後百廿九年或謂周
太史儋爲老子莫知其所終其二篇之書稱天地
能長且久者以不自生也厥初生民遺體相續其
歿生之義可知也世之好道者觸類而長之以
老子離合於混沌之氣與三光爲終始隨日九
變與時消息規矩三光四靈在旁存想丹田太一
紫房道成身化蟬蛻渡世班固以老子絕聖棄
智禮爲亂首與仲尼道違述漢書古今人表以法
度抑而下之二者之論殊矣所謂道不同不相

爲謀也延熹八年八月甲子皇上尚德因道含閔
光大存神養性意在凌雲是以潛心黃軒同符高
宗夢見老子尊而祀之於時陳相邊韶典國之禮
材薄思淺不能測度至人辨是與非案據書籍以
爲老子生於周之末世樂無名守不德危高官
安下位遺孔子以仁言避世而隱居變易姓名唯
恐見知夫日以幽明爲節月以虧盈爲成老子
勞不定國功不加民所以見崇隆於今爲時人所
享祀乃昔日逃祿處微損之又損之餘胙也顯虛
無之清寂云先天地而生乃守真養壽獲五福之

所致也敢演而銘之其辭曰

於惟缺德抱虛守清樂居下位祿執弗營為繩能
直屈之可縈見幾而作需郊出坳肥遁之吉避世
隱聲見道遺言道德之經譏時微喻尋顯推冥守
一不失為天下正處厚不薄居實含榮 頗違法
言先民之程 以知為愚冲而不盈大人之度非
凡所訂九等之敘何足累名 出入丹廬上下黃
庭背棄流俗含景匿形苞元神化嘘吸至精世不
能原印其灰生天人秩祭以昭厥靈羨彼延期勒
石是旌

案邊韶在當時號為經笥而其文不過如此又中
多舛誤隸釋譏之亦為後來人引用外家言所始
然漢人下語猶自有分寸不似唐人夢
真容及東坡作二氏文之和身放倒也

紀生祠丙舍例

漢孔耽碑案其文蓋營生壙而作丙舍異日將以為
祠堂耳乃其額則直書曰漢故行梁相事碭孔君之
神祠以生祠而曰神祠豈古人不諱抑題在其後耶
後世生祠有記丙舍有記義始乎是故例之漢碑有
銘者類書其辭由其文曰惟此碑卻書如頌曰如而
也當與春秋星隕如雨之如同讀此又一例也

碭孔君碑

君諱耽兄弟三人君最長厥先出自殷烈殷家者
質故君字伯本初魯遭忘新之際苗胄析離始定
茲者從叔陽以來君少治禮經遭元二轆軻人民
相食舞土茅茨躬采菱蕩消形瘦腊以養其親慈
仁質榻精靜誠信天授之性非其學也治產小有
追念祖母故無魂構於是君乎竭凱風以極綢繆
惟蓼儀以愴恨特開郭藏造作堂宇增土種柏孝
心達寔平石上見神蛇有頃復亾放籠羅之雉救
窮禽之危小弟升高游忘畜積道富財貧君引共
居卅餘年雖賦舛如義合故天應厥徵木生連理

成體一焉下則容人上則洪茂馨卓流布縣請署
主簿功曹府招稽議郡將烏程沈府君表病委職
署君行事假穀孰長印敝總領文書年踰皓首縣
車家蒼黃髮忘老背有胎表孫息教姚驩樂壽考
觀金石之消知萬物有終始圖千載之洪慮定吉
兆於天府目睹功匠之所營心欣悅於所處其內
洞房四通外則長廡功賦合出世萬以光和五年
歲在壬戌夏六月訖成於此行夫君子欽美含誥
如頌曰

君之德兮性自然蹈仁義兮履朴純惻隱至今神

蛇存皇乘象兮木理連矜鳥獸兮放舍旃享黻榮
兮景號宣達情性兮睹未然永億載兮傳功勳刊

石祠兮示詰賢

子得述父臣得述君故紀焉時君年七十二自所
立作君子颯作內至時已更郡諸曹史督郵承認
紀行手自注石治師同縣朱適朱祖并作畜郭

案隸釋此碑筆法古怪其文又自左而右數行之
後字畫頗小其末又有小字數十敘孔君之年及
其子歷官與石工姓名又有子得述父之句則疑
孔君自作壽藏而厥子刊石也余案後文小字所
云作內者蓋壙中之事孔君作其外其子作其內
也所云承認紀行詔者父詔其子也紀行者撰此
文也手自注石者書此文於石也碑雖不列書
撰人姓名而書與撰皆出諸其子此又一例也

碑紀冢地例

隸續載真道冢地碑真道自紀其市地廣袤之數誠
約後世取土方隅但得宿山居畱不得爭訟舍地怖
之以冥誅勸之以崇孝足見其時已惑於風水之說
而諄諄若此然較之晉太康瓦剝紀紙錢之數以買
地於土公者猶為近理也

真道冢地殘碑

此冢政乎下缺欲負冢土勿取冢地中法取東吉利

慎勿取西北土也

延熹五年七月中旬真道字直中以錢八千從有

親真教字政直直弟政升升二從弟漢宗市冢地
連隨地 廣廿二丈內人北行廣皆如前錢付畢
此子孫但得宿山居畱不得爭舍地爭訟天帝誅
絕勉崇孝道先人之約 不得違犯 諸存子孫
取出卽不利後冢東行廣五丈北行不得作冢
可示後世 後世作冢從此冢後併墳北行門出
西缺地也

碑紀產業例

鄭子真宅舍殘碑雖缺蝕不具首尾而所列宅舍十
一區各書其直又云妻無嫡嗣又云春秋之義五讓

爲首所列官名有郎中賊曹掾史似是其親物故議
立嬰孺官爲檢校而勸以息爭窒訟之義始官所立
碑也金廣延母徐氏紀產碑徐氏自言少入金氏門
勤苦成家有子蚤亾立從孫爲後從孫又亾先嘗分
業以畀庶孽子雍直別居在外而雍直蕩盡至是復
析其財以付雍直慮其爲媿姪之害也蓋嫠老自傷
臚紀刻石此私立之碑也詩曰君子有穀詒孫子而
顧有多積財焉者或損其志或益其過漢末人心風
俗視今爲厚而已切切憂危有如是矣烏虜

鄭子真宅舍殘碑

所居宅舍一區直百萬 故鄭子真地中起舍一

區作錢 故呂子近樓一區五萬 故像樓舍一

區二萬五千 子信舍一區萬 熹平四年缺月

丁酉朔

金廣延母徐氏紀產碑

元和元年五月中旬金廣延母自傷紀 永壽元

年出門託軀金掾季本 子男恭字子壽年十八

收從孫即廣延立以為後年十八娶婦徐氏弱

冠 終歿五內摧碎又少入金氏門承清儉之後

耕殖陝少 夫婦勤苦積入成家季本生平素

以奴婢田地分與季子雍直各有邛域 蓄積消

滅責負弄亾 三分屋一才得廿一萬六百 故

文進升地一町直三萬五千 子叔地一町直

去雷之後悉以歸雍直

案二碑皆殘剝僅節取其大略季本之子金恭有
闕有碑亦漫漶不可究知其人在當日似亦溫飽
之家而三分其屋才直廿一萬有奇漢碑陰率錢
之數或百二百三百可見當時錢直重而用錢之
少如是也又案碑中稱季本平生宋李清照金石
錄敘每稱趙明誠為德甫婦字其夫蓋亦古例也

碑載世譜例

孫叔敖後碑所載自楚相以下是譜其子孫之世也

趙國相雖勸闕文所載自高祖父以下是譜其祖宗

之世也漢碑敘人之祖父子孫都不書名諱惟此書之詳蓋又借石刻以存其世系也雖勸事迹略弗具與孫叔敖不同者蓋此題闕之文非墓道之碑與邛中之銘耳

孫叔敖碑陰

相君有三嗣長子卽封食邑固始少子在江陵中

子居三缺虛襲缺三業績材二宗則其苗胄也相

君卒後十有餘世有渤海太守字武伯武伯有二

子長子字伯尉少子字仲尉仕郡為掾史伯尉有

一子字世伯舉江夏孝廉城門侯仲尉有二子長

子字孝伯荊州從事弟世信仕缺二掾功曹會平

哀之閒宗黨為賊寇所散世伯孝伯世信各遺一

子財八九歲微弱不能仕學世伯子字子仲治產

於續虛有六男一女大子字長都次子蘭卿次弟

字仲陽次弟字叔通次弟字衛公次弟字劉卿此

續宗六父也孝伯子字文缺亦不仕學治產於材

虛亦有六男一女大子字惠明次弟字次卿次弟

字聖公次弟字稚卿次弟字彥卿次弟字少都此

材宗六父也世信一子相承季陵文卿孝公此缺

虛一父別其高祖與材高祖父親兄弟孫氏宗族

別錄譜記也

案隸釋碑中續字即繚字

漢故趙國相離府君之闕

高祖父諱竇字伯著孝廉河南令侍御史九江太

令字缺三君子望字伯桓右校令望子陟孝廉胸忍

弟勸字叔缺孝廉成皋令趙國相勸子煜字稚缺

孝廉資中長江令字缺三都尉自右校君以舊墓在

水闕而墳墓多地勢字缺五斯造墳階樹碑銘至趙

國府君在官五載莅政清平有甘棠之化年卅五

卒於官故吏民漢中太守邯鄲字缺四等慕戀恩德

刊石稱頌焉

案離府君闕中所敘孝廉者出身之資也侍御史

九江太守者所歷任也即為後世書

官而兼紀

又案孫根碑陰二百四十四人皆同姓異姓十之

一始孫根後裔自譜其名於上世之碑陰王劉數

有題名別無詞句故不錄

有紀無銘例

漢碑大都有銘然亦有無銘者高睽碑是也此後人

記體所出故今亦例之

益州太守高睽修周公禮殿記

漢初平五年蒼龍甲戌缺天季月修舊築周公禮殿始自文翁應斯鑿度開建畔宮立堂布觀廟門相鉤窗戶蔓延公辟相承至於甲午故府梓潼文君增造吏寺二百餘閒四百年之際變異蠶起旋機離常玉衡失統強桀并兼人懷僥幸戰兵雷合民散失命烈火飛炎一都之舍官民寺室同日一朝合為灰炭獨留文翁石廟門之兩觀禮樂崩但風俗混亂誦讀已絕倚席離散夫禮興則民壽樂興則國化郡將陳留高君節符典境迄斯十有三載會直擾亂苦慮匡救濟民塗之閔斯邛虛缺三

冠學者表儀

字缺四

大小推誠興復第觀八音克諧

鬼方來觀為後昌基

案華陽國志文翁為蜀郡守造講堂作石室一名玉堂安帝初堂及寺舍並災惟石室獨存至興平元年太守高朕於玉堂東後造一石室為周公禮殿又案文參字子奇梓潼人平帝初用為益州太守不從王莽公孫述光武嘉之篇內文君疑即其人甲午建武十年也初平五年改元興平而蜀猶未知古者以周公為先聖孔子為先師故學必祀周公唐開元以後始廢

有頌有詩例

前為敘後為銘此是唐以後例耳漢碑或銘後有敘或辭後有亂亦不論有韻無韻隨所命名了無定著鄙閣一篇系其詩於銘後又別行刻年月仇審等題

名五行其曰從史缺字漢德為此頌故吏下辨缺子長書此頌隸釋以漢德為仇靖之字子長為仇紼之字蓋宋時猶未缺故洪瞻其名如此書人撰人各自分標此亦後人例所從始

李翕析里橋郟閣頌

惟斯析里處漢之右谿源漂疾橫注於道涉秋霖漉歎溢缺滔濤波滂沛激揚絕道漢水逆讓稽滯商旅路當二州經所汙沮沮縣士民或給州府休謁往還恒失日晷行理咨嗟郡縣所苦斯谿旣然郟閣尤甚緣崖鑿石處隱定柱臨深長淵三百餘

丈接木相連號為萬柱過者慄慄載乘為下常車迎布歲數千兩遭遇隕納人物俱墮沉沒洪淵酷烈為禍自古迄今莫不創楚於是太守漢陽阿陽李君諱翕字伯都以建德三年二月辛巳到官思惟惠利有以綏濟聞此為難其日久矣嘉念高帝之開石門元功不朽乃俾衡官掾下辨仇審改解危殆即便求隱析里大橋於二乃造校致攻堅缺字二巧雖昔魯班亦莫擬象又釋散關之嶮潔從朝阻平燥減西缺二高閣就安禦之石道禹導江河以靖四海經紀厥績乂康萬里臣缺三勒石

示後乃作頌曰

字缺四降茲惠君克明俊德允武允文躬儉尚約化

流若神慶岷如字缺三平均精通昊穹三納符銀所

歷垂勲香風有鄰仍致瑞應豐稔字缺五樂行人夷

欣慕君靡已乃詠新詩

字缺四今坤兌之間高山崔嵬兮水流蕩蕩地既靖

碩兮與寇為鄰字缺六以析分或失緒業兮至於困

貧危危累卵兮聖朝閔憐髦艾究字缺兮乃字缺五救

傾兮全育字缺遺劬勞日積兮惟惠惟勤黃邵朱龔

兮蓋不字缺四充盈兮百姓歡欣僉曰太平兮文翁

復存

建甯五字缺二月十八日癸字缺下

時衡官字缺三仇審字孔信

從史位字缺四字漢德為此頌

故吏下辨字缺三子長書此頌


時石師南字缺四威明

案碑後衡官下缺當是掾下辨三字從史位下缺
當是下辨仇靖四字下辨下缺天下碑銘以為仇
紉字子長歐陽集古
錄目亦謂是仇紉書

有銘有重例

開母廟石闕銘其前文四言十九韻後綴舌曰六言

騷辭體十一韻是漢人於銘後自有重也碑既剝蝕不可讀已撮其略在前且如此類者正多故不具錄



碑版文廣例卷二

碑版文廣例卷三

長洲王芭孫念豐輯

漢

以文爲誄以頌爲敘例

生曰頌歿曰誄古今通例也漢校官碑則以前半敘事之文目曰誄後半有韻之文目曰敘碑列丞尉曹掾姓名不加故字其立於潘君在位之日無疑而大書之曰誄碑首紀年曰漢三百八十有七載統前漢言之碑尾紀年曰光和四年十月己丑朔廿一日己酉案是年十月非己丑朔己丑朔者閏十月也而不

書閨皆漢碑之變例也文中以蒸黎為黎蒸亦昌黎
倒押玲瓏參差之所自來

案黎蒸所見亦不止此一碑廣漢屬國侯李翊碑至以於陵為陵於倒押趨韻自漢已然

校官之碑

蓋漢三百八十有七載字缺三于字缺二銘功著斯金

石其誄曰溧陽長潘君諱乾字元卓陳國長平人

蓋楚太傅潘崇之末緒也君稟資南缺之禱字缺三

德之絕操髻髦克敏缺學典謨祖講詩易剖演奧

藪外覽百家眾雋挈聖抱不測之謀秉高世之界

屈私趨公即仕佐上郡位既置孔武剋箸疾惡義

形從風征暴執訊獲首除曲阿尉擒姦剗猾寇息

善歡履孤竹之廉蹈公儀之絜察廉除茲初厲清

肅賦仁義之風字缺三之迹垂化放乎岐周流愛雙

乎字缺二親賢寶智進直退隱布政優優令儀令色

獄無呼嗟之冤野無叩胸之結矜孤頤老表孝貞

節重義輕利制戶六百有無正繇不責自畢百姓

心歡官不失實於是遠人聆聲景附樂受一廬既

來安之復役三年惟泮宮之教反失俗之禮構修

學官宗懿招德既安且禦于侯用張籩豆用陳發

彼有的雅容缺閑鐘磬縣矣于胥樂焉乃作敘曰

翼翼聖慈惠我黎蒸貽我潘君平茲溧陽彬文烈
武扶弱抑彊斬刈勍雄流惡顯忠咨疑元老師賢
作朋修學童冠琢質繡章實天生德有漢將興尚
旦在昔我君存今卽此龜艾遂尹三梁永世支百
民人所彰子子孫孫俾爾熾昌

丞沛國銍趙勲字曼伯左尉河內汲董竝字公房
右尉豫章南昌程陽字孝遂

時將作吏名戶曹掾楊淮議曹掾李就議曹掾柏
檜戶曹史賀缺從掾位侯祖主記史吳超門下史
吳訓門下史吳翔門下史時球

光和四年十月己丑朔廿一日己酉造

誄後有亂亂後有銘例

景君碑竟失載其名氏邑里漢碑頗載卒年月日而
此亦未載非碑有缺也其文前有誄曰後有亂曰雖
已沓出然漢人猶有此例也今題其額則曰銘著於
篇則曰誄鑿柄方圓漫不相入碑陰題名五十四人
末又總之曰行三年服者八十七人是此外守墓持
喪而未列名者正多也碑陰之尾別綴二行韻語十
八句著其立石之由皆他碑所無惟北魏司馬景和
妻墓誌銘額稱銘而文稱頌與此相類以其一篇之

石片履位
中槎枿百出交格難明其杼辭亦不敵他碑始當日
故吏諸生之不篤於文者爲之動皆非法故特舉之
此不可爲例之例也

北海相景君銘

惟漢安二年仲秋

缺二字

故北海相任城景府君卒

歎歎哀哉國

缺二字

寶英彥失疇列宿虧精晚學後

時於何穹蒼布命授期有生有死天實爲之豈夫
仁哲攸剋不遺於是故吏諸生相與論曰上世羣
后莫不流光缺於無窮垂芬耀於書篇身歿而行
明體亾而名存或箸形像於列圖或繫頌於管絃

後來詠其烈竹帛敘其勲乃作誄曰

伏惟明府受質自天孝弟淵懿帥禮蹈仁根道核
茲抱淑守真晶白清方剋已治身實柔實剛乃武
乃文遵考孝謁假階司農流惠元城興利惠民強
禦改節微弱蒙恩威立澤宣化行如神帝嘉厥功
授以符命守郡蓋州路遐戀親躬作遜讓夙宵朝
廷建策忠讜辨秩東衍璽追嘉錫據北海相部城
十九翱翔歸向分明好惡先以敬讓殘僞易心輕
黠踰竟鳴臬不鳴分子還養元元鰥寡蒙祐以嚮
蓄道修德缺祉以榮紛紛令儀明府體之仁義道

術明府膺之黃朱邵父明府三之台輔之任明府
 宜之以病被徵委位致仕民缺思慕遠近搔首農
 夫釋耒商人空市隨輦歛淚奈何朝廷奪我慈父
 去官未旬病乃困危珪璧之質臨卒不回歔缺賈
 絕奄忽不違孝子慙慙顛倒剝摧遂不剋寤永潛
 長歸州里鄉黨隕涕奔哀故吏忉忉歔歔低徊四
 海冠蓋驚慟傷衷大命所期實惟天授明主設位
 明府不就臣子欲養明府弗畱歔歔哀哉
 亂曰考績幽安字缺三兮字缺四翔議郎兮再命虎將
 綏元元兮規策矩謨主忠信兮羽衛藩屏撫萬民

兮字缺四恩字缺二兮宜參鼎輔缺幹楨兮不永糜壽

棄臣子兮仁敷海外著甘棠兮缺石勒銘缺不亾

兮

案碑陰自故中部督郵都昌羽忠起至故小吏都
 昌張亮止題名者五十四人各書其字無輸錢數
 凡四列各十八行惟第四列二
 行末二行韻語行四十二字
 行三年服者凡八十七人

豎建字缺二惟故臣吏慎終追遠諒闇沈思守衛墳

園仁綱禮備陵成宇立樹列既就聖典有制三載

已究當離墓側永懷靡既文不可勝以義割志乃

箸遺辭以明厥意魂靈遐顯降垂嘉祐

案兩漢金石記碑陰後文監建下缺二字其上
字或作馬非也似是聿字說文余律切所以書也
楚謂之聿吳謂之不律燕謂之弗從聿一聲其下
一字或是岩字然未可臆定要之此二字上言筆
之於書下言
銘之於石也

韻語敘之又以韻語為辭例

漢去古近散文亦參錯用韻費鳳張表諸碑以四言
五言句為敘七字句為辭費鳳碑已別見今錄張表
一碑其文亦漢碑之卓麗可觀者也

冀州從事張表碑

君諱表字元異系帝高辛爰暨后稷張仲孝友雅
藪攸載天挺畱侯應期佐治興漢龍興誕發神謀

君其九也懿烈純德繼踵相承于來我君亦邦之

雄兼才伯知高朗令融該覽羣緯靡不究窮初仕
郡為督郵鷹撮霆擊威德日隆糾剔苛忒抵拂頑

凶屬城祗肅千里折中入為主簿含謨吐忠委蛇

公門蹇蹇匪躬將美匡醜對颺休光歷五官掾功

曹山缺時行貢真絀偽遏漸防萌后臧其勲俾守

黎陽正身帥下神化缺通方伯述職嘉君義綱旌

命馭任北國用禦遂播芳譽有馥其馨當陟台階

注記在庭穎渠未合實命不同度時否泰盤桓利

貞缺歸斯服舍之則藏退修陶父怡志岳陽恬靜

湛泊匪惶時榮春秋六十四以建德元年三月癸巳寢疾而終其年十有一月丙寅克葬僉以為洪德宜演述億載彌以新功烈不讚紀後來無所聞於是刊石勒銘以示後昆其辭曰
於穆君兮煥流芳闡洪軌兮休烈彰令德攸兮宣重光仕郡州兮迪民康宜王臣兮為棟梁禦不淑兮降淪霜凋朱華兮殲彥良伊喆人兮壽不將世雖短兮名攸長位雖少兮功悠揚伐松柏兮構斯堂鏤金石兮奠不亾萬子孫兮永烝嘗

頌後題名題名後又綴騷辭例

唐扶頌長篇委悉所述世系兼及從父從兄弟又辭曰之下直接不別起紀年之下直接題名而題名之後又綴騷辭碑陰無刻而碑首之旁有刻皆漢例之異者

漢故成陽令唐君頌

君諱扶字正南潁川鄆人也其先出自慶都感赤龍生堯王有天下大號為唐治致雍熹尊天重民禪位虞缺光受茅土通天三統苗胄枝分相土脈居因氏唐焉累世含祚受天之祐允嗣彌光為漢台輔君父孝廉郎中蚤卒季父蜀郡蜀郡從弟會

稽會稽從弟南陽君從弟東萊太守南陽弟司空
公在朝透隨正色竭忠爲國討暴六侯俱封受土
襲爵金縉十三君繼厥緒少有岐嶷耽道好古敦
書詠詩綜緯河雒底究羣典弋紐士進守舞陽丞
弱冠守昆陽尉潁陽令隱練州郡所臨有迹帝嘉
其德特拜郎中察能治劇除豫章鄖陽長夷粵跋
扈忤強難化君奮威颺武視以好惡蠻貊振疊稽
潁帥服缺上前逋千有餘萬盜賊衰息境界晏然
三載有成州郡爭表遷成陽令承先聖之宏規見
讚像之高蹤遂興無爲之治優賢颺歷表善絀惡

遵九德以綏民崇晏安之惠康風移俗易莫不革
心朝有公綽家有參騫分陝之治優隆於君追惟
堯德光被之恩依陵亳廟造立授堂四遠童冠握
衣受業著錄千人朝益葺習衍衍閭閻尼父授魯
曷以復加靈祇瑞應木連理生白兔素鳩游君園
庭蕩蕩之治莫能名焉三司察功朝廷審真以君
威恩竝流文武兼興東萊海濱須君以嚮詔書換
君昌陽令吏民慕戀士女惟艱捺牽君車輪不得
行君臣流涕道路琅玕迫有詔命靡由復還於是
故從事仲字仲授張躬萬龍督郵仲規郡掾閻葵

缺 仲璉處士王 董頴閻葵班等乃共刊石樹頌

歌君之美其辭曰赫赫唐君帝堯之苗氏族不一

各任所安本同末異蓋謂斯焉君體煥炳有芬有

馨如山如岱崇如不傾如 缺 如海澹如不盈惟直

如矢秉銓據衡在朝肅肅閨門雍雍廉踰伯叔絜

如珪璋賦政於外爰及鬼方匯夷來降寇賊逆亾

黎庶攸禦黔首歡康以德綏撫宣恩六陽以仁恤

弱以義抑彊恩由春夏威如秋霜賞罰分審白黑

著明憂者閔穉不侮寡矜耽樂道術咀嚼七經五

六六七訓導若神接下施與投財如指吏服其德

民歸其恩父父子子君君臣臣不帥自舉不拘不

煩囹圄空虛國無佞民德及草蟲澤流無垠蝟飛

蠕動咸賴我君顯顯令稱德音常存

光 和六年二月壬午朔廿五日丙午處士閻葵班

戀念唐君為立碑 缺 班字宜高修春秋嚴氏大子

讓公謙襲班業次龔叔謙治尚書歐陽次廉仲絜

小夏侯

耽經史兮履仁義內和睦兮外奔赴以家財兮讚

君號諸學 缺 兮相埤助垂後世兮不之譽

案隸釋授堂者講授之堂五六六七者用曾點冠

者童子之文也司空者名珍熹平二年自太常拜

中常侍唐衡之弟也延熹中衡與宦官共誅梁冀受封世謂之五侯即討暴俱封事也匪夷匪澤之盜也廉踰伯叔即夷齊也又有題名云成陽令穎川穎陰高諱某成陽丞廣陽蒯史珍瑋寶刻於碑首之

一碑作三文分敘例

孟郁碑以永康元年春陽為沴行縣詣堯廟請雨獲應遂繕修陵殿成陽令丞掾史佐之仲氏宗家又相與共作石礪階陛欄楯九月之閒詔書三祠立表示後雖一碑而文自作三節敘之第一節專頌帝堯第二節頌守令丞尉及其崇奉先聖之誠第三節敘仲氏宗家以周之遺苗擇居成陽與其得姓業儒之美蹊逕歷然并畫區分與他碑錯雜無次者不同此又一例也今錄其第一節後二節多缺字語可意得更著

濟陰太守孟郁修堯廟碑

漢永康元年缺月字缺二惟昔帝堯聖德慶苞因號

赫赫蕩蕩垂基赤精之胃為漢始別陵氣炎煜上交倉元巍巍之盛乾坤見徵故修宗殿長吏奉祠三牲粢饌獻珍於時表著燿銘宣颺厥休乃招禎祥萬缺是來鴻名遂獻傳於千秋

詩有三章九章例

劉熊碑系詩三章張公神碑系詩九章唐王建題劉
碑曰蒼苔滿字土埋龜風雨消磨絕妙辭不向圖經
中舊見無人知是蔡邕碑宋洪氏辨此非中郎筆且
其文有七業勃然而興咸居今而好古不成句其詩
則曰有父子然後有君臣文律如此難以謂之絕妙
辭矣張公神碑以散敘起入四字銘銘後又記謁者
李君好鄭長之文鄭因作歌九章其辭依放離騷稱
及夫人三女亦大招小招遺意也二碑以文律言之
雖皆不合其驅辭命句亦不勝顛躓然皆漢碑中殊
體爲後來碑版作迎送神歌所自起故例之

酸棗令劉熊碑

君諱熊字孟缺廣陵海西人也厥祖天皇大帝垂
精接感篤生聖明子孫享之分源而流枝葉扶
疏出王別因受爵列土封侯載德相繼光武皇
帝之因廣陵王之孫俞鄉侯之季子也誕生昭明
岐嶷踰絕守約履勤行修言道京夏莫不
師印六籍五典如源如泉既練州郡卷舒委隨
出省楊土流化南城政猶北辰衆星所從三祀有
成來臻我邦政教始初慎徽五典勤恤民殷
仁恩如冬日威猛烈炎夏貪究革情清修勸慕德

惠潛流望芳旁布 帥厲後學致之雍泮草上之
 風莫不嚮應 七業勃然而興咸居今而好古雖
 未盡道善必有所由處民之秉彝實我劉父其人
 魯無君子斯焉取旃允我劉父言善誘人講禮習
 聆匪徒豐學 神民協興兩不相傷故德友歸焉
 自古在昔先民有作洪勳則甄盛德 缺刻表諸來
 世 恨念烝民勞苦不均作為正彈造設門更
 積和感暢歲為豐穰賦稅不煩寔我劉父吏民愛
 若慈父畏若神明 誠宜褒顯昭其憲則乃相與
 咨度諏詢采撫謠言刊 缺詩三章其辭曰

清和穆鑠實惟乾坤惟嶽降靈篤生我君服骨睿
 聖允鍾厥醇誕生岐嶷言協 缺墳懿德震耀孝行
 通神動履規繩文章彪績成是正服以德道民
 有父子然後有君臣理財正辭束帛 缺 夢刻
 像鶴鳴一震天臨保漢實生 缺勳剛試賦授夷夏
 已親嘉錫來撫潛化如神其神伊何靈不傷人
 猗與剛哲秉道之樞養 缺之福惟德之隅淵乎其
 長煥乎成功 缺暇民豫新我 缺通用行則達以誘
 我邦賴茲劉父用說其蒙澤零年豐黔首歌頌

張公神碑

惟和平元年正月字缺二朝歌長鄭柳造缺張公建

缺良缺之山運置碁陽案此碑以淇為碁刊鑿琢摩立左

右闕表神道缺豎碑廟堂之前到五月字缺二乃成

長字缺二之銘勒神懿光祕後昆其辭曰

於穆張公合和太清受符皇極乾剛坤靈何天之

休元亨利貞 嶽朝碁陽厥土坦平芝草茂木瀟

瀟滋榮 詔命有司祭以中牲歲聿再薦公其饗

零興來億載歷數萬君 國無灾寇屢兆豐年皇

帝眉壽千祿於天牧守皆升握台輔辰長與丞尉

超遷相因 監犁陽營謁者李君畏敬公靈好鄭

長文徹奉佐工悃愾勤缺吏字缺三熹且惶作歌

九章達李君志頌公德芳其辭曰

碁水湯湯揚清波東疏缺折缺於河字缺五朝歌縣

以絜靜無穢瑕公缺守相駕蜚魚往來悠忽遂嬉

娛祐此兆民嚮厥居

出自碁字缺四松柏鬱茂蘭公字缺二神往來乘浮雲

種德收福惠斯民家饒戶富無缺貧置界寂靜和

睦缺

朝歌蕩陰及犁陽三女所處各殊方三門鼎列推

其鄉時攜甥幼歸候公夫人字缺三容字缺五饗豆觴

穆風屑兮起壇旁樂吏民兮永未央

鹿呦呦兮

字缺二

庭文樂樂兮

字缺三

飲清泉兮

字缺三

見缺伏兮不駭驚惟公德兮之所嚮上陵廟兮助

三牲天時和兮甘露冷日番

字缺

兮無虧傾

字缺二

蜚兮朱鳥棲

字缺二

榮兮鳴喈喈鸛巢兮乳

徘徊給御卵兮獻於西惟公德兮之所懷

池水字缺兮釣臺粲四角樓兮臨深澗魚岌岌兮踊

躍見振鱗尾兮游盱盱時釣取兮給烹獻惟公德

兮之所衍

栗蕭竹兮鼓鋪陳新美萌兮香苾苾蕙草生兮滿

園田競蒼茗兮給萬錢惟公德兮之所字缺

門堂鬱兮文耀光公神赫兮坐東方明暴視兮儼

印印夫人字缺女兮列在旁

君處北兮從官字缺車騎絡繹兮交錯重乘輓輶兮

駕蜚龍驂白鹿兮從僊童游北嶽兮與天通

元碑既立雙闕建兮

字缺四

大路畔兮亭長闈

字缺二

扞難兮列種槐梓方茂爛兮天下遠近字缺不見兮

公神日箸聲洞徧兮字缺二乾坤傳億萬兮

案隸釋朝歌長鄭柳為張公建闕作碑監黎陽營

謁者李君好鄭之文因又作歌九章石敝剝僅能

辨其梗概其辭依放離騷頗亦適雅可觀漢志注

石片唐例
謁者監之余案前三章放漢樂府中四章乃放騷體末一章又放三百篇四始六義參錯襍出其文朴雅漢碑中所不多見也

碑辭簡質例

漢碑局製相同千篇一律惟其去古未遙氣多醇厚辭多爾雅至於擬人不倫浮夸溢美則人人而然蔡中郎所繇發歎於郭有道也然亦有簡質矜貴者如孔謙夏承諸碑其文亦自高出一時唐宋禊家倣之者多也

孔謙碣

孔謙字德讓者宣尼公廿世孫都尉君之子也幼

體蘭石自然之姿長膺清妙孝友之行祖述家業修春秋經升堂講誦深究聖指弱冠而仕歷郡諸曹史年卅四永興二年七月遭疾不祿

淳于長夏承碑

君諱承字仲充東萊府君之孫太尉掾之中子右中郎將弟也累葉牧守印綬典據十有餘人皆德任其位名豐其爵是故寵祿傳於歷世策勲著於王室君鍾其美受性淵懿含和履仁治詩尚書兼覽羣藝靡不尋暢州郡更請屈己匡君爲主簿督郵五官掾功曹上計掾守令冀州從事所在執憲

彈繩糾枉忠潔清肅進退以禮允道篤愛先人後
已克讓有終察孝不行太傅胡公歆其德美旌招
俯就羔羊在公四府歸高除淳于長到官正席流
恩褒善糾姦示惡旬月化行風俗改易輻軒六轡
飛躍臨津不日卽月昊天不弔熾此良人年五十
有六建德三年六月癸巳淹疾卒官嗚呼痛哉臣
隸辟踊悲動左右百姓號咷若喪考妣咳孤憤泣
惻怛傷摧勒銘金石惟以告哀其辭曰

於穆皇祖天挺應期佐時理物紹縱先軌積德勤
約燕於孫子君之羣戚竝時繁祉明明君德令問
不已高山景行慕前賢列庶同如蘭意願未止中
遭冤天不終其紀夙世實祚蚤喪懿寶抱器幽潛
永歸蒿里痛矣如之行路感動黨魂有靈垂後不
朽

敘略而銘詳例

宋以後碑大抵敘長而銘短唐人卽不盡然漢平輿
令薛君碑敘止三十六字系之長銘然敘事綦詳而
失載名諱蓋漢人疏略文律未具失載名諱亦不止
此一碑耳

漢故平輿令薛君碑

惟延熹六年春二月平輿令薛君卒烏虜哀哉吏民其咨咨君之德乃建碑石於墓之側其辭曰於皇降德於茲我君我君屢祖官有世功乃侯於薛苗允枝分作漢卿尹七世相承君之懿德性此淑真如水之絜如玉之堅靡術不綜罔禮不尊忻忻之至三族以敦英名委質宣昭令聞升州入宰晒乎其勲莅政以吾爛而有成遷典平輿匪威匪仁寬猛以濟藐矣惟清化未期月邁此篤禦吏民穆卜嘗禱屏營昊天不弔不憇遺君晡夢徂命不可攀國人巷哭若喪厥親鬢白號慟童穉踴呻嗟嗟酷痛如何昊乾靈柩旋歸赴此窆窀懷懷士雋惻爾酸辛姻族畢至素縞填庭於是吏民乃復追歎君初舉孝三署播名爰佐戎缺來臨汝南剖符之貳千里同塵料揀真實好此徽聲貢奇達異迥酌清英遺風令歌永矢不誼云君回軫誰不懷歡缺竟迷流乃隕乃顛如可贖也人百其身昔邵臨國民謂之父今也薛君追蹈厥緒身歿言存是謂不朽於我吏民悲慕罔已刊石紀銘永昭於後

碑後載贈詔例

歿而有追贈者唐宋敘其詔於文中漢則刻其詔於

碑後中常侍樊安碑書卒年卒日書賜弔賜贈書其子名皆漢世所寡有此雖廟碑而墓碑之法已具爲唐人所本嗣以來有刻諭祭文及誥敕墓上皆此例也

中常侍樊安碑

君諱安字子仲南陽湖陽人也厥祖曰仲山父翼佐周宣出納王命爲之喉舌以致中興食采於樊子孫氏焉亦世載德守業不愆在漢中葉篤生碩媛作合南頓實產世祖征討逆畔復漢郊廟而樊氏以帝元舅顯受茅土封寵五國壽張侯以功德

加位特進其次竝以高聲處卿校侍中尚書據州典郡不可勝載爲天下著姓君幼以好學治韓詩論語孝經兼通記傳古今異義甘貧樂約意不回貳天姿淑慎稟性有直秉操不移不以覲貴世政促峻邑宰寡識慢賢役德被以勞事然後慷慨礮憤宦於王室歷中黃門冗從假史拜小黃門小黃門右史遷藏府令中常侍其事上也貞固密慎矜矜戰戰作主股肱助國視聽外職不誣內言不泄爲近臣楷模是以兄弟竝盛雙據二郡宗親賴榮年五十有六以永壽四年二月甲辰卒朝思其忠

追拜騎都尉寵以印紱策書褒歎賻贈有加嗣子
遷實以幼弱夙敘王爵而喪所天禮備復位以延
熹三年冬十有一月自上烝祭乃尋惟烈考恭修
之懿勒之碑石俾不失墜其辭曰
嗚嗚我君帝躬是翼王事多難我君是力秉此小
心以亮皇職惟帝念功庸以輿服大命傾賈魂神
僊伏龜艾追遷用光其德藹藹遺稱作呈作式勒
銘茲石垂示罔極勲名不刊永昭千億
制詔中常侍樊安宿衛歷年恭恪淑慎嬰被疾病
不幸蚤終今使湖陽邑長追號安爲騎都尉贈印

綬魂而有靈嘉其寵榮烏呼哀哉

延熹元年八月廿四日丁酉下

碑後坵紀帝謚例

漢桓帝以討伐之功獲謚爲桓馮緄不過當時命將
之一而爲緄作碑者遂以帝謚書之碑後殊非體要
碑載緄爲廷尉時奏中臣子弟不宜典州意其人有
經國之用非獨虎臣之選也緄終廷尉而碑額尚題
將軍重故階之例耳

漢故車騎將軍馮公之碑

君諱緄字皇卿幽州君之元子也少耽學問習父

業治春秋嚴韓詩倉氏兼修大杜弱冠詔除郎還
更仕郡歷諸曹史督郵主簿五官掾功曹舉孝廉
除右郎中蜀郡廣都長遭直荒亂以德綏撫政化
流行到官四載功稱顯著郡察廉吏州舉尤異遷
犍爲武陽令誅絕彊豪以公去官部廣漢別駕治
中從事辟司空府侍御史御史中丞督使徐揚二
州討賊范空朱生徐鳳馬勉張嬰等坐迫州郡進
兵正法復辟司徒府廷尉左監正治書侍御史廣
漢屬國都尉隴西太守坐問吏辜旬不分去官以
羌駭動爲四府所表復家拜隴西太守上病辟同

產弟徵議郎復治書侍御史尚書遼東太守廷尉
太常車騎將軍南征五谿蠻夷黃加少高相法氏
趙伯潘鴻等斬首萬級沒溺以千數降者十萬人
收逋寶布卅萬匹不費官財振旅旋師臨當受封
以謠言奏河內太守中常侍左悺弟坐遜位拜將
作大匠河南尹復拜廷尉表荊州刺史李隗南陽
太守成晉太原太守劉瓚不宜以重論坐正法作
左校後詔書特賞拜屯騎校尉復廷尉奏中臣子
弟不宜典牧州郡獲過左右遜位永康元年十二
月夢一要金紫十二銀艾七墨綬將軍體清守約

既來歸葬遺令墳塋取藏形而已不造祠堂可謂
履真者矣恐後人不能紀知官所更歷故刊石表
績以誌來世孝桓皇帝以命將軍討此疆夷有桓
桓烈缺之姿因謚爲桓

案此碑將軍字提行而孝桓字轉不
提行亦不空缺蓋漢例往往有之

碑後附紀他人事行例

綏民校尉熊君碑所述子弟名字官階志操皆其蚤
亾者也因其已亾無所附麗故入之文中碑尾又誌
文春杜暉兩人學行壽年洪氏謂皆同郡盛德之士
作文者惜其湮墜故附之左方是卽碑陰紀先友之
前導矣

綏民校尉熊君碑

君諱缺字子其先蓋帝顓頊高陽氏之苗裔周
有天下成王建國熊繹封楚慶祚缺三於缺二亦

世載德廿餘代君高祖父籌靈王元孫大漢龍

興曾祖父範督郵守長祖父師君父喬字

漢舉更督郵主簿君治歐陽尚書六日七分少

佐州郡立朝審愕孔甫之操以忠孝稱更諸曹史

舉孝廉上計掾興平元年八月二十八日壬寅詔

書除補桂陽曲江長旣敦文武爲政果達臨化宣

惠所去遺績視事六載 鎮南將軍荊州牧侯山

陽劉君諱表字景升以君稟純履正出自帝宇緬

榮輕舉厲志疾邪牧侯字缺二爲民所安命還拜綏

民校尉領曲江長復莅五年政隆上古流移歸懷

繼負而至吏民作誦曰彼熊父兮解我患害安我

缺移遭母憂缺二去官陽九應會王室威缺君功

顯宿箸海內諮美拜騎都尉受命立灌陽縣督長

六載無爲而治 君春秋七十有一以廿一年三

月廿七日丙寅卒官吏民懷慕顧見農夫泣淚路

隅皆懷悽愴哀我惠君君同產弟望季公質性忼

慨史魚之直史功曹列掾督郵都梁長蚤終君長

子再孝存姿操敦良耽志好學博覽雅藝 三奏

辟召於州終昔周文公作頌宋成考父公子奚斯

追羨遺績紀述前勲於是刊碑以示後昆其詞曰

赫赫熊君遷基缺宇漢興伐項巡行南土顯封受

爵遂爾延祖紫葉休隆君匹其緒克明盛德字牧

城社所在有績龜銀之祚河雒挺錄爲國毗輔懿

懿其操穆穆其姿光光其行桓桓其威清虛澹泊

後嗣式敘冠秩之應實賴厥後昊天忽然枕榮終

祐喪我良則國失良輔其存也榮其亾也哀銘勒

金石歿而不朽靈也有知祐福子孫支干相生吉而無咎詩云嘉樂君子顯顯令德延於無極

追敘君兮懷純精名稱於州里兮樞機發動執忠

貞兮溷亂而不惑不枉身事汙君兮損土爵而進

退崇禮約行兮舉動而不跌遭濁而自靖兮泥而

不滓穢嗚呼君兮匪石是為州郡禮遇兮名貫於

四表德稱竝宣先兮賢比於前列卻畢之歎岐兮

束修稷由文武兮興後葉子孫殖兮世享祿龍潛

體於枯木兮就生存是以刊石兮為君立碑攬英

雄之迹兮以缺來詰嗣長基而廣宇兮後世無廢

違

故長沙茶陵長文春字季秋質操貞良慈仁汎愛

治天官日度風角列宿剛知聖術在官修德民歌

遺風春秋七十以道隕遷宗因不紀故為昭宣

故桂陽陰山豫章缺長重安侯相杜暉字慈明體

質因亮敦仁好道治易梁邱春秋公羊氏綜覽百

家無所不甄典歷三城居官清惠遺愛在民春秋

六十終族後缺述故因顯德以示來因

建安廿一年十二月丙寅朔一日丙寅太歲丙申

碑師壽陵程福造

案隸釋受命立灌陽縣是劉表初命熊君置此邑也綏民校尉亦表所置漢末諸劉在荆益專恣名官置邑皆不以告故史氏逸而不書

碑載書撰人姓名例

漢碑無書撰姓名者十之九其有列撰而不列書者卜允撰費鳳碑鄭彬撰張公神碑是也列書而不列撰者郭香察書華山碑紀伯允書武班碑是也然察書者察蒞其書非必郭香自為執筆惟郝閣頌分標仇靖為此頌仇縈為此書而西狹頌則又兼箸之曰仇靖書文書文云者揮翰遺辭一人為之也此後人結銜某撰某書或某撰并書例所自起

案書撰人錯雜題名之中自儕於眾此又漢例然也

李翕西狹頌

漢武都太守漢陽阿陽李君諱翕字伯都天姿明敏敦詩說禮膺祿美厚繼世郎吏幼而宿衛弱冠典城有阿鄭之化是以三剖符守致黃龍嘉禾木連理甘露之瑞動順經古先之以博愛陳之以德義示之以好惡不肅而成不嚴而治朝中惟靜威儀抑抑督郵郡職不出府門政約令行強不暴寡知不詐愚屬縣趨教無對會之事徼外來庭面縛二千餘人年穀屢登倉庾惟億百姓有藜藿麥五

錢郡西狹中道危難阻峻緣崖俾閣兩山壁立隆
崇造雲下有不測之谿阨崖促迫財容車騎進不
能濟息不得駐數有顛覆實墜之害過者創楚惴
惴其慄君踐其險若涉淵水歎曰詩所謂如集于
木如臨于谷斯其殆哉困其事則爲設備今不圖
之爲患無已敕衡官有秩李瑾掾仇審因常由道
徒鑿燒破析刻畝確嵬減高就埤平夷正曲押致
土石堅固廣大可以夜涉四力無壅行人懽踴民
歌德惠穆如清風乃刊斯石曰

赫赫明后柔嘉惟則克長克君牧守三國三國清

平詠歌懿德瑞降豐稔民以貨殖威恩竝隆遠人
賓服鑿山浚瀆路以安直繼而之迹奕世賴福
建甯四年六月十三日壬寅造時府

丞右扶風陳倉呂國字文寶

門下掾下辨李雯字子行故從事

議曹掾下辨李禦字仲齊故從事

主簿下辨李遂字子華故從事

主簿上祿石祥字元祺

五官掾上祿張亢字惠叔故從事

功曹下辨姜納字元嗣故從事

尉曹史武都王尼字孔光

衡官有秩下辨李瑾字璋甫

從史位下辨仇靖字漢德書文

下辨道長廣漢汁邠任詩字幼起

下辨丞安定朝那皇甫彥字子才

案此碑額題惠安西表四字此亦後人碑額別製四字例所始又案隸續西狹頌十九行行二十字未有一行書年月又有小字題名兩行低四字許又案後漢書皇甫規傳屬國都尉李翕多殺降羌倚恃權貴不尊法度規到官條奏其辜然則翕非良吏此掾史頌美之辭或有溢美者矣

選石重於書撰例

古人重選石故石能久存漢碑不列書撰人姓名而

市石募石石師石工必謹書之武梁祠堂碑稱孝子

仲章等竭家所有選擇名石南山之陽擢取妙好色

無斑黃良匠衛改彪文刻畫攄騁伎巧云云故累經

桑海而所刻至今可辨余嘗騎行燕趙間觀道旁碑

漫漶無字疑其古碑下馬視之乃乾隆閒刻耳遇有

摩挲積久光澤如鏡而筆畫仍在者必唐以前物若

攝山明僧紹碑虎邱經幢是也唐人亦重其事故魯

公至載石以行今則其傳絕矣雖精擇撰人書人匪

久旋滅所賴獨其人文集流行天地間耳偶讀樊敏

碑書人居石工之下雖燥固劉盛之子理不先父然

他碑之於石師石工亦不草草有感錄之

巴郡太守樊敏碑

君諱敏字升達犀祖宓戲遺苗后稷爲堯種樹舍
潛於岐天顧曹父乃萌昌發周室衰微霸伯匡弼
晉爲韓魏魯分爲揚充曜封邑厥土河南楚漢之
際或居於楚或集於梁君纘其緒華南西曷濱近
聖禹飲汝茹汭總角好學治春秋嚴氏經貫究道
度無文不睹於是國君備禮招請濯冕提綱傑立
忠謇有夷史之直卓密之風鄉黨見歸察孝除郎
永昌長史遷宕渠令布化二載遭離母憂五五斷

仁大將軍辟光和中京師擾攘雄狐綏綏冠履
同囊投効長驅畢志枕邱國復重察辭病不就再
奉朝聘十辟外臺常爲治中諸部從事舉直錯枉
覃思舊制彈鬻糾貪務鉏民穢患苦政俗喜怒作
律案臯殺人不顧猖獗告子屬孫敢若此者不入
墓門州里僉然號曰吏師季世不祥米巫死瘡續
蠢青羌姦狡竝起陷附者衆君執一心賴無滂恥
復辟司徒道隔不往牧伯劉公二世欽重表授巴
郡後漢中秋老乞身以助義都尉養疾閭里又行
褒義校尉君仕不爲人祿不爲己桓桓大度體臨

其首當窳台緄松僑協軌八十有四歲在汁洽紀
驗期臻奄智臧形凡百咸痛士女涕泠臣子褒述
刊石勒銘其辭曰

於戲與考經德炳明勞謙損益耽古儉清立朝正
色能無撓傾威恩御下持滿億盈所歷見慕遺歌
景形書載俊乂股肱幹楨有物有則模楷後生宜
參鼎鉉稽建皇靈王路阪險鬼方不庭恒戢節足
輕寵賤榮故缺大選而捐陪臣晏嬰邶殿雷侯距
齊非辭福也乃辟禍兮


亂日演元垂缺岳瀆缺兮金精大佐實生賢兮缺

欲救民德彌大兮遭偶陽九百六會兮當缺遐年
今遂逝兮歎嗟懷哉魂神缺兮

建安十年三月上旬造石工劉盛息懌書

案隸釋云敏嘗再表漢中其額仍以領校巴郡稱
之者朝無成命也二劉焉與璋也強藩擅命見幾
而作所云捐陪臣者不食二劉之粟也五五與費
鳳碑同謂二十五日也雄狐綏綏謂中官用事也

碑版文廣例卷三



碑版文廣例卷四

長洲王芑孫念豐輯

漢

一人兩碑例

碑非一人作為一人立也祝睦前碑直敘名字起後碑故吏王堂撰先後自敘起費鳳前碑其妻弟卜允撰先敘卒日起其別碑中表石勳撰自作詩敘起既入詩矣又不寫敘事於韻語之中別以散句參錯行閒倉卒莫尋其端緒其格甚奇前無所本後亦未有擬其制者今錄以示異劉寬二碑一故吏李謙等立

一門生郭異等立皆自寬名貫敘起不過李謙敘之
詳郭異敘之略雖詳略稍殊而杼軸無二非文家所
欲知不復著唐韓柳李宋歐曾王同時往往有分撰
一人事行者或誌或表互相遜避各有義灋漢則無
之也

山陽太守祝睦碑

君諱睦字元德濟陰已氏人也其先蓋高辛氏之
火正以能淳曜天地曰祝融遂獲豐阜之胙輝裔
昌遠大乃侯伯分仕諸夏鄭有祝聃者君其[允]也
君膺恢懿量在約淵澹潛心耽學該洞七典探蹟

窮神無物不辨

字缺

二

州郡以孝貢譽賓於王庭除

北海長史潁川郟令道濟以禮三載之後而民知
讓有恥且格君惟老氏名遂身退色斯翻翔紆精
衡門辟司空府北軍中侯拜大尚書尚書僕射
喉舌納言翼皇正樞遷常山相山陽太守齊和五
品崇化以寬昭德塞回不訓其仁抽拔隱伏缺賢
式禮缺二攸堪九功以著當享繁祿為帝幹楨年
六十有八延熹七年八月丁巳卒臨困紆續遺令
素櫬翼翼以席賻貲非禮壹不得犯存無玩飾止
導以儉所謂守終純固者已蓋銘功紀勲所以旌

往示來於是乃共登山鐫石刊勒鴻伐其辭曰

懿我君國之光履忠順闡道常升紫微平機衡統

興詠遺缺不稱馥垂令芳生見樂歿不忘名儷日

億載揚

祝睦後碑

故吏王堂等竊聞下有述上之功臣有敘君之德

自昔在前列莫不紀名於典缺六者故孔子曰民

人登祝上天歆焉用永其世而豐其年僚屬欽照

孰不咨賢代作頌曰伊余祝君兆自黎辛祝融苗

曹承獲禎慶光裔熾藐分仕六國張雄諸夏鄭有

祝聃者君其允也昔祖視湯湯治於梁洮顛自朔

家於濟陰君齟鬣入學修韓詩嚴氏春秋七典竝

立缺綜百家文豔彬或淵然深識泊然執守躬潔

冰雪介然清皓漸心於道通神達明無物不覽鄉

黨遂遂朝廷便便踐跣州郡階究右坐以孝譽舉

讚拜王庭除北海長史潁川郎令化行如風民應

如草三載考績名登明堂色斯舉矣退身衡門童

冠翔集耽經樂術潛神默記與俗殊好辟司空府

北軍軍中侯擢拜尚書尚書僕射七政館鑄佐輔

斗樞功冠帝庭懿德連優遷常山相山陽太守協
齊行律恢崇三樂追惟九思道闡泮宮埒庸攸同
溫化以禮率由舊章摘隱取伏訓承賢良國無珠
藏悉浴蘭湯壺林巨茂七子在桑乘蕢遠遜竟界
夷康休釐充缺功馨升揚當高紫祚為漢棟梁年
六十八寢疾不瘳延熹七年八月丁巳卒臨絕續
埃垂誨素棺蔽以葭蔕贈椁貽醢非禮之常一不
得當穀無珍玩歿就以約所謂守忠啟子其本也
善蓋彰功表勲所以煥往輝來於是三年禮闋乃
相與刊勒金石其辭曰

穆我君邦之陽資五就闡道網陟太微準樞衡稽
列宿覽四方德合乾翼應皇領二郡曜重光化流
洽提幽昌性天約元用長頌聲作謠令香功烈著
遺椒芳存覲榮淪弗忘稱彌輝元為常
堂邑令費鳳碑

惟熹平六年歲假於大荒无朕之月堂邑令費君
寢疾卒烏呼哀哉於是夫人元弟故字缺三守卜元
追而誄之其辭曰

君體履柔和溫其如玉修孝友乎閨闈執忠謇於
王室立迹州郡仕更右職舉直措枉彊禦缺貨貢

孝三署勲譽有則出宰近甸民懷厥德色斯輕翔
 翻然高絜王人述職分缺班爵退已進弟不營
 榮祿棲遲歷稔項領滯畜鄣土不庭黔民作虐命
 君缺二政化流行從善遷惡三期致道有恥且格
 牧守旌功轉左堂邑垂拱不言而民帥伏三時之
 閒卒以缺洽禦天不弔命也蚤歿春秋六十六黎
 儀瘁傷泣涕連瀉豈愛我躬命不可贖臨終迷缺
 字內發祖業良田畝直一金推子弟息辭位讓財
 行義高邵卓不可及名實相副有始有卒缺二
 善痛兮切惻

費鳳別碑

君舅家仲孫甘陵石勳字子才載馳載驅來奔於
 喪庭肝摧意悲感切傷心瞻彼碑誄懷之好音司
 馬慕蘭相南容復白圭仰之以彌高鑽之而彌堅
 不堪哀且思敘詩之一篇庶幾昔子夏起夫子之
 所言其辭曰

君諱鳳字伯蕭梁相之元子九江太守之長兄也
 世德襲爵銀艾相亞恢遐祖之鴻軌拓前代之休
 蹤邈逸越而難繼非羣愚之所頌仁義本於心慈
 孝著於性言不失典術行不越矩度清潔皦爾絜

而不滓恤憂矜厄施而不記由近及遠靡不覆載
 故能闡令名而雲騰揚盛聲而風布踐郡右職三
 貢獻計辟州式部忠以衛上漢安二年吳郡大守
 東海郭君以君有委蛇之節自公之操年世一舉
 孝廉拜郎中除陳國新平長神化風靡惠以流下
 靜而為治匪煩匪擾乾乾日稷矜此黔首功成事
 就色斯高舉宰司委職位思賢以自輔元懿守謙
 虛白駒以邃阻丹陽有越寇歿字缺四命君討理之
 試守故鄣長蓋危亂有不讓又畏此之臯罔字缺二
 而牧爰止其師旅鳩彼飛鷹鷁若夫虓虎彊者

綏以德弱者以仁撫簡在上帝心功訓而特紀輜

輿宰堂邑期月而致道視字缺四遂據於卿尹中表

之恩情兄弟與甥舅鳩與女蘿性樂松之茂好聞

君顯令名舉宗為歡喜不悟奄忽終藏形而匿景

耕夫釋耒耜桑婦投鉤莒道阻而且長望遠淚如

兩策馬循大路褰裳而涉浦悠悠歌黍離黃鳥集

於楚惴惴之臨穴送君於厚土嗟嗟悲且傷每食

缺不絕夫人篤舊好不以存亡改文平感渭陽悽

惻益以甚諸姑咸辟踊爰及君伯姊孝孫字元宰

生不識考妣追惟厥祖恩蓬首斬縗杖世所不能

為流稱於鄉黨見吾若君存剝裂而不已一別會

無期相去三千里絕翰永忼慷泣下不可止

案渥而不滓蓋用渥而不緇鳩彼蓋用歟彼鏡若葢用鬪如若非假借即傳授異也

一碑二銘例

漢碑大抵一文而三分之其所稱敘曰文曰辭曰頌曰銘曰誄曰歎曰亂曰重曰者了無定名亦無定在并無定體或一散句而兩用韻或三皆用韻義莫測也柝敏碑則先為散文敘之而綴以兩辭曰其一辭曰殿於敘末一辭曰冠於銘首一銘仿周雅一銘仿楚騷又他碑結銜類從其重故階重則書故階今職

重則書今職敏嘗位於朝矣碑不書官而書之曰孝廉蓋其時敏方去官察舉不書故秩而書今資也其敘世系上極柝宿與張納碑溯自張星者同其立碑又出於同歲生皆漢例之變者故詳舉之

孝廉柝敏碑

故孝廉柝君諱敏字愚卿其先蓋五行星中廿八舍柝宿之精也放像為用縣設為道缺商家而禪

字而主或聞生柝惠國大夫而流俗稱焉君父

以孝廉除郎中缺部府丞君追祖繼體歷職五官

功曹守宕渠令本初元年太守蜀郡缺君復督舉

君缺命失年君清節儉約厲風子孫固窮守陋不

字三堂無文麗墓無碑識建禦元年縣長同歲捷

為屬國趙臺公憤然念素帛之義其二年十月甲

子為君立碑傳於萬期因勒銘歎之厥辭曰

惟斯柳君天憤鯁缺襲祖缺風行無遺缺授政股

肱諫爭匡弼奮威外相屬城震粟宰守不煩垂名

所立表貢王庭望極爵位何辜穹倉官寵不遂予

惟三六庶昔延季建立斯碑傳於萬世子孫繁昌

永不漫滅嗚呼哀哉嗚呼哀哉

辭曰山陵元室缺斯邦兮先人修質尚約清兮汶

飭不彫隕處臧兮季子信舊帶樹松兮矯俗追歿

激缺揚兮亾而像存樂嘉靈兮宗子於集嗒其鳴

兮四祀烝嘗不廢荒兮

一人之歿本非一銘例

一碑而列銘有二有三自是漢例然推其所以如此

者蓋漢人本不似唐宋以後某作誌某作表某作行

狀分手為之其一人歿則生平知舊哀而弔之咸為

之銘略如今祭文輓詩非限定某作也每一人歿銘

非一手故一碑立銘非一章觀蔡中郎陳太邱碑可

見晚漢文名無過中郎然碑中述曹府君命官作誄

曰遣掾刊石作銘述种府君重部大掾以成時銘而
中郎又自爲之銘在中郎猶且疊牀架屋如此他何
暇論蓋漢之去古猶近其文字直爲應事而作淳悶
樸略一切風氣未開本無義例近來文士或以唐宋
文法上律漢人其講攷訂者又別有漢癖輒撫漢碑
中一二單文孤義片辭隻句以譙訶唐宋其失維均
夫豈知言之選哉

陳太邱碑

先生諱寔字仲弓潁川許人也含元精之和應期
運之數兼資九德總修百行於鄉黨則恂恂焉彬

彬焉善誘善導仁而愛人使夫少長咸懷安之其
爲道也用行舍臧進退可度不徼訐以干時不遷
貳以臨下四爲郡功曹五辟豫州六辟三府再辟
大將軍宰聞喜半載太邱一年德務中庸教敦不
肅政以禮成化行有謚會遭黨事禁錮二十年樂
天知命澹然自逸交不諂上愛不瀆下見幾而作
不俟終日及文書赦宥時年已七十遂隱邱山縣
車告老四門備禮閑心靜居大將軍何公司徒袁
公前後招辟使人曉喻云欲特表便可入踐常伯
超補三事紆佩金紫光國垂勲先生曰絕望已久

飾巾待期而已皆遂不至因農楊公東海陳公每
在袞職臣僚賀之皆舉手曰潁川郡陳君絕世超
倫大位未躋慚於文仲竊位之負故時人高其德
重乎公相之位也年八十有三中平三年八月丙
午遭疾而終臨歿顧命留葬所卒時服素棺槨財
周櫬喪事維約用過乎儉羣公百僚莫不咨嗟巖
藪知名失聲揮涕大將軍弔祠錫以嘉謚曰徵士
陳君稟嶽瀆之精苞靈曜之純天不憖遺老俾屏
我王梁崩哲萎於時靡憲縉紳儒林論德謀迹謚
曰文範先生傳曰郁郁乎文哉書曰洪範九疇彝
倫攸敘文爲德表範爲士則存誨歿號不亦宜乎
三公遣令史祭以中牢刺史敬弔太守南陽曹府
君命官作誄曰赫矣陳君命世是生含光醇德爲
士作程資始旣正守終又令奉禮終歿休矣清聲
遣官屬掾吏前後赴會刊石作銘府丞與比縣會
葬荀慈明韓元長等五百餘人總麻設位哀以送
之遠近會葬千人已上河南尹种府君臨郡追歎
功德述錄高行以爲遠近鮮能及之重部大掾以
成時銘斯可謂存榮歿哀成而不朽者也乃作銘
曰

峩峩崇儒吐符降神於皇先生抱寶懷珍如何昊
穹既喪斯文微言圯絕來者曷聞交交黃鳥爰集
于棘命不可贖哀何有極

俞犀月曰郭陳皆位卑不遇未有功業故稱述止
此陳長太邱庶幾循吏然所敘甚略以小試不足
以蔽其生平也

方伯海曰須看其前後氣勢懸亘斷而不斷處乃
是漢文意境古人表敘只及其身并不侈談先世
後昆若在後人則必并
及其子无方季方矣

後碑紀事例

後碑者即碑陰也漢碑陰類多題名或補前碑所未
及無大論箸惟史晨及孫叔敖後碑所書雜事猶之

續記後記乃創例也亦即昌黎上已謙太學聽琴詩

敘所自出

史晨饗孔廟後碑

相河南史君諱晨字伯時從越騎校尉拜建寧元
年四月十一日戊子到官乃以今日拜謁孔子望
見闕觀式路虔踞既至升堂屏氣拜手祇肅肩僂
髣髴若在依依舊宅神之所安春秋復禮稽成罔
靈而無公出享獻之薦欽因春饗導物嘉會述修
辟雍社稷品制即上尚書參以符驗乃敢承祀餘
胙賦賜刊石勒銘并列本奏大漢延期彌歷億萬

時長史廬江舒李謙敬讓五官掾魯孔暢功曹史
孔淮戶曹掾薛東門榮史文陽馬琮守廟百石孔
讚副掾孔綱故尚書孔立元世河東太守孔彪元
上處士孔褒文禮皆會廟堂國縣員冗吏無大小
空府竭寺咸俾來觀并畔宮文學先生執事諸弟
子合九百七人雅歌吹笙考之六律八音克諧蕩
邪反正奉爵稱壽相樂終日於穆肅雍上下蒙福
長享利貞與天無極

史君饗後部史仇誦縣吏劉耽等補完里中道之
周左廡垣壞決作屋塗色修通大溝西流里外南
注城池恐縣吏斂民侵擾百姓自以城池道濡麥
給令還所斂民錢財

史君念孔瀆顏母井去市遼遠百姓酤買不能得
香酒美肉於昌平亭下立會市因彼左右咸所願
樂

又敕瀆井復民飭治桐車馬於瀆上東行道表南
北各種一行梓

案漢書禮樂志桐生茂豫
師古讀桐爲通此碑亦同

假夫子冢顏母开舍及魯公冢守吏凡四人月與
佐除

石片廣侯

案前碑敘奏請此碑敘獻饗其補牆垣治瀆井種梓守冢又在饗廟之後隨時續紀字畫之大小亦等不

楚相孫君後碑

延熹三年歲在字缺二中夏之節政在封表期思長

光視事一紀訪問國中耆年舊齒素聞孫君楚時

良輔本起此邦垂名於後博求遺苗曾園孫子考

卜吉辰五月辛卯宜以存廢可立碑祀招請諸孫

都會國右郭西道北處所顯好興上宰祭倡優鼓

儻式序其胄授之端首先以不肖貪追賢烈以自

榮寵

案碑中一紀乃一載耳即前碑所云臨縣一載也月令季冬日窮於次月窮於紀星回於天然則一載固可以一紀稱之又案文後系以丞尉題名又系以孫氏宗族世譜碑後兼載譜牒亦是漢碑中特例然即是見古人譜法之簡不似後人之冗漫又案韓勅後碑四言韻語長篇奇麗然頗覆述前碑兼多錄字故不錄

朋友稱字例

逢童碑為志葬殤之始碑出於其父門人所立篇中

不稱君而稱伯彌亦朋友稱字例所始也

童子逢盛碑

童子諱盛字伯彌薄令之園孫遂成君之曾孫安

平君之孫五官掾之長子也胎懷正氣生克自然

俯育孩嚶弱而能言至於垂髦智惠聰哲過庭受
誠退誦詩禮心開意審聞一知十書畫規矩制中
模范日就月將學有緝熙才亞后橐當爲師楷自
天生授罔不在初謂當仰遂令儀令色整齊珪角
立朝進仕究竟人爵克啓厥後以彰明德允嗣昭
達何寤季世顯天不惠伯彊徑行降此大戾年十
有二歲在協洽五月乙巳噓噏不反天隕精晁苗
而不秀命有修短無可奈何慈父悼傷割哀回鯉
其十二月丁酉而安措諸永潛黃壚歿而不存於
是門生東武孫理下密王升等感激三成一例同

義故共刊石敘述才美以銘不朽其辭曰

嘉茲伯彌天授其姿蚤克岐嶷聰睿敏達當遂邁
迤立號建基時非三代符命無恒人生在世壽無
金石身潛名彰顯於後葉

書先生書私謚例

私謚始於周末訖漢寔盛陳寔之文範法真之元德
皆其選也梁休碑之貞文子魯峻碑之忠惠父婁壽
碑之元儒先生又陳寔法真之餘裔也梁休之謚出
於太守趙府君其碑不著撰人峻碑撰文出之其子
與孔耽碑同孔耽碑耽尚存而其子撰之也魯峻碑

峻既歿而其子撰之也又蔡中郎之碑郭有道自謂無愧皆韓誌貞曜柳誌文通歐誌徂徠例所從出而人子自銘厥考亦由茲起故具列之

元儒先生婁壽碑

先生諱壽字元考南陽隆人也曾祖父修春秋以大夫侍講至五官中郎將祖父太常博士徵朱爵司馬親父安貧守賤不可榮以祿先生童孩多奇岐嶷有志挽髮傳業好學不厭不修廉隅不飭小行溫然而恭慨然而義善與人交久而能敬榮沮溺之耦耕甘山林之杳藹遁世無悶恬佚淨漠徠

徠衡門下學上達有朋自遠冕紳莘莘朝夕講習樂以忘憂郡縣禮請終不回顧高位厚祿固不動心麤絺大布之衣糲糒蔬菜之食蓬戶茅宇椽樞甕牖樂天知命確乎其不可拔也是以守道識貞之士高尚其事鄉黨州郡缺親愛懷年七十有八熹平三年正月甲子不祿國人乃相與論德處諡刻石作銘其辭曰

皇矣先生懷德惟明優於春秋元嚶有成知賤爲貴與世無爭徠衡門禮儀滋醇窮下不苟知我者天身歿聲邇千載作珍繇之日月與金石存

石片厚
司隸校尉忠惠父魯君碑

君諱峻字仲巖山陽昌邑人其先周文公之碩胄

缺二伯禽之懿緒以載於祖考之銘也君則監營

謁者之孫修武令之子體純和之德秉仁義之操

治魯詩兼通顏氏春秋博覽羣書無物不聚學爲

儒宗行爲士表漢缺始仕佐職牧守敬恪恭儉州

里歸稱舉孝廉除郎中謁者河內太守丞喪父如

禮辟司徒府舉高第侍御史東郡頓邱令視事四

年比蹤豹產化行如流遷九江太守缺殘酷之刑

行循吏之道統政缺載穆若清風有黃霸召信臣

在潁南之歌以公事去官休神家術未能一期爲

司空王暢所舉徵拜議郎太尉長史御史中丞延

熹七年二月丁卯拜司隸校尉董督京輦掌警羣

僚蠲細舉大權然疏發不爲小威以濟其仁弼中

獨斷以效其節案奏缺公彈紕五卿華夏祗肅佞

穢者遠遭母憂自乞拜議郎服竟還拜屯騎校尉

以病遜位守疏廣止足之計樂於陵灌園之契閉

門靜居琴書自娛年六十二熹平元年缺月癸酉

卒明年四月庚子葬於是門生汝南干缺沛國丁

直魏郡馬萌渤海呂圖任城吳盛陳畱誠屯東郡

夏侯宏等三百廿人追惟在昔游夏之徒作謚宣
 尼君事帝則忠臨民則惠乃昭告神明謚君曰忠
 惠父息叡不才弱冠而孤承堂弗構析薪弗何悲
 蓼莪之不報痛昊天之靡嘉頰企有紀能不號嗟
 刊石敘哀其辭曰
 巖巖山嶽礪落彰較棠棠忠惠令德孔樂命缺時
 生雅度宏綽允文允武厥姿烈連內懷溫潤外撮
 強虐督缺京師穆然清邈缺職為國之權匪
 究南山遐邇惻惻凡百君子欽謚嘉樂永傳億齡
 喚矣昉昉

案此碑門生丁直等議謚其子叡立石作銘
 漢碑見其祖父子孫之名甚罕此其一也

郭有道碑

先生諱泰字林宗太原界休人也其先出自有周
 王季之穆有號叔耆實有懿德文王咨焉建國命
 氏或謂之郭即其後也先生誕膺天衷聰睿明哲
 孝友溫恭仁篤慈惠夫其器量宏深姿度廣大浩
 浩焉汪汪焉與乎不可測矣若乃砥節礪行直道
 正辭貞固足以幹事隱括足以矯時遂考覽六經
 探綜圖緯周流華夏隨集帝學收文武之將墜拯
 微言之未絕於是纓綬之徒紳佩之士望形表而

景附聆嘉聲而響和者猶百川之歸巨海鱗介之宗龜龍也爾乃潛隱衡門收朋勤誨童蒙賴焉用祛其蔽州郡聞德虛已備禮莫之能致羣公休之遂辟司徒掾又舉有道皆以疾辭將蹈洪厓之遐迹紹巢父之絕軌翔區外以舒翼超天衢以高峙稟命不融享年四十有二以建御二年正月乙亥卒凡我四方同好之人永懷哀悼靡所寘念乃相與惟先生之德以謀不朽之事僉以爲先民旣歿而德音猶存者亦賴之於見述也今其如何而缺斯禮於是樹碑表墓昭銘景行俾芳烈奮於百世令聞顯於無窮其辭曰

於休先生明德元純懿淑靈受之自天崇壯幽浚如山如淵禮樂是悅詩書是敦匪惟撫華乃尋厥根宮牆重仞之得其門懿乎其純確乎其操洋洋搢紳言觀其高棲遲泌邱善誘能教赫赫三事幾行其招委辭召貢保此清妙降年不永民斯悲悼爰勒茲銘攜其光耀嗟爾來世是則是效

書處士書故民例

金恭闕書處士嚴發亦書處士發碑敘嚴有曾閔之行聽表門閭蓋漢之孝秀修行於鄉雖不仕而守令

有旌門復徭之舉與齊民異是以謂之處士也漢例

有一官靡不書官如相府小史之類有一資靡不書資如孝廉有

道之類其處士則有不書處士而書故民者亦以見古

人之醇質也

漢故民吳公碑

熹平元年十二月上旬吳公仲山少立名迹約身

彪已節度無雙不貪仕進隱匿世間府縣請召未

曾闕城守鮮貧苦不豫輝榮兄弟三人居其中央

事長接幼出入教誨元少不幸棄世蚤亾乾坤蓋

載八十有長年壽木究而遭禍央子孫飲泣呼招

不能還與世疆憾痛奈何惟公德美布惠州里遠

近假求不言無有春秋舉貸給與無已不逆人意

率導以禮市庭佑渠飲食空手收贍遺孤皆置門

裏先亾為葬幼弱娶婦受恩者無販不能悲嗟效

報社里其恩捐施豈誰照矣公本有三息遺孤二

庄無介少德父有餘財東西南北不能起構高殿

總觀采色孤慙亾父憂居夙夜如有空缺務卻

築蓋神靈有知水徂挺謝焉焉已巳子孫萬歲

書卒日葬日例

漢碑卒不日葬不日或有卒日而無葬日其卒葬皆

具者惟衡方王純張表劉衡郭仲奇逢盛魯峻七八
碑耳衡方以九卿左遷五校仍以故官書之書其重
也漢例有立石之人即有題名之人碑稱海內門生
故吏而碑末題名祇朱仲一人又用小字書之其下
或即撰文者耶未可知也洪文惠公嘗稱此文溫潤
唐賢所取法者故錄之其張表魯峻諸碑已別見

衛尉衡方碑

府君諱方字興祖肇先蓋堯之苗本姓缺二則有

伊尹在殷之世號稱阿衡因而氏焉缺三土家於

平陸君之烈祖少以儒術安貧樂道履該顏原兼

修季由聞斯行諸砥仁缺五土階夷愍之貢經常

伯之賓位左馮翊先帝所尊垂名竹帛考廬江太

守兄雁門太守缺三孝長發其祥誕降於君天資

純懿昭前之美少以文塞敦厖允元長以欽明耽

詩悅書仕郡辟州舉孝廉除郎中即邱侯相膠

東令遵尹鐸之保障二城參國起案班敘缺三本

肇末化速郵置州舉尤異遷會稽東部都尉將繼

南仲邵虎之軌飛翼軫之旌會喪太夫人感背

人之凱風悼蓼儀之劬勞寢閣苦凶仍留上言倍

榮向哀禮服祥除徵拜議郎右北平太守尋李廣

之在邊恢魏絳之和戎戎戢土佚費省巨億遷
潁川太守修清滌俗招拔隱逸光大著茹歸來
洙泗用行舍藏徵拜議郎遷太醫令京兆尹舊都
餘化詩人所詠 鶉火光物隕霜勦姦振滯起舊
存亡繼絕恩降乾泰威肅剝坤本朝錄功入登衛
尉缺翼紫宮夙夜惟寅禕隨在公有單襄穆典謨
之風詔選賢良招先逸民君務在寬失順其文舉
已從政者退就勅中永康之末君衛孝桓建禦初
政朝用舊臣留拜步兵校尉處六師之帥維時假
階將授緄職受任浹旬奄離寢疾年六十有二建

禦元年二月五日癸丑卒詔遣使

缺字

弔賻禮百

察臨會莫不失聲其年九月十七日辛酉葬益雅
頌興而清廟肅中庸起而祖宗缺故仲尼既歿諸
子綴論斯干作歌用昭於宣謚以旌德銘以勒勳
於是海內門生故吏缺采嘉石樹靈碑鐫茂伐
秘將來其辭曰

峩峩我君懿烈孔純高服神武歷世忠孝馮隆鴻
軌不忝前人寬猛不主德義是經韜綜頤缺溫故
前呈攬英接秀踵迹宴平初據百里顯顯令聞濟
康下民曜武南會憂及退身參議帝室旋守

中嶽幽滯以榮 不虞不揚維明維允耀此聲香

能哲能惠剋亮天工 蹈規履矩金玉其相謇謇

王臣羣公憲章樂只君子缺二無疆銘勒金石

萬世是傳明生平原樂陵朱登字仲

墓文自卒葬日敘起例

東漢自路都尉始見墓闕其表墓文辭自元初元年

謁者景君始其次則元初四年郊令景君闕銘也謁

者景君墓表篇首曰惟元初元年五月丁卯故謁者

任城景君卒烏呼云云蓋卒日而葬不日也郊令闕

銘篇首云惟元初四年三月丙戌郊令景君卒以五

年二月下缺缺處蓋葬日也文無定體而此則墓文

之最古者二碑存字無多故不錄要之唐宋文家以

卒葬敘起者例皆本此

墓文必書卒年卒日例

不書生年不書葬地所敘世系往往遠極皇古而近

遺祖禰卽或舉之僅有官稱略無名字其書葬日亦

僅十之一二至於婚配子姓皆略弗著漢碑之常例

也惟卒年卒日具者十之九今舉沛相竹邑侯二碑

以例其餘其文爲尤工也

漢故沛相楊君之碑

君諱

字缺九

富波君之

缺子也

缺天

性少有令問

敦

缺

孝以敕內

缺

名行以修外詔

字缺二

烈隆構厥

基既仕州郡會孝順皇帝西巡以掾史召見帝嘉

其忠臣之苗器其璠璣之質詔拜郎中遷常山長

史換棣為府丞君雖詘而就之以順時政非其好

也迺翻然輕舉臯司累辟應於司徒州察茂才遷

鮑陽侯相金城太守德以化圻民威以懷殊俗慕

義者不肅而成帥服者變衽而屬疆易不爭障塞

無事功顯不伐委而後為直南蠻蠢迪王師出征

以君文武備兼廟勝先戰拜車騎將軍從事軍還

策勲復以疾辭後迺徵拜議郎五官中郎將沛相

天吏之治副當神人秩禮之選舉不踰賢故望太

和則俟生毓晞嚴霜則畏辜戮欣悅竦慄寬猛必

衷遭貴戚專權不稱請求考績不論徵還議官年

五十六建寧元年三月癸丑遘疾而卒朝廷愍惜

百僚歎傷

缺

民假爾莫不隕涕故吏戴條等追在

三之分感秦人之哀願從贖其無由庶考斯之頌

儀乃鐫石立碑勒銘鴻烈光於億載俾永不滅其

辭曰

明明楊君懿鑠其德其德伊何以忠以力勤止厥

身帥缺靡革暮茲典猶道以經國班化黎元既清
且禦武稜攜貳文懷遐冥遠人斯服价士克庭剛
柔攸得以和以平勲速藐矣莫與爭光甘棠遺愛
東征企皇念彼恭人怒焉永傷立言不朽先民所
臧載名金石貽於無疆

漢故竹邑侯相張君之碑

君諱壽字仲吾其先蓋晉大夫張老盛德之裔世
載缺勲遵帥紀律不忝厥緒為冠帶理義之宗君
孝友恭懿明允篤信敦悅經雅習父東光君業兼
綜六藝博物多識略涉傳記矯取其用股肱州郡

匡國達賢登善濟可登班敘優能正躬帥陪臨疑
獨照確然不撓有孔甫之風舉孝廉除郎中給事
謁者贊衛王臺婁缺忠謇上嘉其節仍授命策匡
其京輦昭德塞違內平外成舉無遺愆遷竹邑侯
相明德慎罰縣奉采土遭江楊劇賊上下缺征役
賦彌年萌於缺戈杼軸聲輝君下車崇尚儉節躬
自菲薄儲待非法悉無所留并官相領省倉缺小
府御史朝無姦官野無淫寇教民樹藝三農九穀
稼嗇滋殖國無灾祥歲聿豐穰皤白之老率其子
弟以修仁義群賊不起厲疾不行視事年載黔首

樂化戶口增多國禦民殷功刊王府將授轄邦對
揚其勲功曹周憐前將放濫君微澄清憐顧愆悔
過督郵周紘承會表問君常懷色斯舍無宿儲遂
用高逝老弱相攜攀援持車千人以上沛相名君
絡驛要請君捐祿收名固執不顧民無所印國違
所賴上下同感州郡聞知旌弓禮招復為從事觀
覲虎視不折其節辟司徒府進退以禮含國內光
頌缺皓爾顧天不悞遘疾無瘳年八十建御元年
五月辛酉卒烏呼哀哉夫積修純固者為天人所
鍾功假於民者敘在銘典於缺俊缺訪諸儒林刊

石樹碑式昭今徽其辭曰

亮元德於我君膺清茂體懿純超三署垂令缺甄

聲號缺憲臺矯王業弼紫微彈羣司清公缺緩薄

賦牧邦圻黎烝殷罔荒飢感良臣哀其靈竭輕舉

缺來征民歎思暨輿人宰府命遂遠缺名振射缺

彌闡垂令紀永不刊於胥德流後昆

敘家世詳於所著例

孔宙碑敘家世只一句曰孔子十九世之孫也孔謙

碣只二句曰宣尼公廿世孫都尉君之子也蓋一提

孔子則其他世數更不須述韓歐敘人之先世輒詳

其德藝顯明者不必定高官穹爵也漢亦有之譙敏碑之追述譙贛苑鎮碑之追述苑子是也

漢故小黃門譙君之碑

君諱敏字漢達鄴君之中子章君之弟郎中君之昆也其先故國師譙贛深明典奧識錄圖緯能精微天意傳道與京君明君承厥後不忝其美幼而好學才略聰睿詩書是綜言合雅謨慮中聖權既休在公忠允篤誠以直佐主帥下惟約肅將王命振之於外羣僚有司各敬爾儀君商時度世引已倍權守靜惟冗韜光韞玉以遠悔咎恥與鄰人羸

竝拾驅識真之士謂君爲詰在昔甯武當亨南山難老之禱昊天不惠降茲灼疾年五十有七以中平二年三月九日戊寅卒嗚呼哀哉國喪良佐家隕棟梁遐邇咨悼士女哀懷僚朋親戚莫不失聲泣涕雙流於是立表寫憤斯銘傳於罔極其辭曰於穆使君盛德昭明爰惟懿業帥由舊章文武彬或柔而能剛屈道從政令名顯揚臣多醜直是用遜讓且以毓姿優游缺京曷億邁罹景命不長屋棟傾覆君缺喪亾如何如何吁嗟昊蒼身退名存永世遺芳中平四年七月廿八日造

隸釋拾音洽劍柳也
與羣奄冠劍竝驅之意

漢故荊州從事苑君之碑

漢故荊州從事苑君諱鎮字仲弓南陽沅陽人也

其先出自苑柏何為晉樂正世掌朝禮之制失其

官次侈以自僭缺采替絀春秋錄微誤祖諸世有

苑子園寔能紀陰陽之理其稱微而顯缺名著遂

茲盛建功子孫爰居來宅沅陽君即其冑也君肇

建仁義之基始創五福之衢韜律大杜綜臯陶甫

侯之遺風故易稱師出以律五用是綱平不枉理

政以憲修須律定紀功績布缺德缺州里水蓄流

遠行著即休先公門之忠盡節君父遂登朝階為

郡督郵列掾鷹姿管蘇靖供衛上方平不阿嚴而

不缺清介之缺激然發越州伯是聞備禮招納以

部江夏過郡歷縣莫不雲披風靡畏威懷德垂芳

遺蔘紀歌於今當陟泰階配耀嶽嵩壽不極旌蚤

世隕終景胙之元二葉州郡官有世功位即繼倫

于是乃欽樹元石甄德表勲其辭曰

於惟從事茂德翔羊構基崇業侯室侯堂絜擬季

文仁若春風義以繼志禮為宗匡虔缺慈愛與世

無傷上德不德身翳名章靈永邁矣享斯榮光

有履歷無籍貫例

漢例卒不日葬不日竝有不著郡貫者非獨費汎也
今錄武榮一碑以實之

漢執金吾丞武君之碑

君諱榮字含和治魯詩經章君章句缺憤傳講孝
經論語漢書史記左氏國語廣學甄微靡不貫綜
久游大學頽然高厲羸於雙匹學優則仕為州書
佐郡曹史主簿督郵五官掾功曹守從事年世六
汝南蔡府君察舉孝廉字缺二郎中遷執金吾丞遭
孝桓大憂屯守元武感哀悲慟加遇害氣遭疾隕

靈

字缺四

君即吳郡府卿之中子敦煌長史之次弟

也廉孝相承亦世載德不忝

字缺四

命缺

不竟台衡

蓋觀德於始述行於終於是刊石勒銘垂示無窮
其辭曰

天降雄彥資才卓茂仰高鑽堅允文允武內幹三

署外

缺

師旅

缺

勒屯守舊威

缺

武缺

旗絳天雷震

電舉敷耀赫然陵惟哮虎當遂股肱缺之元輔天

何不弔降此凶咎痛乎我君仁如不壽爵不副德

位不稱功咸懷傷愴遠近哀同身歿

字缺二

萬世諷

誦

有卒年無卒日例

漢例書卒年必書卒日而李翊碑卒不日葬不日書其善事繼母與夫人碑語合文中倒用於陵爲陵於匪石爲磐匪皆漢碑之異者故舉之

廣漢屬國侯李翊碑

君諱翊字輔國牂柯太守曾孫謁者孫從事君之元子也其先出自箕子之苗奕世載德迄君之身幼有貞恪謙約之操長荷芬芳成人之行通經綜緯兼究古雅初缺妣憂勤思盡情及繼母嗣承慈愛如前養則竭力克勤和顏名顯近遠論者稱焉

郡守嘉貪禮請署督郵五官功曹守長朝有申甫之節居則曾閔之行延熹六年太守東萊李君懿其高絜順天報國察舉孝廉除郎中特慕供養常託疾在家時益部擾攘爲三府所選拜廣漢屬國侯到官鷹揚威懷以文得殊俗懽心撥理之效至建寧元年遭從事君憂去官二交追戀詠其甘棠竭孝道以送終懷松柏而憔悴禮服旣盡州郡爭取羣部諸郡深執磐匪棲遲不就童冠相娛閨門雍雍夷史之高著臨究前軌當爲國之幹臣穹昊缺逝皇祚不永年五十四以熹平二年卒凡百慘

石版廣侯
愴同時感傷九族內外莫不絕傷於是乃刊石勒
銘垂示後昆

赫赫惟忠屬國李侯發迹邑屋聲冠方隅貢德王
室顯名遼疇禦侮鎮戎經爲大儒考憂釋紉公義
卓休終而有禮哀榮兼殊歿而含曜比列陵於嗟
兮魂靈烏呼悲夫

書侯國紀年例

三代諸侯於其國皆自紀其年不書天子之年尚書
泰誓十有三年自周人書之也春秋隱公元年自魯
人書之也漢諸侯王則必先書天子之年而後自書

其年今曲阜有石刻曰五鳳二年魯世四年成五鳳
二年者漢宣帝有天下之年也魯世四年者魯孝王
有國之年也漢書諸侯王表楚王戊二十一年孝景
三年楚王延壽三十二年地節元年此雖列侯亦然
史記高祖功臣侯年表高祖六年平陽懿侯曹參元
年孝惠六年靖侯卬元年孝文後四年簡侯奇元年
絳侯世家上言侯建德十三年下言元鼎五年馬班
皆爲朝廷紀載自朝廷書之也淮南子天文訓曰淮
南元年冬者劉安王淮南之始年也周陽侯獻鍭銘
曰周陽侯家銅三習獻鍭容五斗重十八斤六兩侯

石片月係
治國五年五月國鑄第四治國五年者始侯其國之
五年也文選魏都賦劉良注文昌殿鐘銘曰惟魏四
年歲次丙申龍次大火五月丙寅作魏賓鐘魏四年
者曹操為魏公之四年也凡此皆各自其國書之也
蓋第書國年所以私示其國人先書天子之年而後
書自有其國之年所以示天下後世人也此漢例然
也

書卒年月日異例

漢人於年月日雖質書者居多然非如春秋之一例
質書也其變文頗不一今臚舉之

建和元年太歲在丁亥二月辛巳朔廿三日癸卯

武班碑古以干支紀日不以紀年然以干支紀年亦自漢有之矣

永康元年歲在鶉尾龍集丁未

荊州刺史度尚碑蓋即延熹九年

之次年也

熹平元年十二月上旬

乾坤蓋載八十有長故

吳仲山碑不書卒日其書卒年亦變文

惟熹平六年歲格於大荒无射之月

堂邑令費鳳碑

合登六辰春秋廿八而卒

中平元年歲在甲子

三月而葬郭究碑

以光和二年大荒輟紙月戊申奄名而終以其

年十月葬

冀州從事郭君碑

蓋漢三百八十有七載

潘乾校官碑

皇漢帝元永壽三年有龍建酉孟秋之旬

韓勅孔廟後碑

漢初平五年倉龍甲戌禦天季月

高朕周公禮殿記

惟光和元年歲在戊午名曰咸池季冬巳巳

西嶽華山

亭碑

惟永壽二年青龍在涪歎霜月之靈皇極之日

韓勅

禮器碑

光和七年龍在困敦月次鶉火六月丙申卒惟

中平二年龍旂奮若月次星紀

外黃高君碑

惟漢中興非金休烈和平元年歲治東宮星屬角

房月建朱鳥中呂之均

祝長嚴新碑

官稱例

宋元以來官稱紊亂或借用古名或裁省其字近人皆知其不典矯而易之然亦當視其文體所宜施用文律之謹無過韓歐韓曰余為少秋官不云刑部侍郎也歐曰丞相呂夷簡病不能朝不云中書平章事也余嘗戲論醉翁亭記太守醉也太守者誰二句假而易之曰知滁州軍州事醉也知滁州軍州事者誰尚成句耶蓋廟朝大事高文典策質而書之必不可

以舉人為孝廉生員為茂才若尋常應用序記小文則循習假借義無妨害文莫古於漢漢官爵莫不質書然稱丞為卿守相為府君亦初非一例知此則臨文酌義不貿於施矣

再奉朝娉十辟外臺

樊敏碑

一耍金紫十二銀艾七墨綬

馮緄碑蓋漢人總敘歷官有如此者

金縉十三

唐扶碑敘其奕世官閥有如此者

右侍

隸續載右侍之墓蓋左右署侍郎也

軍中

郭究碑

軍中侯

郭仲奇碑額題

但稱軍中侯東城門侯


陳球碑亦作中東城門省去中字

踐賊


決

冀州從事郭君碑蓋指賊曹決曹也

案此省字法即唐之秘監突之太博所從出



碑版文廣例卷四



碑版文廣例卷五

長洲王芑孫念豐輯

漢

不詳家世例

漢去古未遠猶重世系碑文各著其苗胄所本雖所敘非覈頗涉荒怪然有過而誕無過而慙遺之也其不敘家世者至鮮不過從事武梁郎中郭君數碑而已要亦不可為例

不書諱字例

漢例非獨敘父兄有官無諱即本人亦有失載名諱

石片廣傳
者如景氏謁者郟令北海相三碑益州太守碑平輿
令薛君碑皆不見其名字蓋文律之疏如此

碑額碑文合爲章法例

碑額乃一篇之主文其條件額其綱領也漢碑有別
製額字者如中部碑校官之碑等爲宋人別製四字
例所出其餘則額與文通爲章法文與額題承接相
銜而下額曰楚相孫君之碑篇首卽曰楚相孫君諱
饒字叔敖本是縣人也額曰僊人唐君碑篇首卽曰
君字公房成固人額曰析里橋郟閣頌篇首卽曰惟
茲析里處漢之右額曰神漢桂陽太守周府君功勳

之紀銘篇首卽曰桂陽太守周府君者徐州下邳人
也額曰漢故藁長蔡君之頌篇首卽曰君諱湛字子
德河內修武人也額已書姓篇中卽不書姓額之書
官詳卽篇中書官略芟鄂相遞互爲虧蔽故當篇之
首亦更不標題偶有標題義亦如此如題云巴郡太
守都亭侯張府君功德敘篇首卽云君諱納是也後
世有額有題而篇仍別起非惟重出轉似篆額爲贅
餘矣

書高曾祖父例

禮諸侯不敢祖天子大夫不敢祖諸侯故有先妣之

祀唐宋敘人之先世必及其妣而漢例無有也祖父之外溯極高曾如尹宙碑稱元稱曾卻又省去孫字此則漢人變例所初見也故錄之

豫州從事尹宙碑

君諱宙字周南其先出自有殷迺迄於周世作師尹赫赫之盛因以爲氏吉甫相周宣勲力有章文則作頌武襄獫狁二子著詩列於風雅及其元孫言多世事景王載在史典秦兼天下侵暴大族支判流遷或居三川或徙趙地漢興以三川爲潁川分趙地爲鉅鹿故子心騰於楊縣致位執金吾子

孫以銀艾相繼在潁川者家於僑陵克續祖業牧守相亞君東平相之元會稽太守之曾富波侯相之孫守長柱令之元子也君體溫良恭儉之德篤親於九族恂恂於鄉黨交朋會友貞賢是與治公羊春秋經傳通書傳仕郡歷主簿督郵五官掾功曹守昆陽令州辟從事立朝正色進思盡忠舉衡以處事清身以厲時高位不以爲榮卑官不以爲恥含純履軌秉心惟常京夏歸德宰司嘉焉年六十有二遭離寢疾嘉平六年四月巳丑卒於是論功敘實宜勒金石迺作銘曰

石片屋
於鑠明德於我尹君龜銀之冑奕世載勲綱紀本
朝優劣殊分守攝百里遺愛在民佐翼牧伯諸夏
肅震當漸鴻羽爲漢輔臣位不副德壽不隨仁景
命不永蚤卽幽昏名光來世萬祀不泯

書子弟及妻耐蒸配食例

漢碑敘祖父常書官不書名其於妻子則尤略焉偶
有書其子若樊君碑書其弟并及其子若劉修碑書
其子并及其孫若熊君碑書其夫人三女若張公神
碑書其女并及其無男若孝子嚴舉碑書其娉妻若
戚伯箸碑書婦耐於姑若膠東令王君碑書其四男

三女若郭輔碑書其夫人姑姊以及其孫若費鳳碑
者蓋亦僅矣惟鄭固馬江二碑或紀其子或紀其妻
其弟耐葬配食乃後人誌合葬塲葬所自始合葬後
人爲常例漢人爲特例

郎中鄭固碑

君諱固字伯堅箸君元子也 孝友箸乎閨門至
行立乎鄉黨初受業於歐陽遂窮究於典籍鷹游
夏之文學襄冉季之政事弱冠仕郡吏諸曹掾史
主簿督郵五官掾功曹八則腹心出則爪牙忠以
衛上清以自修犯顏譽愕造膝佞辭加以好成方

石片展

類推賢達善遠道退讓當世以此服之邦后珍璋
以為儲舉先屈計掾奉我缺貢清眇冠乎羣彥德
能簡乎聖心延熹元年二月十九日詔拜郎中非
其好也以疾錮辭未滿期限從其本規乃邁凶愆
年卅二其四月廿四日遭命隕身痛何如之先是
君大男孟子有楊鳥之才善性形於岐嶷缺二見
於垂髫年七歲而天大君夫人所共哀也故建缺
共墳配食斯壇以慰考妣之心琦瑤咸以為至德
不紀則鐘鼎奚銘昔姪缺二武弟述其兄綜缺四
行於蔑陋獨曷敢忘乃刊石以旌遺芳其辭曰

於惟郎中實天生德頤親誨弟虔恭竭力教我義
方導我禮則傳宣孔業作世模式從政事上忠以
自勗貢計王庭華夏歸服帝用嘉之顯拜殊特將
從雅意色斯自得乃遭氛災隕命顛沛家失所怙
國缺忠直俯哭誰訴叩號焉告嗟嗟孟子苗而弗
毓奉我元兄修孝罔極魂而有靈亦歆斯勒

案隸釋秦紀引賈生云九國之師遠巡遁逃而不
敢進陳涉世家則刪遠巡二字班史又作遠遁顏
師古讀遁為遠游俠傳遠遁有退讓君子之風此
作遠遁退讓蓋用史記語歐以遁為循余則云當
讀如本字

郎中馬江碑

卑反書列 卷五

五

君諱江字元海者濟陰乘氏人也 其先帝顓頊
 醫藥之後世在趙國以功封趙賜號馬服因遂氏
 焉暨於君身乾靈特挺岐嶷有度元然清妙長有
 令稱通韓詩經贊業聖典左書右琴明於光上之
 術顯於君臣之道郡將平原高君深昭其德以和
 平元年舉孝廉除郎中謙虛接下冠名三署昊天
 不缺遭離缺厲年世元嘉三年正下失楨幹仕喪
 儀宗於是盟軌察醜縞素來赴慘痛號咷者不可
 勝數矣夫人寃向曹氏終溫淑慎咸曰女師年五
 十五建德三年十二月卒君中弟字文緒位主簿

督郵志行缺期落落自有大節年世二蚤世短折

故瑩迫窄北告斯土君之庚地缺處還啟缺五

神東看祖禰西瞻舊廬皇神彷彿爰缺二居乃缺

字碑銘勒厥勳其辭曰

缺鴻德赫含先 榱桷存其人 亾 顧几筵悽懷

傷嗟詩云感凱風歎寒泉惟梓桑 歿不朽久彌

章

隸釋此碑字體古拙行閒疏密不等其載夫人曹氏卒相去蓋十七年矣當是因天人卜兆以馬君

共瑩又改厝其季故并言之其云東看祖禰西瞻舊廬可知瘞以昭穆也碑中載郎中夫婦卒年卒

日皆具此漢碑之特例也

娉妻合葬例

漢碑志合葬者極少志葬殤者尤少也相府小史夏
堪碑敘堪天歿而娉會謝氏并靈合柩之事今世俗
有未昏守志而同穴者亦有娉妻蚤隕歸其柩於夫
氏之堂者雖事非禮典要所由來亦自漢始之也
故府小史夏堪碑

曹小史夏堪字叔德帝禹之精苗缺侯之遺

字缺三零陵太守之根嗣也易世承系休祚仍垂印

紼缺字三豔罔託堪繼令蹤受氣蹈真年在洗缺奉

親恭順缺字二束修操潔冰雪苛獲縣選初缺府朝

典職首曹聰缺施布天殲良善卒邁瘳疴賈命天

摧國喪貞缺允牧傳寵贈官僚臨弔慈恩感踴族姻

追傷娉會謝氏并靈合柩古命有之仲尼何恫烏

呼哀哉其辭曰

嗟叔德含淑勲質珪玉性馥芬視缺操希騏顏愧

龍階望浮雲趺尺水津未彊春華萌遭電霜壽不

究魄蜚揚情悲切箸篇章刊石銘傳萬年

書子例

漢例不書子姓其或書之如吳公碑孤慙父郭究
碑孤嗣叫號劉衡碑閔嗣哀孤知其有子矣孫根碑

嚴父孝孫臨禮服并知其有父矣而皆不著誰某張賓公柱文書子偉伯及長子元益葬父及弟則因事而見其名也國三老袁君碑元子光博平令中子騰尚書郎少子璋謁者皆以名見此爲父子俱列三臺而書也武梁碑孝子仲章季章季立孝孫子僑皆以字見此爲選石畫像而作也惟楊震費汎費鳳三碑具箸子孫歷官震鳳碑皆別見今錄汎碑文中不敘郡貫而曰此邦之人猶楚相碑之稱是縣張平子碑之稱此縣也

漢故梁相費府君之碑

梁相諱汎字仲慮此邦之人也其先季文爲魯大夫有功封費因妣爲姓秦項兵起避地於此遂畱家焉世業稼穡好學禮樂大漢之缺官司相繼絕而復續至梁府君以孝友至行聞於鄉邑仕更郡右塞鄂質直在公履法察孝廉除郎中屯騎司馬遷蕭令眠民如子先教後罰流元默之化奉以忠信守以敦篤在位九年百姓移風苛慝不作姦寇不發變爭路銷推讓道生三年不斷獄禎祥感應時沛有蝗獨不入界由此顯名國以狀聞朝廷嘉諸拜梁相宣慈惠和不帥自正當登台階延究睂

耆被病遜位春秋八十卒二子慕缺鳳由宰府至堂邑令政九江太守適孫均感奚斯之義刊銘元

石旌勒厥美俾缺覽焉其辭曰

穆穆顯祖厥德懿鑠播勳於前丕碩基業遺惠於

民福流後昨庶缺昌缺在堂在室功烈休矣末昆

戮力

書孫例

漢碑書孫者尤希武梁碑有孝孫子儁之文而不詳官秩國三老袁君碑立石出於其孫太尉楊公碑立石出於其孫統之門人故并其孫之官秩具書之在

漢碑為特例要是孫述權文公張曲江諸家書孫例所本

案唐宋人書孫皆統於祖不繫其父例不分書所出蓋女子書出男子不書出也今世俗書孫分繫其子曰某出者非是必不得已而欲分判其父亦當用楊震碑牧子統讓子著之文而書之曰某子又唐宋人碑版類詳於官階遷轉其他賜略焉然三代人臣榮君之賜珮戈鉤帶往往勒之彝器銘之

漢故國三老袁君碑

君諱良字厚卿陳國扶樂人也厥先舜苗世為封君周之興虞闕父典陶正嗣滿為陳侯至元孫濤塗初氏父字立姓曰袁魯僖公四年為大夫哀十

一年頗作司徒其末或適齊楚而袁生缺獨留陳
當秦之亂隱居河洛高祖破項實從其冊天下既
定還宅扶樂孝武征和三年生曾孫幹斬賊公先
勇拜黃門郎封關內侯食遺鄉六百戶後錫金紫
遷修城之郡幹夢子經嗣經夢子山嗣傳國三世
至王莽而絕君即山之曾孫纘神明之洪族資天
德之清則惇綜易詩而悅禮樂舉孝廉郎中謁者
將作大匠丞相令廣陵太守討江賊張路等威震
徐方謝病歸家孝順初政咨缺白三府舉君徵
拜議郎符節令時元子光博平令中子騰尚書郎

少子璋謁者詔書辟

缺二

可父事羣司以君父子

俱列三臺夫人結髮上為三老使者

缺

節安車親

缺几杖之尊袒割之養君實饗之後拜梁相帝御

九龍殿引君對覲與酒飯賜飲宴冊曰頃者連遇

運害灾條備至陰陽不和寒暑不節昔孔子制義

承奉則有興盛之福慢期即致來咎之變朕以眇

身襲表繼業二九之戒今直其際圖記占缺慎在

藩國自先帝至德猶有七國之謀蓋治世者不諱

其難朕追寤社稷之重恐有交會諸國王侯開導

以驕滿之漸令姦邪因緣生慝相以顯選簡練內

升昔掌符竟惠撫我民故連拔授不問勲次典郡
職重親執經緯隱括在手往者王尊發縱於平陽
清約藩輔其節衍然忠臣之義有獻善去否其加
精覈測切防絕朕疚心以戒今特賜錢十萬雜繒
世匹玉具劔佩書刀繡文印衣無極手巾各一往
悉乃心勉密協同便宜數上君子曰優賢之寵於
斯盛矣宰縣治郡無民不思載八十五以病致仕
永建六年二月戊辰卒居网室廬殯於假館昔行
父平仲小國之卿其儉尤稱况漢大夫父子同升
而無環堵不遭邱明實錄之時使前詰孤名而君

獨立於是厥孫衛尉滂司徒掾囡迺刊石作銘其

辭曰

飛清逸奮其厲跨高岳鋪雲際作帝父振汪濊登
華龍眺天坐酌不揮凱以邁民被澤邦圻人才本
直曜其碣缺煌煌數萬世

太尉楊震碑

缺三字字伯起缺二字氏焉聖漢龍興楊熹佐命克項

於垓錫缺四字公侯之胄必復其始是以神祇降祚

乃生於公實履忠貞恂美且仁博學甄微靡道不

該又明尚書歐陽河洛緯度窮神知變與聖同符

鴻漸衡門羣英雲集成共飲酌其流者有踰三千
至德通洞天爵不應貽我三魚以章懿德遠近由
是知為奕世繼明而出者矣州郡虛已競以禮招
大將軍辟舉茂才除襄城令遷荊州刺史東萊涿
郡太守所在先陽春以布化後秋霜以宣威寬猛
惟中五教時敘功洽三邦聞於帝京徵旋本朝歷
太僕太常遂究司徒太尉立朝正色恪勤竭忠無
德不旌靡惡不形將訓品物以濟大清而青蠅嫉
正醜直實繁橫共構譖慷慨暴蒙於時羣后卿士
凡百黎萌靡不欷歔垂涕悼其為忠獲辜乾監孔

昭神島送葬王室感寤姦佞伏辜公功乃申追錄
元勲策書慰勞賻贈有加除二子郎中長子牧富
波侯相次讓趙常山相次秉實能繼修復登上司
陪陵京師次奉黃門侍郎牧子統金城太守沛相
讓子著高陽令皆以宰府為官奉遵先訓易世不
替天鍾嘉祚永世罔極統之門人汝南陳熾等緣
在三義一頌有清廟故敢慕奚斯之追述樹園石
於墳道其辭曰

穆穆揚公命世而生乃台吐耀乃嶽降精明明天
子實公是匡冥冥六合實公是光蹇蹇其直皦皦

其清懿矣盛德萬世垂榮勒勳金石日月同烟

系碑中慷慨暴夢語范書本傳震以樊豐耿寶等
後先讓構帝夜道使者策收太尉印綬勒歸本郡
震行至城西夕陽亭飲酖而卒碑非為震諱也不
與小入得以害君子也其義本於春秋之書魯桓
公公子牙其後昌黎誌董晉之子董谿曰除名徙
封州成湘中寤實賜歿而不書賜歿皆此例矣碑
中不書卒日蓋以
飲酖為不得其終

書兄弟例

漢例書子弟甚略侯成碑君則上黨太守之弟夏承
碑右中郎將弟也費鳳碑九江太守之長兄也皆不
著誰某郎中郭君碑有惠兄仲犀又不著其官惟北
軍中侯郭仲奇碑敘兄弟官簿綦詳要亦不著名諱

可見當時文律未具作者固未嘗以史法裁之也

漢故北軍中侯郭君碑

君諱缺字仲奇元城君之第四子其先蓋周之胄

緒虞郭建國享土受胙政衰道失晉克其邦遭嬴

項之際高祖初起運天符命席秦摘楚遂定漢基

枝葉雲布列於國郡或潁川馮翊公卿校尉將相

州郡令問休貴自東郡衛國家乎河內彼亦世載

德以臻於君君惠兄竹邑侯相次尚書侍郎次濟

北相順地臨沂長次徐州刺史次中山相次洛陽

令咸以孝廉公府茂選貞亮皦白翼翼英彥配周

之八為國幹楨君幼有岐嶷天然之資長有明肅
宏雅之操剛毅多略有山甫之縱沈懿敦篤為萬
夫之望缺為郡五官掾功曹司隸中都官從事虎
視眈眈鷹侍電擊貴戚肅承莫不畏憚三辟將軍
府徵書粲粲貞亮直方蹇蹇衍衍忠信可結義然
後諫舉廉比陽長五教加仁施於惠康焉於之武
以抑於彊改邑移風遺愛不忘聞兄疾病率爾逝
將袞職有缺賴君缺匡復辟司徒拜軍中侯當授
專城萬里鷹揚念妨弟路遜位恬榮修黃老之術
謙守足之讓祿有不究命有短長缺臨孔明殘隕

貞良卒被氛氣掩忽徂亾年六十有六建德四年

九月丙子卒五年三缺孝孤切乎悲慟剝裂行

路泣血辟踊傷絕凡百君子靡不哀惻喪國之鎮

朝失模式缺負乎位未副德刊石甄表以昭罔

極其辭曰

鑠明德穆郭君外忠絜內資親烈桓桓煥有文所

臨缺風崇和睦垂以仁赫斯發威若神動規矩

禮義遵徽縱顯功加民感兄疾電捐官妙缺海

聞亮矣清寡匹倫爵不副命乖分士歔歔惜增歎

孝流涕痛傷肝魂靈飭號有榮缺永存勒金石

示後昆

先書弟後書子例

漢例書兄弟者多於書子其子弟並書亦往往弟先於子或因事及之或連類及之貴賤賢否皆非所論故雖元方季方不見述於太邱之碑也今舉劉修一碑以例之

漢故慎令劉君墓碑

君諱修字伯麟從事君六字履和而至少罹艱苦身服田畝動乎儉中從虛七字弟克皆其於鄉黨遜遜如也卑謙博愛恕已接人六字事君則安

上竭節不求聲譽故為五福所歸流二凶所三

字

時兄弟並典干城子孫盈門克昌堂構非至德淳粹其孰能與於斯舉孝廉除郎中以將事去官辟從事司徒掾典掌邊事遷慎令行無為之政崇澹泊以惠利素苦風痺到官期月見臣吏救兒子人命呼吸不欲煩擾吏民欲生見舊土歸終於家百姓追逐扣馬攀輪遂不復還年六十七建寧四年五月甲戌卒二弟龍純戀哀孔懷孤生雋協邵長號思慕立此碑銘以表景行其辭曰
於惟君德忠孝正直至行通洞高明柔克鬼神富

謙受惟介福知命不延引輿旋歸忽然輕舉志敏拔葵人皆有亾貴終譽兮歿而不朽垂名著兮

案隸釋漢學者各習其師所引詩書多與今不同此碑鄉黨遜遜如也祝睦碑則云鄉黨遠遠與論語不同又動乎儉中鬼神富謙亦與今之易文不益其師說然也

書從父兄弟例

漢例敘先世必極之荒遠其敘近世兼及從父從兄

弟如平都相景君碑君之祖考為交州刺史從父交趾太守能輸力王室以篤臣節

功死天不己君續厥緒議郎元賓碑魯相之孫北海相之弟

孫根碑樂安太守郭究碑南和尚書濟北軍中臨沂徐州中山君之從子也

猶見古人一本之誼與唐宋人異也

書嗣子嗣父母例

金廣延母徐氏紀產碑子男恭字子肅年十八娶婦

而天廣延立從孫為後都鄉孝子嚴舉碑稱舉之父

產生三女絕嗣無男門戶孤弱收舉為後禮為人後

為之子舉能和顏勤慎居喪有哀養母有則請然後

稽為然後行此皆明著其為嗣子者也至中常侍樊

安碑嗣子遷實以幼弱夙敘王爵而喪所天禮備復

位乃中人假子而已

書繼母例

郊令景君闕銘續母棄之子無隨歿俯就禮畢故府

碑後附載
復請此與李翊碑之書繼母李翊夫人碑之書繼姑者同也

碑後附載其孫例

有其孫先卒而附書於其祖墓者武氏石闕銘是也

武氏石闕

建和元年太歲在丁亥三月庚戌朔四日癸丑孝子武始公弟綏宗景興開明使石工孟孚季弟非造此闕直錢十五萬孫宗作師子直四萬開明子宣張一濟陰年廿五曹府君察舉孝廉除敦煌長史被病夭歿苗秀不遂嗚呼哀哉士女痛傷

碑後附載夫人例

唐宋妻賢且同葬附之夫誌或別葬則別爲專誌漢則概不書妻間有附之碑後若金鄉長侯君碑是也然侯君夫人箸其卒而不箸其姓蓋疏脫如此

金鄉長侯成碑

君諱成字伯盛山陽防東人也其先出自豳岐周文之後封於鄭鄭共仲賜氏曰侯厥允宣多以功佐國要盟齊魯嘉會自邠因以爲家焉漢之興也侯公納策濟太上皇於鴻溝之阨諡曰安國君曾孫黼封明統侯光武中興元孫霸爲臨淮太守擁

兵從光武平定天下轉拜執法右刺姦五威司命
大司徒公封於陵侯枝葉繁茂或家河洧或邑山
濟君則上黨太守之弟幼履慈孝之德長執忠蹇
之操治春秋經博綜書傳以典籍教授滋滋履貞
安貧樂道忽於時榮敬上接下溫故知新翹節建
志冠於羣倫孝友內著仁義外宣郡請署主簿督
郵五官掾功曹守金鄉長卽家假印綬君介心如
石不易其志刺史嘉其高名辟部東平泰山治中
從事君睿精謙虛委蛇衡門以禮磐桓名德可尊
行顯身隱縣興養神聖人制命曰仁常存今胡不

然喪此國偉君年八十一建嚳二年歲在巳酉四
月二日癸酉遭疾而卒烏呼哀哉於是遐邇士仁
祁祁來庭集會如雲號哭發哀泣涕汎闌將去白
日歸彼元陰同盟必至縞素填街存有顯名終有
遺勲魂如有靈嘉斯寵榮於是儒林衆雋惟想邢
景乃樹立銘石以揚淑美其辭曰
於穆君德姿履正平乾皇所挺應符如生耽蓺樂
術恬忽世榮虛位禮請介然不傾壽非南山不俟
河清梁木圯頽鴻儀催零昆嗣切剝哀慟感情乃
銘乃勒億載永嚳

夫人以延熹七年歲在甲辰十一月三日庚午遭

疾終

案武氏石闕之封其孫以孫先歿而並識之也
侯成碑之封其夫人以夫人後亡而續識之也

夫人先葬專誌例

隸續載 農夫人碑漫漶強半可讀者僅數句茲太

尉許馘之室也馘自司農遷衛尉光和四年以衛尉

代劉寬為太尉此碑尚稱司農夫人則銘墓時馘未

為衛尉可知也夫人葬後許又累遷其官此夫人先

葬而專誌之例也

漢故司農夫人碑

司農夫人祖自會稽山陰姓劉氏伊述夫人受持

貞缺體性純淑非禮不行 九族穆 不爭孫息

盈房 德配古列任如為 香車騎陣 相缺迎

醫極悠遠索 畫圖像甄采其 不忘

夫人後葬專誌例

李翊 人碑為夫人後葬而作也是又為節婦誌文

之始其敘事在韻語中昌黎所本其文有敘有辭有

歎命意遣辭皆有楚騷遺意漢碑之杰製也

李翊夫人碑

廣漢屬國侯夫人節行絜靜德配古之聖母蚤失

匹壽眉耆不時憤然激痛稱列厥迹辭曰

昔彼衛姬輔齊匹桓文母修導周室獲蕃於戲夫
人臧侯苗焉自彼適斯蹈禮伉言恭順承舅孝行
布宣述嬪慈惠聰達楚樊繼姑入室勤養拳拳育
理家道羣宗爲軒求福不回操無遺愆約身紡績
殖賄圃園敬姜誨子叔敷陰恩男三女二雍穆閨
門女則哲禮男則與權節義踰古訓導不煩九族
和親若葉埴根歲在大淵獻精魂奄昏飛神天庭
收形罔都莫不歎息涕零烏呼明智有德咸曰何
辜害我仁良顛缺天姐痛感路人泣霑泥塗逝而

不返子孫呱呱

歎曰陰陽分兮鍾律滋星月列兮有四時神宓訖
兮萬姓熹壽十二兮九九期五三未兮衰在姪秋
發兮春華殆周公九兮成稱灾靡黃髮兮蓋天胎
世有皇兮氣所裁赴鴻淵兮逝不來鳳延頸兮泣
交頤鵠雛悲兮涕隕零寐耿耿兮摧傷情彼蒼天
兮懇神靈慟切剝兮年不榮蘭芷亾兮喪芝英誰
不切兮作偯聲疇匹號兮鳴譽譽祀之至今感動
城陟四極兮升天庭曰司命兮政不平飛螽蠹兮
害仁良魂魄孤兮獨熒熒陳祔祠兮返所生幽不

見今存厥形嗟曰遐兮適冥冥

案隸釋漢婦人墓銘見於文士集中固不一其石刻存於今者只此一碑

女為其父立碑例

郭輔碑因其女而立之碑稱四男三女咸高賢姣嬈
婦容亦四德之一天桃穠李碩人諸詩繫之國風
聖人不刪唐人薦福碑圓姿替月潤臉呈華胡君墓
志穠荷比秀美箭齊貞述女德而因窻婦容猶承古
義非獨六朝為然此風至宋而絕錄之以志源流之
遞變焉

郭先生之碑

先生諱輔字甫成其先出自有周王季之中子為
文王卿士食采於號至於武王錫而封之後世謂
之郭春秋之時為晉所并遭戰國秦漢子孫流分
來居荆土氏國立姓焉傳云聖賢之後必有達者
先生應焉其少也孝友而悅學其長也寬舒如好
施是以宗親歸懷鄉黨高尚直已而行年五十有
二遇疾而終有四男三女咸高賢姣嬈富貴顯榮
可謂子孫繁者矣其季女明文潁川之夫人也感
惟考妣克昌之德登山采石致於墓道邑人縉紳
刻石作歌昭示來嗣其辭曰

石片厚例
寔惟先生號仲之裔盛德遺祀休矣奕世孝友貞
信仁恕好惠直己自求不欲榮勢綽綽令人獲道
之至篤生七子鍾天之祉堂堂四俊碩大婉敏娥
娥三妃行追太妣葉葉昆嗣福祿茂止克昌厥後
身去烈在鐫石作歌昭示萬祀

書女不書壻例

張公神碑書三女李翊夫人碑書男三女二嚴舉郭
輔皆書三女輔碑以立石出於其季女故書之曰季
女明文潁川之夫人也蓋因事及之而不見壻名唐
宋以來作者以女重所歸故壻書而子婦不書酌義

精矣

書子婦例

子婦從來不書世俗濫及於古無稽徐氏紀產碑娶
婦徐氏張賓公柱文子偉伯伯妻孫陵此子婦之因
事見書者而非爲子婦書也

納銘墓中例

齊王儉謂墓志始顏延之任昉謂始於晉其說皆非
今漢刻在世者甚多然其來有漸亦非漢始三代皆
有殉葬器物雖不銘其墓而銘其器物若薛氏鐘鼎
欸識載殷比干銅槃魯正叔之空作槃此卽納銘之

肇端也張華博物志載西京發地得王史威長墓志三十二字則墓中石刻之權輿也東漢有顯刻墓上者有隱刻墓中者幽銘陽碣固已略備至南朝忽有禁斷舉世莫為而其時去漢未久漢石尚未出土士夫莫覩遂誤謂起於晉宋耳集古錄載永建元年室銘洪氏隸釋載漢張賓公妻穿中二柱文實皆後世埋銘所自起今錄張柱文於後


張賓公妻穿中二柱文

維兮本造此穴者張賓公妻子偉伯伯妻孫陵在此右方曲內中

維兮張偉伯子長仲以建初二年六月十二日與少子叔元俱下世長子元益為之祖父穴中造內棲柱作屋棺葬父及弟叔元

案漢碑烏呼字異文特多或作歎或作歎歎縣二老楊信碑有維兮和平大漢元年之文張偉伯石柱亦再用之維兮歎辭蓋如楚騷之只些唐詩之噫吁戲今內閣翰林院漢字祝文於天神地祇則曰於戲於人鬼則曰嗚呼讀祝官以清語宣贊遇嗚呼則愁而歎之曰懷遇於戲則驚而歎之曰呀其義一而施之者殊焉爾

碑版文廣例卷五



碑版文廣例卷六

長洲王芑孫念豐輯

漢

石闕石壇神道墓道括例

今墓制皆為門橫書某氏或某官某公墓道漢例不為門有稱闕者有稱墳壇者有稱神道墓道者或雙峙而兩書之或一闕而背面徧書之或悉書勳閣或祇題姓氏皆唐入所謂墳前石表也今以類括之於左

題雙闕例

漢故先靈侍御史河內縣令王君稚子闕

漢故兗州刺史洛陽令王君稚子之闕

案王君名煥字稚子循吏有傳稚子嘗為河內溫令碑作河內令者以郡為尊謂河內之縣令爾即溫令也猶今部曹不必指稱某司而統謂之某部郎中主事也先靈之稱亦此僅見

漢故益州太守武陰令上計史舉孝廉諸部從事

高頤字貫方

漢故益州太守陰平都尉武陽令北府丞舉孝廉

高府君字貫方

案二闕一書名字一字而不名漢志屬國無陰平惟廣漢有陰平道注北部都尉治此以廣漢為陰平亦指其理所言之爾

會稽東部都尉路君闕永平八年四月十四日庚

申造

君故豫州刺史溫令元城令公車司馬令開陽令

謁者議郎徵試博士

案此見趙明誠金石錄一題今所終之秩一紀故所歷之官并志建闕年月

題闕書官書姓不書名字例

鉅鹿太守金君闕

漢故趙國相離府君之闕

漢故不其令董君闕

案此皆一闕孤時不題名字或本兩闕而年久墮廢僅存其一未可知也

題關祇書名字例

漢故高君諱直字文王

處士金恭字子壽

案金恭闕圭首甚銳上刻三足鳥其次橫列此數字下刻一人執扇乘馬兩旁有螭銜環

書神道例

故尚書侍郎河南京令豫州幽州刺史馮使君神道

廣漢縣竹令王君神道

故上庸長司馬君孟臺神道

雙書神道例

漢太尉劉公諱寬字文饒

漢太尉車騎將軍特進昭烈侯劉公神道

案此一題名字一題勳爵而神道字不重出見隸續各刻一螭蟠屈其上作獸面如彝鼎間鑿發之象太字加點

漢謁者北屯司馬左都侯沈府君神道

漢新豐令交趾都尉沈府君神道

案隸釋二闕上刻朱雀下刻龜蛇虎首其形相向知此是一人猶王稚子闕盡書其所歷官也

神道書氏例

韋氏神道

書墓道例

漢故益州太守楊府君諱宗字德仲墓道

清河相國農太守張君墓道

似闕非闕似碑非碑例

君諱就字進德故蜀郡江原長延熹三年丁缺孟

彥造作

案非闕有名字而不書姓其文由左而右下刻一怪獸之首若虎而有角

闕有銘辭例

郊令景君闕銘

案闕有長篇文字者此即借闕以載其功德不更別立碑也

漢故趙國相雖府君之闕

案此闕後有文志雖君父祖兆域所在趙氏以此十字為闕以文為碑洪氏云此蓋題闕之文非墓道之碑邱中之銘也

闕題某墓例

漢右侍之墓

案此見隸續洪氏曰漢官有左右署侍郎漢碑多省文如郭仲奇為北軍中侯而省其北字高頊為北部府丞而省去部字此省署字其左有光和三年四小字

漢貞女羅鳳墓

案此見隸續亦墓闕也

題廟闕例

永和元年五月癸丑朔六日戊午宏農太守常山

元氏張勳爲西嶽作石闕高二丈二尺

題廟壇例

漢故太邱長潁川許陳君壇碑

案此陳寔廟壇也段光爲縣叔敖作廟立碑其文曰興祀立壇又水經載漳河神壇碑皆指廟中之耳

題墳壇例

祝其卿墳壇居攝二年一月造

上谷府卿墳壇居攝二年二月造

案洪氏云古未有土木象故爲壇以祀之祝其卿者祝其丞也府卿者府丞也應劭曰大縣有丞左謂丞爲卿亦其時相沿通例也

碑額括例

墓碑之穿所以下棺廟碑之穿所以麗牲漢碑類皆有之其穿外有暈其暈繚繞或卽自穿中出或別從穿外起尚存古制引綽之意其碑文有居穿下者有因當穿而廢其數字者其碑首或刻螭虎龍雀以爲飾就刻其中爲圭首或無他飾直爲圭首方銳圓楮不一其制圭首有字謂之額其額書往往在暈中篆字謂之篆額隸字謂之題額亦不必皆在正中或偏左或偏右皆有之或豎作一行或分作兩行或勻作三行其所題或故階或今秩或隨字書之或竟有無

額者今以類括之於左

篆額之例

帝堯碑

案漢碑篆額者多不勝舉今舉一以概之

隸額之例

楚相孫君之碑

漢執金吾丞武君之碑

案隸額亦多今舉二以概其餘

無額之例

漢故中常侍騎都尉樊君之碑

案此廟碑之無額者

廣漢屬國侯李翊碑

案此墓碑之無額者

孔廟置百石卒史碑

魯相韓勅造禮器碑

案漢碑無額亦多今於廟碑墓碑舉其一紀事之碑舉其二以概之焉

額題一字例

廣漢長王君治石路碑首加一表字

案此文不滿百志王君攻治崖路其末云功夫九百餘日成就通達永傳億歲無窮記首加一表字末加一記字所以表記其功也

額有旁及例

三公之碑

案此三公山碑隸題其兩旁又有封龍山靈山君六隸字頗大此為三公山立碑而又欲兼存靈山封龍山之神蓋此本妖巫所為故妄加之

額有書銘例

漢故益州太守北海相景君銘

額有書頌例

漢故藁長蔡君之頌

額題墓表例

故謁者景君墓表

案此即墓表命名所自起

額題神道碑銘例

漢故太尉楊公神道碑銘

案此即神道碑銘命名所自起

額題故階例

漢故衛尉卿衡府君之碑

案衡方自九卿左降為五校此猶書衛尉卿從其所尊蓋故官也漢例惟守相得稱府君方嘗慰守北平潁川遷除久矣此猶書府君從其故稱也凡故官重而今職輕皆從其故此例多舉一以概之

漢故博陵太守孔府君碑

案孔彪自博陵再遷而歿猶書博陵者蓋碑陰有故吏十三人皆博陵之人也立石者博陵故吏故

石片原位

以本郡題其首
此又一例也

額題今秩例

漢故堂邑令費君之碑

案費鳳自郎中出率新平故鄣堂邑
三縣而祇題堂邑從所終之官也

漢故沛相楊君之碑

案楊統自長史府丞以至為金城太守車騎將軍
五官中郎將晚為沛相今舍尊秩不書書沛相碑
固沛人之所立也

題額書官書姓例

漢故山陽太守祝君碑頌

案此祝睦也書漢故

故敦煌長史武君之碑

案此武班也書故不書漢

有漢泰山都尉孔君之銘

案此孔彪也書有漢

漢故荊州刺史度侯之碑

案此度尚也書侯

漢故車騎將軍馮公之碑

案此馮緄也書公

漢故慎令劉君墓碑

案此劉修也即墓碑命名所自起

逢童之碑

案此逢盛也書童

漢故太尉車騎將軍特進逮邳昭烈侯劉公之碑

案此劉寬也以尊故官階勲爵書之詳而又標其謚

故相府小史夏堪碑

案漢公府掾東西曹比四百石餘比三百石皆不言故通謂之百石碑言堪典職首曹必東西曹也以其蚤世故謂之小史非官名也

漢故領校巴郡太守樊府君碑

案此樊敏也碑云牧伯劉公二世世欽重表授已郡後漢中蓋先表巴郡後表漢中而額以領校巴郡稱者朝無成命也領校猶唐制之檢校宋之權差云爾

漢故綏民校尉騎都尉桂陽曲紅灌陽長熊君之碑

碑

案漢額善官或從其最後或舉其最尊此備書所歷不與他碑同又一例也

山陽府卒史防東守尉司馬君碑

案漢以他官攝事謂之守此以山陽卒史守防東尉由部曹而攝也官其本秩自如猶唐宋之所謂試今之所謂署耳

守相額題府君例

漢故博陵太守孔府君碑

案此孔彪也以守故稱府君

漢故梁相費府君之碑

案此費汎也以補故稱府君又守相亦有不補
府君者如南陽太守秦君碑之類然此乃通例今
不更列

額書殊遇例

漢故國三老袁君之碑

案漢世鄉三老縣三老皆常置僅有秩耳國三老
則必待天子臨雍擇國老之有德者充焉故殊而
書之良自郎中謁者積遷
高位皆不書書所獨也

額題私謚例

漢故司隸校尉忠惠父魯君碑

案此魯峻也
書忠惠父

元儒婁先生碑

案碑末有處謚之語
然則元儒亦私謚也

額題勲德例

神漢桂陽太守周府君功勲之紀銘

案此周憬也書神
漢與他碑異文

巴郡太守都亭侯張府君功德敘

案此張納德政碑也
不曰記而曰敘可見敘記之相通久矣

額題郡邑例

漢故光祿勳東府無鹽劉府君碑

案劉曜以公族歷官甚多此題光祿勳舉
今秩也題府君者以問守河內從故稱也

漢故太邱長潁川許陳君壇碑

石片履

案此陳寔碑也

額加稱號例

郭先生之碑

案此郭輔也書先生特稱也

漢故民吳公碑

案此以故民而書公亦特稱也

孝子王立碑

僊人唐君碑

額紀政令例

都鄉正衛彈碑

案隸釋前漢食貨志月為更卒已復為正注云更卒謂給郡縣一月而更者正卒謂給中都官者衛為材官習射御騎馳戰陳又云民給正衛材官年五十六老衰乃得免為民水經有南陽都正衛彈勸碑此碑則以禦陵君承昆陽喪亂之餘愍徭役之苦結單言府班董科條收其舊直臨時募雇不煩居民守丞為之立約自是之後吏無苛擾因立碑以頌之趙氏誤以衛為街因不得其解

首山復民碑

案此見趙氏金石錄別有首山復戶姓名

額題隨事例

中部碑

大饗記

石片履例

案此皆即事書之義取簡捷

額題隨地例

校官之碑

案此為梁陽長潘乾興學宮講賓射作也潘非校官而題作校官始碑立於校宮也漢人以學校為學官通指其地非指其人不必屬之文學掾不必如石室題名之學師也

額題祠廟例

漢故行梁相事碭孔君之神祠

漢故膠東令王君之廟門

神祠碑額例

殺阬君神祠之碑銘

白石神君碑

張公神碑

額箸宦官例

漢故小黃門譙君之碑

案碑中不敘譙敏爵秩蓋古人有已見於題即不更箸於篇者非見是額則莫知其為黃門也

漢故中堂侍長樂太僕吉成侯州君之銘

案此州輔也輔與曹騰等俱以定策功封亭侯騰封費亭碑言輔封葉吉成者葉縣之吉成亭也亭侯非列侯可此不書亭侯而書侯者當日中人得志其夸僭有如是也

額題兩人例

漢故益州刺史中山相薛君巴郡太守宗正卿成

平侯劉君碑

案此蓋紀事之碑今載隸續洪氏云趙誤為墓碑故云古無兩人共立一碑者周官太宰卿一人謂太宰以卿一人為之也百官志太傅上公一人太尉三公一人太常卿一人蓋史氏用周官之法紀傳所書三九之官皆不繫以公卿字惟孔廟碑稱吳雄為司徒公衡方碑題衛尉卿與此碑所題宗正卿乃遣辭者蓋之非當時官名也以卿名官自蕭梁始

廣漢屬國造橋碑

案碑額刻二人若賓主對坐中有一器後各有使令者一人畫像之下橫列二君官字二十六字又其下則碑文也

額題追溯得姓例

本周末嗣戚氏襲以與勃海君元孫伯箸之碑

案碑溯得姓之始以周冑別封衛之戚邑因姓戚氏洪氏云本上尚有一字石損曰襲以興者謂周之後興也此時墓刻始起標題未當律令碑有太歲丁亥字世祖建武帝章和戚宗建和獻帝建安皆有丁亥此當是建武或章和所刻文也又案從此以前皆篆額隸額始此

碑題括例

冠之碑首謂之額冠之篇首謂之題漢碑大抵有額無題然亦有額題兩具者亦有不額而題者今列之於左

不額而題例

巴郡太守都亭侯張府君功德敘

漢故中常侍騎都尉樊君之碑

石片廣位

金君字缺二碑

案此金恭字子壽碑石剝不可辨

篆額隸額兩具例

有漢泰山都尉孔君之銘

案碑陽碑陰兩有篆額當篇之首又冠此題漢之特例也

題書郡邑名字例

故宛令益州刺史南郡襄陽李固字孟初神祠之

碑

案李以卒官吏民追思為立碑祠垣宇樹木而中大人共案文字復其守祠義民中大人者中官也當時之尊宦者如此

碑陰括例

隸釋隸續所載有別碑有後碑別碑者同紀其事而別立一碑也後碑者不更立石即以刻之碑陰也後碑之稱專指長篇大章而言其無長篇大章者皆謂之碑陰漢碑陰類皆題名其題名有書率錢之數者有不書錢數者有題門生故吏者其門生故吏有分標者有錯列者有襍以書撰人名者有襍以石工石師者有并紀續事者有并紀他人者隨事各殊了無義例悉數不能終其物也聊舉大略例之如左

碑陰有額例

宗俱碑陰上六大篆字曰門生立碑人名下列四
橫書其人郡邑名字略無官稱

鄭季宣碑陰以八篆字橫刻其上曰尉氏處士故
吏人名下列四橫其中督郵邯鄲璣名字之下細
書四字云今司空掾未有直事一十四人

孔宙碑陰以五大篆表其上曰門生故吏名其下
列門生四十二人門童一人弟子十人故吏八人
故民一人

案隸釋漢儒所親受業則曰弟子以久次相傳授
則曰門生未冠曰門童總而稱之亦曰門生其所
部掾屬則曰故吏占籍者曰故民非吏非民則曰
處士素非所莅則曰義士義民亦有稱為議民賤

者氏

碑陰有前題例

王純碑陰首行云諸門生人名凡九行皆字而不
名景君碑陰前題諸生服義者一行所列皆弟子
而義士一人冠諸其首蓋惟此一人非弟子故亦
不復別為標目耳

碑陰有後識例

景君碑陰第三列姓名之下總之曰行三年服者
八十七人末以兩行列四言韻語十八句略言故
臣吏守衛墳園三載當離墓側乃箸遺辭靈顯垂

祐之意

王純碑陰姓名之後總之曰各發聖心共出義錢
碑石碑直刊紀姓名此皆當時所識也

劉寬故吏碑陰題名之上有十五葉孫周王記室
爽題字略言中平二年故吏立碑於洛陽道隋作
東都改立於此至唐咸亨元年四百八十四年矣
傾仆中野移建墓南二百八十步上東門道此則
後人所增識也

碑陰分繫例

漢碑陰故吏門生錯列者居多劉寬以故吏門生

各自立碑故各題其陰此故吏門生之分繫者也
其門生碑陰或書官或不書官或注錢數或不注
錢數其姓名之後又各總之曰右河內郡右河東
郡右京兆右河陽之類此於門生中又以郡邑分
繫者也

王元賓碑陰所列故吏以右奔喪右斬杖三年分
繫其名

靈臺碑陰前列廿八人而總之曰右仲氏門宗所
會計治黃屋出錢名後列卅一人而總之曰右仲
氏宗門所會計立石作碑出錢名此於一家之中

又各以事分繫

楊箸碑陰分繫之曰右後公門生曰右沛君門生
曰右三人沛君生蓋箸爲太尉震之孫常山相讓
之子沛相統之從弟太尉秉之從子秉拜太尉在
震後故稱後公箸門生立碑而一家先後門生相
與共攸其事故分別書之其人非箸門生故字而
不名又不注錢數而總之其後曰右四人五百右
人五百此分繫其人又分標其錢數者也

殺阮碑題其陽曰有秩者六十餘人則在碑之陰
者無秩可知也無秩中又別之曰右郡吏則下皆

編民可知也此以人分繫之又一例也

逢盛碑陰列五官掾督郵等皆書字不名而總之
曰右縣中士大夫後列高密徐承興祖等有名有
字而總之曰家門生是其父之門生也最後兩人
具書名字則逢盛之友或其族姓耳此又以人分
繫之一例也

碑陰題名橫直例

韓勅後碑之陰姓名五列所題士大夫七十人皆
橫列其後四行直書冢下復民給婦除等名皆細
人也又後一行云永壽三年孔從事所立

碑陰分別其子出錢例

陳球碑陰四十人各列錢數前二行故吏某下皆有蚤終字息字蓋二人已卒出錢者乃其子也

碑陰不書郡邑例

婁壽碑陰不書郡皆同郡之人也州輔碑陰不書縣皆同縣之人也魯峻碑陰貫汝南彭城者各一人餘皆山陽人也繁陰令碑陰百世四人不書邑皆繁陰人也其閒有服陵長一人蓋嘗出任異邦者然而亦稱故民也

碑陰書字例

全碑不名者楊震楊著王純婁壽四碑陰蓋二楊所列乃其兄叔及其孫之門人相去遠誼疏不名也逢盛碑陰崔孟祖數人不名者乃其父黨也韓勅碑之二庶一傳不名尊守相也褒成侯建壽在子弟之閒而齒德俱尊亦不名也張納碑陰主簿白文已下不字示其卑於從事季元也史晨後碑五官掾孔暢六人不字亦示其卑於長史李謙也韓勅碑陰蘇漢明者已鐫而續書故以其人處士四字注於下

碑陰刻詔策例

曹騰碑陰列文二一太后曰云云遣騰就國之詔也一制曰云云騰既歿而褒贈之詔也

碑陰紀故事例

東海廟碑陰刻文曰闕者秦始皇所立名之秦東門闕事在史記此因碑中有倚傾之闕句故加此注語爾

碑陰紀本錢例

舜子巷義井陰稱五大夫世一人稱分子者六十八此在西邸賣官之後故五大夫如許之多穀梁傳注分子謂周之別子孫此所謂分子始巷民出

分之子其人名之下或曰本二萬本三千始謂本錢耶

碑陰標別長官姓名例

嚴舉碑陰丞尉之次都鄉鹽官二有秩又次主吏督郵八人書云向主吏諱某字某楊督郵諱某字某此又從羣列中標別出之故鼎其姓於吏職之上以挈其諱字其後皆弟子列名此碑始弟子所刊書其長官於前而措辭若此猶之韓勅碑陰題孔從事所立云爾

題名轉在碑前例

嵩山太室少室諸闕守丞題名皆在碑陽又居文字之先

題名即附碑陽例

題名不在碑陰即書之其陽者三公無極校官諸碑是也

題名在碑首之旁例

成陽令唐扶碑有成陽令高某成丞史珍二人題名刻在碑首之旁

題名在碑陰之趺例

蓋州太守陰有故吏三人題名此碑五玉三獸下

刻牛首而題名則在趺右

碑陰題名後加吉語例

張納碑陰題名後綴一行云中平五年三月上旬書君升台祚承天百福子孫千億蓋漢例雖墓碑亦往往有以吉語終者

題名碑略例

漢題名多在碑陰亦有專為題名而立不必定在陰也隸釋載成都周公禮殿門西序有學師題名其間稱師者二十人史二人孝義掾業掾各一人易掾二人易師三人尚書掾尚書師各三人詩掾四人春秋

掾議掾文學掾各一人文學師四人從掾位及集曹
 法曹賊曹辭曹史又世二人漢為四姓小侯立學置
 五經師此則蜀守以教屬諸生諸生刊石紀德而諸
 曹史綴名其末成都又有左右生題名蓋左學右學
 諸生也又中部碑題名五十餘人略似碑陰而有額
 題之曰中部碑始專為題名作也所稱曹掾主簿游
 徼嗇夫與他碑同又有里祭酒十六人校官祭酒一
 人猶之成都左右生碑之有文學祭酒案此為太學
 進士題名碑
 始所自孝堂山室畫像題字其一云泰山高令明永康
 元年十月廿一日敬來觀記之其一云平原隰陰邵

善君以永建四年四月廿四日來過此叩頭謝賢明

案此為後人游覽題名所自始簡州逍遙山石窟有刻文曰建安元

年四月十八日會僊友十二字

案此蓋道流聚集之辭亦後人宴會題壁

紀事所自始

嵩山石闕刻文曰中郎將堂谿典伯并熹平

四年來請兩嵩高廟蓋借舊碑以題名其上自漢已
 然非始於唐宋也此皆漢刻之可本者故錄之其例
 甚多不更臚舉

碑側略例

漢世雙鉤法未具大抵書丹於石又選石至謹其碑
 材皆厚四面刻之其書丹各循其石勢為之分行布

白初未安排故石門頌命字誦字李孟初碑年字皆引其末筆長過一二字以避石有癩胝其分行或自左而右或自右而左或碑陽語多而侵其側或碑陰字滿而軼其旁略無定例如開母闕銘文與題名刻之闕南轉及西側此由碑陽而侵之也韓勅碑率錢人數既多至无等題名其陽王嵩等題名其陰山陽瑕邱等題其右側敬謙等題其左側此由碑陰以軼之也其他或事後續題或他人增識或游覽訪碑者各記來觀歲月自近二三十年來海內講漢學者一痕一垢梳剔始盡亦既攷之精語之詳矣要此亦臨

池家或所欲知無與於承學治古文者今不續舉

石人例

墓前石人不知制所從始隸續載任君碑陰殘字有石官二則其設由來久矣今漢制傳於世者有門亭

長

水經注酈食其廟石人曾前有銘字云門亭長

有府門之卒

金石圖魯恭王墓前東側

一

石人介而執及高五尺腰圍七尺刻字曰府門之卒

有亭長

金石圖一石人冕而拱手立額

丁

裂紋如滴痕高五尺五寸腰圍七尺五寸刻漢故樂安太守庶君亭長十字與上府門之卒並肩西

向

立相去

唐人亦謂之翁仲我

朝重定會典品官墓得用羊馬三品許用虎一品始

得有翁仲余嘗東謁

景陵其石師子寫仿康熙中外國貢師作之短脰小
軀高竝果下馬意狀不甚猛摯與世俗所繪及蹲之
牙門者不同二石人朝衣朝冠東立二石人介冑佩
刀西立蓋東立者二大學士西立者二領侍衛內大
臣也今以漢守相用門卒亭長之義推之則一品官
當用兩人對立如生前文武巡捕官之屬可也宋游
師雄題昭陵圖云陪葬之盛與夫刻番酋之形琢六
駿之象以旌武功莫若昭陵則石人石馬之用至唐
初而尤盛又宋趙楷記唐時諸番皆來助葬乾陵武
后欲誇示來世於是錄其酋長六十一人各肖其形

則乾陵之石人亦多矣

石獸例

漢人石獸不一往往刻文獸膊其制有辟邪有天祿

趙氏金石錄州輔墓石獸出土其有師子武氏石闕

左膊有字一曰辟邪一曰天祿有羊隸續交趾刺史

師子直有馬對立二石馬高八尺五寸有虎隸續

錢四萬有馬對立二石馬高八尺五寸有羊隸續交趾刺史

石虎刻文曰光神覽元博所造有羊隸續交趾刺史

日巳丑孝子神覽元博所造有羊隸續交趾刺史

四字為一行君有龜淮源廟碑石獸此皆漢人墳壇


羊二字為一行有龜淮源廟碑石獸此皆漢人墳壇

立石例

漢例立石出於故吏門生為最多其次則州里之人

然亦有子弟立之者鄭固樊安劉修魯峻諸碑是也
 有其孫立之者費汎碑是也有其女立之者郭輔碑
 是也有族人立之者李翊碑是也有鄉人好事立之
 者丁魴碑是也有小門生立之者楊震碑是也有縣
 令太守立之者高彪諸碑是也有同歲立之者武班
 柳敏諸碑是也有以舊碑重立者丹陽太守郭嚳碑
 是也碑後識云昔君即世雖立碑頌裁足載字加有
 瑕般君之弟故太尉公夢歸葬舊陵於是從子
 故五原太守鴻議郎柔及孫范乃更刊石不改前
 文蓋用昭明祖勲以宣達情志庶傳不朽序云爾
 有以漢碑而唐人重立者許馱夫人是也吳處厚青
 箱襍記義
興有許馱廟其碑許劭所作唐開元中諸孫重刻碑
 陰有八字云談馬礪畢王田數七徐延休讀之曰談

馬即言午言午許字礪畢必石卑石卑碑字王田方
 千里千里重字數七是六一六一立字其碑在光
 之前此外尚有同舍立之者後政立之者大抵初無
 無疑定之人亦無一定之時耳



道光辛丑春日
東吳江元文寫
此六卷刻者桐
涇橋吳學圃也

